

# Him Yaaim Me Kraiss Jon Kewisim Mau Tiwei

## Menmen mekre tiwei ik

Jon Baptais katip mit him me God 1:19-34  
Jisas kehimitan mit disaipel nirak 1:35-51  
Jisas katip mit him me God 2:1-12:50  
Jisas katip mit disaipel him mirak 13:1-17:26  
Mit newenkek Jisas kaa 18:1-19:42  
Jisas pike kekrit mit nirek 20:1-31  
Jisas ketike mit disaipel neit Galili 21:1-25

---

## Nipaa enum eik mitik kiutip kepu kakwetai him yaaim

**1** <sup>1</sup> Nipaa enum eik, God kiriak ti wen au, mitik kiutip kepu kerek kakwetai him yaaim. Hirak kau ketike God, hirakit tau niutip tipirakit. <sup>2</sup> Menmen mepu wen au, hirak kau ketike God. <sup>3</sup> God katip mitik ik, te hirak kewis menmen yapirwe kerek mepu, hirak kiriakem. Menmen meiyam miutip ap te hiremes mekrit au. Hirak Haai ke himin hak yaaik kikaap mit hir nanu nanit tipmain tipmain enum eik. <sup>4</sup> Hirak kikaap mit nertei God, hir nanu werek nanir ke si mir te mit hir nanir yayiwe. <sup>5</sup> Him me mitik ik hiram mire si mirius ein ein. Menmen enum mire witaan toto mekre han ke haiu mit ap te mamininem mamiwaankem taau.

<sup>6</sup> God keriuwet mitik kakwepyapir menmen im, hirak itai kai niuk mirak Jon. <sup>7</sup> Hirak kan katip mit me mitik ik. Hirak yaaik kire si mir, te mit yapirwe nemtau him me Jon, hir nanises mitik ik. <sup>8</sup> Hirak hirekes ap mitik ik au. Hirak kan katip mit him me mitik ik yaaik kire si mir.

<sup>9</sup> Mitik ik hirak kire si, hirak kan ti. Hirak kikaap mit miyapir kerek nepu te hir nertei God. <sup>10</sup> Nipaa God kiriak ti keriuwerek, te mitik ik kan

---

<sup>a</sup> 1:1 Jo 17:5; 1Jo 1:1-2; Rev 19:13    <sup>b</sup> 1:3 1Ko 8:6; Kl 1:16-17; Hi 1:2    <sup>c</sup> 1:4 Jo 5:26

<sup>d</sup> 1:5 Jo 3:19    <sup>e</sup> 1:6 Mt 3:1; Lu 1:13-17, 76, 3:2    <sup>f</sup> 1:8 Jo 1:20    <sup>g</sup> 1:9 Jo 8:12; 1Jo 2:8

<sup>h</sup> 1:10 Jo 1:3, 17:25; Kl 1:16

kau ti. Mit nau ti nepitari mitik ik hirak Mitik Iuwe kiriak menmen im au. <sup>11</sup>Hirak kan ti kerek nipaa hirak kiriakek, te mit nirak en ne weiwik me Isrel neweikin sip newetiwek. <sup>12</sup>Te mit han kerek nemtewek nisesik, hirak katip hiram werek te hir nire nikerek ne God. <sup>13</sup>Hir ap nire nikerek ne God nentar miye haai ninen au. Hir nikerek ne God nentar God kehimiteni hir nirak.

<sup>14</sup><sup>k</sup>Mitik ik kan ti keit yink kar ke haiu mit. Haiu mirek hirak Mitik Yaaik kire God, hirak kerekyei haiu mit menmen yaaim, hirak katip him kemipin au. Hirak kiriak menmen im yaaim kentar hirak Nikan kiutip kerekek God kiriakek, te hirak mitik kar ek. <sup>15</sup><sup>l</sup>Jon kewepyapirek katip mit kar ik: “Mitik ik hirak mitik nipaa hi hetpiyek har ik: ‘Hirak kikaru kakwepyapir him te hirak iuwe kinina kentar nipaa miye wina wen au, hirak kepu ketike God.’”

<sup>16</sup><sup>m</sup>Haiu mit meit menmen yaaim me God mentar mitik ik ketenen menmen mirak yapirwe kewetaiyem keteipim keteipim. <sup>17</sup><sup>n</sup>Nipaa God kewet Moses him lo mirak hirak kewetaiyem haiu emisesim o au en, haiu mami. Te Jisas Kraik kerekek kerekyei yaaim kewetai him mirak ham yaaim. <sup>18</sup><sup>o</sup>Mitik kiutip keiyak ap kir God au. Mitik kiutip kerekek hirak hirekes kire God kau ketikerek menep, hirak epei kewepyapirek keteiknaiyek te haiu mertei God hirak kire mekak.

### Jon Baptais

*(Mt 3:1-12; Mk 1:2-8; Lu 3:2-18)*

<sup>19</sup>Wi ham mit iuwe naanmipre mit ne Isrel hir neriuwet mit pris netike mit han ne weiwik miutip me Livai kerek hir nikaap pris niriak menmen, hir nan nitehi Jon nar ik: “Ti hatip ti keimin?” <sup>20</sup><sup>p</sup>Hirak kepakin au hirak kewepyapirem ketpor kar ik: “Hi ap Mitik God kehimitena hi akaap mit ne Isrel au.” <sup>21</sup><sup>q</sup>Hir pike nitiwekhi, “Ti ap Mitik God kehimitenut ti ekepai haiu mit ne Isrel au, te ti keimin? Ti mitik profet Ilaija o au?” Hirak ketpor: “Hi ap Ilaija au.” Hir nitiwekhi neteipim: “Ti mitik profet haiu memeriyut ti enen o au?” Hirak katip: “Hi mitik profet ik au.” <sup>22</sup>Hir netpiwek: “Te ti keimin? Mit kerek neriuwetai haiu man in hanhan nanirtei ti atip mit ti keimin. Te ti etpai.” <sup>23</sup><sup>r</sup>Jon ketpor kar ik: “Hi mitik ik ek. Hi mitik herp wit tenhaan weinik mit ap newi hi hinap hatip, ‘Yi mit einetit yayiwe eiriakem yaaim te Mitik Iuwe kakitetik kaknen.’” Nipaa profet Aisaia hirak kewis him im mau tiwei.

<sup>i</sup> 1:12 Ga 3:26    <sup>j</sup> 1:13 Jo 3:3-6; Je 1:18; 1Pi 1:23    <sup>k</sup> 1:14 Ga 4:4; Fl 2:7; Hi 2:14; Ais 60:1-2; Lu 9:32; Jo 2:11    <sup>l</sup> 1:15 Jo 1:27, 30; Mt 3:11    <sup>m</sup> 1:16 Kl 2:10    <sup>n</sup> 1:17 Eks 34:28; Ro 6:14, 10:4    <sup>o</sup> 1:18 Eks 33:20; Jo 6:46; 1Ti 6:16; 1Jo 4:12; Mt 11:27    <sup>p</sup> 1:20 Jo 3:28    <sup>q</sup> 1:21 Mt 11:14; Diu 18:15, 18; Jo 6:14, 7:40; Ap 3:22    <sup>r</sup> 1:23 Ais 40:3

<sup>24</sup>Mit ne Farisi kerek ninin nertei him me Moses hir nisesim, hir keriyen neriuwet mit in nan nitehi Jon menmen im. <sup>25</sup>Te mit in hir nitehi Jon, “Ti ap Mitik God kehimitenut ti ekaap haiu mit ne Isrel, ti Ilaija au, ti mitik haiu memeriyut au, ti henmak te ti hikir mit miyapir neriuwe tipar a?” <sup>26</sup>Itai kai Jon ketpor, “Hi hikir mit neriuwe tipar weinim, te mitik kiutip kerp nimin ke yi mit yi yepitariyek. <sup>27</sup>Hirak kisisa, te hirak Mitik Iuwe kinina, hi hire mitik enuk weinik.” <sup>28</sup>Menmen im man meit wit Betani meit menke men pinak ein ke mani Jodan kerek Jon kikiri keitai en.

### Jisas Nikan kire Sipsip ke God kaki kakisak menmen enum maiu

<sup>29</sup>Maain wi ham itai kai Jon kir Jisas kaknen kakirek hirak katip, “Eiyirek! Mitik ik ek hirak kire Sipsip ke God. Hirak keriuwetek kan in kaki kakikrehir ke haiu mit te hirak kakisak menmen enum haiu miriakem. <sup>30</sup>Hirak mitik kerekek kerek nipaa hi etpiyek kerek maain kikaru kakisisa kaknen, hirak Mitik Iuwe kinina kentar nipaa hirak kinina kepu ketike God me wi miye ap wina wen au. <sup>31</sup>Nipaa hi ap hertei hirak kakre keimin, te hi hikir mit har ik ek te hi eteikin yi mit ne Isrel yi eiyirtei hirak keimin.”

<sup>32</sup>Jon katip him im em me menmen hirak kirem. Hirak katip, “Hi hir God Himin Yaaik kenke keke nepni kan kire hore tapi kan kenterik. <sup>33</sup>Hi nipaa hepitari God kehimitanek hirak mitik kerek kakikepai, te God keriuweta hi akiri eiriuwe tipar em, hirak ketpo, ‘Ti ahir God Himin Yaaik kakinke kaknen kakikre mitik, mitik ik kerekek kakwet mit God Himin Yaaik kaku kakreri.’ <sup>34</sup>Hi epei hirek, te hi etpi hirak Nikan ke God.”

### Jisas keithis mitikit disaipel tekyaaait (4)

<sup>35</sup>Teipmen, itai kai Jon wen kepeit mani Jodan ketike mitikit disaipel wiketeret. <sup>36</sup>Hirak kir Jisas kan ken te hirak katip, “Mitik ik hirak Sipsip ke God. Hirak keriuwetek kan kaki kakikaap haiu mit.” <sup>37</sup>Mitikit wik temtau Jon katip kar ik, te hirakit tises Jisas ten tetikerek. <sup>38</sup>Jisas keweikin kiret tisesik, te hirak kitiwekithi, “Yi yayir mekam?” Hirakit tetpiwek, “Rabai, ti hau heit nein?” (Haiu meweikin him Rabai hiram matip Mitik Iuwe tisa.) <sup>39</sup>Hirak katip, “Einen eiyirem.” Te hirakit tetikerek tariyakit ten tir wit kerek hirak kewiyen, te hirakit ten en tetikerek ere witaan (Hiram epei hinkewi te hirakit tetpiwek menmen im.)

---

<sup>s</sup> 1:25 Mt 21:25; Jo 1:33    <sup>t</sup> 1:27 Jo 1:15; Ap 13:25    <sup>u</sup> 1:28 Mt 3:6; Jo 10:40    <sup>v</sup> 1:29 Jo 1:36; Ais 53:6-7; 1Pi 1:18-19    <sup>w</sup> 1:30 Jo 1:15    <sup>x</sup> 1:32 Mt 3:16    <sup>y</sup> 1:33 Lu 3:2-3    <sup>z</sup> 1:34 Mt 3:17, 17:5, 27:54    <sup>a</sup> 1:36 Jo 1:29

<sup>40</sup><sup>b</sup>Mitik hak niuk mirak Endru hirak nikik ke Saimon Pita hirak mitik kiutip ke mitikit wiketeret hirak kemtau him me Jon te hirak kises Jisas. <sup>41</sup><sup>c</sup>Wasenum, mitik Endru kinaaiwir Jisas ken kinapin heiyiwe kirak Saimon, hirak ketpiwek, “Hawir epei winapin Mitik Iuwe Mesaia.” (Hau meweikin him Mesaia hau matip Krai, Mitik kerek God kehimitanek kakikaap hau mit.) <sup>42</sup><sup>d</sup>Hirak ketpiwek epei au, Endru keithis Saimon keyiyik ken kir Jisas. Jisas kirek, hirak ketpiwek, “Ti Saimon nikan ke Jon. In ek hi eweikin niuk mit mamre Sifas.” (Hau meweikin him hiram matip, “Pita” o “Nan”).

### Jisas kenine Filip ketike Nataniel hirakit tisesik

<sup>43</sup><sup>e</sup>Wi ham Jisas kekrit kakno provins Galili. Hirak han kitet kakno en te hirak kinapin mitik Filip ketpiwek kar ik: “Ti enen eisisa!” <sup>44</sup> Filip hirak ke wit Betsaida, wit ke Endru ketike Pita. <sup>45</sup><sup>f</sup>Te Filip kinapin Nataniel hirak ketpiwek, “Hau epei minapin mitik kerek nipaa Moses kewisim mau tiwei mirak, hirak ketike mit profet newisim mau tiwei. Hau epei minapinek, hirak Jisas, nikan ke Josep ke Nasaret.”

<sup>46</sup><sup>g</sup>Nataniel ketpiwek, “Menmen mei miutip yaaim ap te mamike Nasaret mamnen auye!” Filip kewenhi ketpiwek kar ik: “Ti eno ehirek.”

<sup>47</sup><sup>h</sup>Jisas kir Nataniel kan kakirek, hirak katip, “Eiyirek. Hirak mitik ke Isrel ap kempin au.”

<sup>48</sup> Nataniel ketpiwek, “Ti harkeik te ti herteiya?” Jisas ketpiwek, “Filip keninut wen au, hi hirit kerek ti hau hinik nu fik ek.”

<sup>49</sup><sup>i</sup>Nataniel ketpiwek kar ik: “Ti Mitik Iuwe, ti Nikan ke God kerekek. Ti Mitik Iuwe ehinin naanmamrai hau mit ne Isrel.”

<sup>50</sup> Jisas ketpiwek, “Hi hetput hi hirit hau hinik nu fik te me menmen in ti han kiteta hi Mitik Iuwe a? Hi hetput maain ti ehir menmen iuwe minin menmen im em.” <sup>51</sup><sup>j</sup>Te Jisas ketpor, “Hi hetpi werek. Yi maain yayir wit ke God kakwep te yi eiyir mit ensel ne God naniniu nanikiuwe nanintar hi Mitik ke wit ke Mitik Iuwe.”

### Mitik hak keit mite te Jisas keweikin tipar weinim hiram mire wain

**2** <sup>1</sup><sup>k</sup>Wi wikak epei men, mitik ketike mite nanitan nanit wit Kena keit provins Galili. Jisas miye pirak hire wepeit en. <sup>2</sup> Te Jisas ketike mit disaipel narak natip nanino naniri nanitan. <sup>3</sup><sup>l</sup>Maain hir naam tipar wain mir epei au, Jisas miye wetpiwek war ik: “Hir naam tipar wain epei au mesi.”

<sup>b</sup> 1:40 Mt 4:18-20   <sup>c</sup> 1:41 1Sm 2:10; Sam 2:2; Jo 4:25   <sup>d</sup> 1:42 Mt 16:18; Mk 3:16

<sup>e</sup> 1:43 Mt 8:22; Mk 2:14   <sup>f</sup> 1:45 Diu 18:18; Ais 7:14, 9:6; Jer 23:5; Esi 34:23   <sup>g</sup> 1:46 Jo 7:41, 52   <sup>h</sup> 1:47 Sam 32:2   <sup>i</sup> 1:49 Mt 14:33, 16:16, 27:42; Mk 3:11; Jo 12:13   <sup>j</sup> 1:51 Jen 28:12   <sup>k</sup> 2:1 Jo 1:43   <sup>l</sup> 2:3 Jo 19:26

<sup>4</sup> Jisas ketpiwe, “Ti ap etpo menmen hi ehisesim. Hiram ap menmen mit. Au, hiram menmen mai. Wi ap man wen au te hi hewepyapir hirekes hi keimin.”

<sup>5</sup> Te Jisas miye pirak watip mit kerek niriak menmen me mit en, “Yi iriak menmen eiyises him mirak kerek hirak ketpi ek.”

<sup>6</sup> Mit ne Isrel newis him lo mau tiwei matip hir naninin nankemyet his te hir nanim menmen. Me menmen im hir newis min iuwe mar hispinak kiutip (6) (hiram mire heurek nun) hiram mepu. Hiram iuwe te mamtenen tipar yapirwe (Mar ke heurek hiswiyen hiswiyen hiswiyen (30). <sup>7</sup> Te Jisas katip mit en, “Yi eiwen tipar emikre min.” Te hir newen tipar mekrerem ere mau him. <sup>8</sup> Epei au, hirak ketpor, “Yi eiwen tipar mei eiyim eino eiwet mitik naanmipre menmen me neitan em.” Hirak katip epei au, hir neiyim nen newet mitik ek em. <sup>9</sup> Hir neiyim nen newetiwekem, hirak kaam tipar mei kike kerek Jisas keweikinhis em mire tipar wain, hirak kepitari mit neit tipar wain im neit nein. (Te mit kerek nimian (o ninim) tipar im em hir nerteiyem.) Te hirak kenine mitik kerek keit mite ep hirak ketpiwek kar ik: <sup>10</sup> “Mit yapirwe newet mit tipar wain yaaim, hir ninin nanim, te maain hir netaritari, hir newetir tipar yaaim kike. Te ti au! Ti etenen tipar wain yaaim ti ewet mit em emakaru.”

<sup>11</sup> Menmen im hiram menmen iuwe Jisas kinin kiriakem. Hirak kiriakem keit Kena hirak wit kike ke provins Galili. Ik ek keteikin haiu mit disaipel nirak menmen iuwe God kewetiwekem, te haiu han kitet hirak Mitik God keruiwetek kan kakikepai haiu mit.

<sup>12</sup> Epei au, Jisas ketike miye pirak kikrek tirak netike mit disaipel nirak nen wit Kapaneam nau en wi ham.

**Jisas kepir mit nesiuwe menmen neit pewek neit winak iuwe ke God keit Jerusalem**

*(Mt 21:12-13; Mk 11:15-19; Lu 19:45-46)*

<sup>13</sup> Wi Pasova menep mamnen te mit ne Isrel han tewenin nipaa God kenep mit ne Isip, te maamrer nir au. Me wi im Jisas ken wit iuwe Jerusalem. <sup>14</sup> Hirak ken kekere winak iuwe ke God, hirak kir mit kerek nesiuwe bulmakau metike sipsip, hore nimanp nanit pewek mamrerim. Hirak kir mit in netike mit han nau yeno hir neit pewek me mit nerer wit wit newetir pewek ham yaaim me Isrel. <sup>15</sup> Hirak kir menmen im, Jisas keit waai kiriakek kire nipin kiwaaiyek kenep sipsip bulmakau. Mit nau yeno netenen pewek hirak kepiri nen witeik. Hirak kepiri nen wit eik, hirak kenke kinaan keit pewek mir kewirem mesikenik miwaai

---

<sup>m</sup> 2:4 Jo 7:30, 8:20    <sup>n</sup> 2:6 Mk 7:3-4    <sup>o</sup> 2:11 Jo 1:14, 4:54, 11:40; Lu 9:32    <sup>p</sup> 2:12 Mt 4:13  
<sup>q</sup> 2:13 Eks 12:1-17; Jo 6:4, 11:55

ti. <sup>16</sup>Hirak katip mit kerek nesiuwe hore kar ik: “Yi eikinim eiyim einowit eik. Hi hinapen yi yiriak winak ke Haai kai enuk kire winak maket mit neiyik neisuwe menmen neitak.” <sup>17</sup><sup>s</sup>Haiu mit disaipel nirak han kitet him nipaa haiu mekinaam mau tiwei me God hiram matip mar im: “Hi hanhan iuwe me naanmamprut winak kit kaku werek werek.”

<sup>18</sup>Hirak kiriak menmen im epei au, hir mit iuwe ne kaunsil ke Isrel nan netpiwek, “Ti eriak menmen iuwe manmen emteikin God kewisit te ti han hepír menmen im meit winak iuwe kirak ik ek.”

<sup>19</sup><sup>u</sup>Jisas ketpor kar ik: “Yi yaiwen winak ke God ik ek, te wi wikak hi pike eimaak.”

<sup>20</sup>Hir pike netpiwek, “Me 46 tito mit nime winak iuwe ke God ik ek. Te ti hatip ti pike eimaak me wi wikak keremem a? Taaue!”

<sup>21</sup><sup>v</sup>Jisas ap katip me winak ke God. Au, hirak katip me yink kirak. <sup>22</sup><sup>w</sup>Te maain mit nenep Jisas kaki, God kikiak hirak kekrit kepu, haiu mit disaipel nirak meket han him nipaa hirak ketpim, te haiu mises him nipaa God kewisim mau tiwei. Hiram metike him me Jisas.

### Jisas kertei han ke mit yapirwe

<sup>23</sup><sup>x</sup>Jisas wen kepu Jeusalem me wi Pasova, wi kerek mit han tewenin God kenep mit ne Isrel au, mit ne Isip keriyen. Me wi im mit yapirwe nisesik nentar menmen yaaim iuwe hir nirek hirak kiriakem. <sup>24</sup>Te Jisas ap kemtau him hir netpiwekem kisesim au. Hirak ap kewisi hir nehimitanek mitik iuwe king kir naanmipri au, kentar hirak kertei menmen mit ne ti hir hanhanem. <sup>25</sup><sup>y</sup>Hirak epei kertei werek werek menmen mekre han ke mit ne ti ap mitik hak te kakininek kertei han ke mit te hirak ketpiwekem au.

### Jisas ketike Nikodimas tewepnak

**3** <sup>1</sup><sup>z</sup>Mitik niuk mirak Nikodimas kepu. Hirak mitik hak ke mit ne Farisi kerek hir ninin nises him me Moses. Hirak mitik iuwe hak ke mit kerek ninin naanmipre mit ne Isrel. <sup>2</sup><sup>a</sup>Witaan ham hirak kan kir Jisas ketpiwek kar ik: “Mitik luwe, haiu mertei God keriuwetit ti han ti heteiknai menmen. God kekepit ti hiriak menmen. Mit neiyen ap te nanriak menmen iuwe mamir ke ti hiriakem taau!” <sup>3</sup><sup>b</sup>Jisas ketpiwek kar ik: “Hi hetput him im em hiram yaaim. Mitik ap kakweikin yaaik kakir ke nikan miye winaak ek, hirak ap te kaku kaktike God taau!”

<sup>4</sup>Nikodimas kitiwekhi kar ik: “Markeik te mitik nepei enuk ke mitik hirak pike kakre mitik pipiak. Hirak pike kaku kakikre tu ke miye pirak te hire pike wawinaak?”

<sup>r</sup> 2:16 Lu 2:49   <sup>s</sup> 2:17 Sam 69:9   <sup>t</sup> 2:18 Mt 21:23   <sup>u</sup> 2:19 Mt 26:61, 27:40; Ap 6:14  
<sup>v</sup> 2:21 1Ko 6:19   <sup>w</sup> 2:22 Jo 12:16, 14:26   <sup>x</sup> 2:23 Jo 7:31   <sup>y</sup> 2:25 Mk 2:8   <sup>z</sup> 3:1 Jo 7:50, 19:39   <sup>a</sup> 3:2 Mt 22:16; Jo 9:16   <sup>b</sup> 3:3 Mt 18:3; 1Pi 1:23

<sup>5</sup>c Jisas kewenhi ketpiwek kar ik: “God ap te kakinin naanmampre mit ere mit han nankiri nanriuwe tipar, God Himin Yaaik kakriak himin kir hirak yaaik. <sup>6</sup>d Mitik kerek miye winaak, hirak kire mitik kerekek. Mitik God Himin Yaaik kakriakek himin kirak hirak yaaik, hirak kire God. <sup>7</sup>Ti ap han kekrit epipir entar him im hi hetputem me yi yapirwe God Himin Yaaik ekrekyi himin ki hirak kakre yaaik. <sup>8</sup>e Nime miniu mepno in mepno ein. Yi yemtau hiram matip, te yi ap yertei hiram meke nein man, te mamno nein. God Himin Yaaik hirak kire nime. Haiu mepitari karkeik hirak kiriak menmen kikaap mit au.”

<sup>9</sup>Nikodimas kitiwekhi kar ik: “Mamirkeik te menmen im em manmen?”

<sup>10</sup>Jisas ketpiwek, “Ti mitik iuwe tisa ti hertei menmen yapirwe hinin mit ne Isrel, te ti ap hertei menmen im au a? Menmen mit! <sup>11</sup>f Hi hetput werek. Haiu matip menmen haiu epei merteiyem, haiu matip menmen haiu epei mirem. Te yi yeweikin sip yewet menmen haiu metpiyem. <sup>12</sup>g Hi nepei hetpi menmen me ti im e te yi ap han kiketim yisesim au. Te hi hetpi me menmen me wit ke God, mamirkeik te yi yayimtau menmen hi etpiyem me wit ke God yi yayisesim a? Taauye! <sup>13</sup>h Mitik keyiak ap nipaa ken wit ke God heven au. Hi Mitik ke wit ke Mitik luwe kerekek, hi hinaaiwir wit kirak hekiuwe han ti ik e. <sup>14</sup>i Nipaa Moses kikiak manpen kau niu keit wit weinik mit ap newi. Mar im, mit nanwenkika hi Mitik ke wit ke Mitik luwe nanwisa antar nu tentarakit. <sup>15</sup>j Te mit yapirwe kerek nises God, hir nanu nantikerek tipmain tipmain enum eik.

<sup>16</sup>k “God hanhan mit ne ti ik iuwe te hirak keriuwet nikan kirak kiutip kerekek kan ti ik. Te neimin kerek nanisesik, hir ap nani au. Hir nanu nanit nantike God tipmain tipmain enum eik. <sup>17</sup>l God ap kesiuwe hi Nikan kirak hi han ti ik skelim mit au. Hi han hahi akaap mit ne ti ik. <sup>18</sup>m Neimin nisisa hi Nikan ke God ap te God skelim hir nanino si au. Te neimin kerek ap nisisa hi Nikan ke God eh, hirak God epei skelim mit in nentar hir ap han kitet he Nikan kiutip kerekek kirak ahisak menmen enum hir niriakem. <sup>19</sup>n God skelim mit kakir ik. Him mai yaaim mire wepni kir, hi han ti ik heteikin mit menmen me God. Te hir hanhan menmen enum me ti hiram mire witaan toto. Menmen yaaim em me God au. Hir hanhan menmen enum me ti nentar hir niriak menmen enum enum. <sup>20</sup>o Neimin hir niriak menmen enum hir nire mit enun nepan ne menmen yaaim me God. Te hir ap naninen nanises hi Nikan ke God nanintar hir ninapen hi ewepyapir menmen enum hir niriakem. <sup>21</sup>p Te

<sup>c</sup> 3:5 Esi 36:25, 27; Ta 3:5    <sup>d</sup> 3:6 Sam 51:5; Jo 1:13    <sup>e</sup> 3:8 Ekl 11:5    <sup>f</sup> 3:11 Jo 3:32, 8:26  
<sup>g</sup> 3:12 Lu 22:67    <sup>h</sup> 3:13 Pro 30:4; Ro 10:6    <sup>i</sup> 3:14 Nam 21:9; Jo 8:28, 12:32    <sup>j</sup> 3:15 Jo 20:31    <sup>k</sup> 3:16 Ro 5:8, 8:32; 1Jo 4:9-10; Jo 3:36, 10:28    <sup>l</sup> 3:17 Lu 19:10; Jo 5:22, 12:47; Ap 17:31    <sup>m</sup> 3:18 Jo 3:36, 5:24    <sup>n</sup> 3:19 Jo 1:5, 9, 8:12    <sup>o</sup> 3:20 Ef 5:11-13

neimin hir hanhan nanriak menmen yaaim, hir naninen hi Nikan ke God kerek him mai yaaim hiram mire wepni te hir nanteikin mit yapirwe hir niriak menmen yaaim God katip hir enriakem.”

### Jon kewepyapir Jisas hirak keimin

<sup>22p</sup>Jisas katip Nikodimas epei au, Jisas ketike mit disaipel nirak ninaaiwir Jerusalem nen wit hak kike ke Judia. Hirak kau en ketikeri wi ham, hir nikir mit miyapir neriuwe tipar. <sup>23</sup>Jon hirak kikir mit neriuwe tipar menep ti niuk mirak Inon, hirak menep wit Selim. Hirak kikir mit in kentar tipar yapirwe meitai. Mit nen nanirek te hirak kikiri. <sup>24q</sup>(Mitik iuwe King Herot ap kewis Jon kekere winak enuk ke gavman wen au.)

<sup>25</sup>Mit disaipel han ne Jon netike mitik hak ke Isrel hir nenehan nentar menmen me nikir mit neriuwe tipar nises him mit ne Isrel nipaa nisesim. <sup>26r</sup>Te hir nen Jon nitiwekhi nar ik: “Mitik luwe, ti han kitet mitik kerek nipaa ketikewit yeit mani Jodan yeit pinak eik, kerek ti hatip him mirak em? Hirak epei kikir in ek, te mit yapirwe nanino nanirek.”

<sup>27s</sup>Jon ketpor, “God keit wit kirak Heven ap keriuwet mitik kiutip menmen hirak ap kaktiwem au. <sup>28t</sup>Yi hiras yertei him mai kerek nipaa hi hetpim. Hi hatip har ik: ‘Hi ap Krais au. God keriuweta te hi hinin han hewepyapirek.’ <sup>29u</sup>Mitik kerek kakit mite hire mite pirak. Jisas hirak kire mitik ik. Mit nises him mirak hir nire mite pirak. Mitik kerek wariyakit kirak kemtewek hirak kaknen ketpiwek menmen, hirak han yaaik kar ke in ek hi han yaaik iuwe. Te hi ap yink enuk hentar mit yapirwe nisesik au. In ek hi han yaaik iuwe. <sup>30v</sup>Hirak kakre Mitik luwe keit niuk iuwe, te hi au hi hire mitik weinik.”

<sup>31w</sup>Jisas kerek keke wit ke God kan ti ik hirak kinin mit. Keimin hirak ke ti ik hirak mitik kerekek, hirak han kitet menmen me ti ik. Hirak kerek ke wit ke God hirak hirak kinin menmen yapirwe. <sup>32x</sup>Hirak kewepyapir him me menmen hirak epei kirem, menmen hirak apei kemtewem. Hirak kewepyapirem katip mit em te mitik keiyak ap kemtewem kisesim au. <sup>33y</sup>Mitik kerek hirak kemtau kises him mirak hirak keteikin mit han God hirak katip him yaaim. <sup>34z</sup>Mitik kerek God keriuwetek hirak kakwepyapir him me God kentar hirak kewetiwek Himin kirak Yaaik keneises han kirak kekepek kiriakem. <sup>35aa</sup>God Haai hanhan Nikan kirak, te hirak kewetiwek menmen yapirwe meit his mirak. <sup>36ab</sup>Neimin nises nikan ke God nanit himin yaaik kaku kakit tipmain tipmain enum eik. Neimin neweikin sip newet him me nikan ke God, hir ap te nanu nanit au. God han enuk kakriuweri.

<sup>p</sup> 3:22 Jo 4:1-2    <sup>q</sup> 3:24 Mt 4:12    <sup>r</sup> 3:26 Jo 1:26-34    <sup>s</sup> 3:27 Jo 19:11, 1Ko 4:7, Hi 5:4  
<sup>t</sup> 3:28 Jo 1:20, 23; Mt 11:10    <sup>u</sup> 3:29 Mt 9:15    <sup>v</sup> 3:31 Jo 8:23; 1Jo 4:5    <sup>w</sup> 3:32 Jo 3:11  
<sup>x</sup> 3:34 Jo 1:32; Ap 10:38    <sup>y</sup> 3:35 Mt 11:27; Jo 5:20, 10:17    <sup>z</sup> 3:36 Jo 3:16-18; 1Jo 5:12; Lu 3:7



**Jisas ketike mite pe Sameria hir newepnak**

**4** <sup>1a</sup>Me wi im mit ne Farisi kerek ninin nises him me Moses nemtau him ham mar im: “Jisas keithis mit yapirwe te hirak kikiri ninin Jon.” <sup>2</sup>Te Jisas hirekes ap kikir mit au. Hir mit disaipel nirak keriyen nikiri. <sup>3</sup>Jisas kertei menmen mit ne Farisi hir nemtewem, te hirak kinaaiwir provins Judia hirak pike kepno provins Galili. <sup>4b</sup>Te yayiwe hirak kitetik ek ken kerekir provins Sameria.

<sup>5c</sup>Te hirak ken wit hak iuwe ke Sameria niuk mirak Saika. Wit ik hirak menep ti me ni kerek nipaa enum eik Jekop epei kewet nikan kirak Josep em. <sup>6</sup>Hei ke mit hir nanmian tipar keit in kerek nipaa maam ke Isrel hirak kekinik. Jisas hit mekek te hirak kau menep hei kerekek. Wepni nepei kan kau niminiuwe. <sup>7</sup>Jisas kau en, mite hap pe Sameria wan waumian tipar. Te Jisas kitiwehi, “Ti eweto tipar mei ehim.” <sup>8</sup>(Hir mit disaipel ne Jisas epei nen wit eik nanwir pewek nanit menmen me hir nanim.) <sup>9d</sup>Mite pe Sameria wewenhi watip, “Ti mitik ke Isrel, hi mite pe Sameria. Kenmak te ti hitauhi tipar te ti ehim a?” (Mit ne Isrel ap te nanit menmen me Sameria mire tikenup wenkepye kerek naam menmen nekrem em au. Hir han kitet God kaktip hir enun naninterim.)

<sup>10e</sup>Jisas ketpiwe, “Ti ertei werek menmen God kakweti yi mit em, ti hertei hi keimin hi hituthi, ‘Ti eweto tipar mei ehim’, te ti etpo, ‘Ti eweto tipar mei yaaim mamu mamit tipmain tipmain enum eik.’” <sup>11</sup>Mite watip war ik, “Mitik luwe, ti ap heit menmen me tipar. Hei ke tipar ik hirak kesikekre. Te ti ehit tipar yaaim mamkaap haiu mit mamu werek tipmain tipmain enum eik ehit nein?” <sup>12f</sup>Nipaa maam nipu kaiu Jekop kewetei hei ik. Hirak nipaa ketike nikerek, sipsip, bulmakau mirak, hir naam tipar im em. Ti are iuwe hinin maam kaiu Jekop?” <sup>13</sup>Jisas kewenhi katip, “Mit yapirwe nanim tipar im em maain hir pike him niu enuk (o mar kakwenkikor him) nanim tipar meiyam. <sup>14g</sup>Te neimin nanim tipar kerek hi ewetirem, maain hir ap te hir pike him niu enuk (o mar kakwenkikor him) au. Tipar kerek hi ewetirem hiram mamre tipar mamikre han kir mamu mamit mamkaap mit nanu werek werek tipmain tipmain enum eik.”

<sup>15</sup>Hire pike witiwekhi war ik: “Mitik luwe, ti eweto tipar mei im em. Te hi ap pike him niu enuk (o mar kakwenkikor him) au. Te maain hi ap pike anen in amian tipar mei au.”

<sup>16</sup>Jisas ketpiwe, “Ti eno enine mitik kit te ti pike enen in.”

<sup>17</sup>Mite watip, “Hi ap heit mitik au.” Jisas ketpiwe, “Ti hatip ti mitik au. Ti atip werek. <sup>18</sup>Nipaa ti heit mikaan nar hispinak (5). In ek mitik ti hau hetikerek hirak ap mitik kit. Ti epei hatip werek.”

<sup>a</sup> 4:1 Jo 3:22, 26 <sup>b</sup> 4:4 Lu 9:52 <sup>c</sup> 4:5 Jen 33:19; Jos 24:32 <sup>d</sup> 4:9 Esr 4:1-5, 9:1-10:44; Lu 9:52-53 <sup>e</sup> 4:10 Jo 4:26, 7:37-38; Rev 21:6 <sup>f</sup> 4:12 Jo 8:53 <sup>g</sup> 4:14 Jo 6:35

<sup>19</sup><sup>h</sup>Hire wetpiwek, “Mitik Iuwe, hi hertei ti hire mitik profet.  
<sup>20</sup><sup>i</sup>Maamrer nai ne Sameria nises God newenipiyek neit miniu (o neiyip)  
 ik ek. Te haiu emwenipi God emeitak. Te yi mit ne Isrel yatip wit iuwe  
 Jerusalem hirak yaaik kerekek. Wit hak au.”

<sup>21</sup>Jisas ketpiwe, “Mite, ti ehises him mai. Maain wi ham mamnen te yi  
 mit ne ti yaiwenipi niuk me Haai kai yayit miniu (o neiyip) ik au, o yayit  
 wit iuwe Jerusalem au.”

<sup>22</sup><sup>j</sup>Jisas ketpiwe, “Yi mit ne Sameria ap yertei werek keimin yi yisesik  
 yewenipiyek. Haiu mit ne Isrel mertei werek keimin haiu misesik  
 mewenipiyek. Menmen God hirak kiriakem keithis mit miyapir hir  
 nisesik, hirak kewetaiyem. <sup>23</sup>Wi epei mamnen menep te mit kerek hir  
 yaain nises God Haai, hir nanwenipiyek neriuwe han kir. Te mit nar ik  
 God Haai hanhan hir enisesik enwenipiyek. <sup>24</sup><sup>k</sup>God hirak Himin Yaaik  
 kerekek. Hir mit hir newenipi niuk mirak, hir enises menmen yaaim  
 enwenipiyek enriuwe himin kir yaaik.”

<sup>25</sup><sup>l</sup>Te mite wetpiwek, “Hi hertei maain mitik Mesaia kerek God  
 kehimitanek kaknen, hir mit nenewek Krai, maain hirak kaknen hirak  
 kakitpai menmen yapirwe.”

<sup>26</sup><sup>m</sup>Jisas ketpiwe kar ik: “Hi kerekek hi atip etikewit hi Krai.”

<sup>27</sup>Hirak katip kar ek, hir mit disaipel nirak hir nirek katip ketike mite  
 hap, hir han kitet yapirwe. Te in ek mitik keiyak ap kitiwehi kar ik: “Ti  
 ehit mekam?” O hir nitiwekhi, “Kenmak te ti hatip hetikerep?”

<sup>28</sup>Hire winaaiwir heurek ke tipar mire, hire pike wen wit iuwe eik,  
 te hire wen watip mit yapirwe. <sup>29</sup>Hire wetpor, “Yi einen eiyir mitik ik.  
 Hirak ketpo menmen yapirwe kerek hi nipaa hiriakem. Hirak mitik  
 Mesaia kerek God kehimitanek kakikaap haiu mit?” <sup>30</sup>Hire wetpor, te hir  
 ninaaiwir wit ek nen nanir Jisas.

<sup>31</sup>Mite wen wit kire eik, mit disaipel natip Jisas, “Mitik Iuwe, ti ehim  
 menmen.”

<sup>32</sup>Te Jisas ketpor, “Hi menmen mai yi ap yerteiyem hi hahim.”

<sup>33</sup>Mit disaipel nirak hiras natip nar ik: “Mitik keiyak ketiwek menmen  
 keyim kan o?”

<sup>34</sup><sup>n</sup>Jisas ketpor, “Menmen mai mar im: Hi hises him me Haai hirak nipaa  
 keriuweta te hi han. Hi ariak wok mirak enemtin hiram mar ke menmen hi  
 ahim.” <sup>35</sup><sup>o</sup>Yi mit yatip yar ik: “Wenke tekyaaait (4) ere wi mamnen te haiu  
 mamket menmen mau ni. Hi hetpi. Yi eiwaanaan heriyai heriyai eiyir ni  
 werek werek. Teket epei me yaaim te yi eiketim mamnen. <sup>36</sup>Mitik hirak  
 kerek epei keit menmen, hirak keit pewek hiram mamu werek. Hiram mar

<sup>h</sup> 4:19 Jo 7:40, 9:17; 1Ko 14:24-25    <sup>i</sup> 4:20 Diu 12:5-14; Sam 122:1-5    <sup>j</sup> 4:22 2Kin 17:29-41;  
 Ais 2:3; Ro 9:4-5    <sup>k</sup> 4:24 2Ko 3:17; Ro 12:1; Fl 3:3    <sup>l</sup> 4:25 Jo 1:41    <sup>m</sup> 4:26 Mk 14:61-62;  
 Jo 9:37    <sup>n</sup> 4:34 Jo 6:38, 17:4    <sup>o</sup> 4:35 Lu 10:2

ke hirak kari han ke mit hir enises him me God te hir enu enit tipmain tipmain enuk eik. Mitik kerek kamir ni hirak ketike mitik kerek keit menmen me ni hirakit han yaaik tekiyakit. Mit han natip mit him me God netike mit hir nari han ke mit hir nises him me God hir nire mitikit wik it. <sup>37</sup>Mar ek te him im hiram yaaim. ‘Mitik kiutip kamir menmen, maain mitik hak kakiketim.’ <sup>38</sup>Nipaa hi eriuweti yi yen yari han ke mit hir nises him me God yar ke mitik kakit menmen epei me yaaim meit ni eim. Nipaa yi ap yen yetpor menmen, te yi yikiak han kir te hir nanises him me God. Mit han keriyen niriak menmen im. Te in ek yi yikaap mit hir nanises him me God.”

<sup>39</sup>Maain mit yapirwe ne wit kike Saika ke provins Sameria nises Jisas nentar hir nemtau him me mite hire epei wetpor, “Hirak ketpo menmen yapirwe nipaa ein hi hiriakem.” <sup>40</sup>Te mit ne Sameria nan nir Jisas hir netpiwek eku ektikeri. Te hirak kau ketikeri neit wit eik wi wik.

<sup>41</sup>Mit han yapirwe hir nemtau him mirak te hir nisesik.

<sup>42</sup>Te hir natip mite, “In ek haiu memtau him mirak te haiu misesim. Haiu ap misesim mentar menmen nipaa ti etpaiyem au. Haiu hiras memtewem te haiu han kitet hirak Mitik Kraiss kerek God keriuwetek kaknen kakikaap haiu mit miyapir ne ti.”

#### Jisas kikaap nikan ke mitik iuwe ke gavman

<sup>43</sup>Wi wik epei au, Jisas kinaaiwir wit ik hirak ken Galili.

<sup>44</sup>Jisas hirekes epei katip, “Mitik profet niuk mirak iuwe meit wit kirak au.” <sup>45</sup>Te wi Jisas epei ken kiun provins Galili, mit nau en netpiwek, “Ti yaaik ti han.” Hir netpiwekem nentar hir hiras nipaa nen nir menmen me wi Pasova neit Jerusalem me wi mit nererik han tewenin God nipaa kenep mit ne Isip hir naa. Te hir epei nir menmen yaaim hirak kiriakem keit ein. <sup>46</sup>Epei au, Jisas pike ken wit Kena ke provins Galili, wit kerek nipaa hirak keweikin tipar weinim mire tipar wain. Mitik iuwe ke gavman keit Kapaneam kau in. Nikan kirak hirak kinap. <sup>47</sup>Hirak kemtau Jisas epei kinaaiwir provins Judia kan Galili, te hirak ken kirek kitiwekhi eknen ekikaap nikan kirak kinap. Nikan kirak epei menep kaki. <sup>48</sup>Jisas ketpiwek, “Yi ap yir menmen iuwe hi ariakem, te yi ap eiymtau him mai eiysesim au.”

<sup>49</sup>Mitik iuwe ke gavman ketpiwek, “Mitik Iuwe, ti esiukin, o au en, nikan kai kaki.”

<sup>50</sup>Jisas ketpiwek, “Ti eno! Nikan kit kaku werek.” Mitik ik kemtau him me Jisas kisesim te hirak kinaiwirek ken. <sup>51</sup>Hirak kepno winak kirak, mit kerek nerekyiwek menmen hir nan newenek yayiwe hir netpiwek, “Nikan kit epei kire yaaik.”

¶ 4:42 1Jo 4:14    ¶ 4:43 Jo 4:40    ¶ 4:44 Mt 13:57    § 4:45 Jo 2:23    † 4:46 Jo 2:1-11

“ 4:47 Mt 8:5-6    √ 4:48 Jo 2:18; 1Ko 1:22    \* 4:50 Mt 8:13; Mk 7:29

<sup>52</sup>Hirak kitorhi, “Kewaaï meruri nikan kai hirak kire yaaik?” Hir netpiwek, “Nepip wepni kau niminiuwe hirak yink sisi epei au meit.”  
<sup>53</sup>“Te haai kertei me nepip wepni kau niminiuwe, Jisas ketpiwek nikan kaku werek. Te hirak ketike mite nikerek nirak hir nises him me Jisas.

<sup>54</sup>Menmen im hiram menmen yaaim wik hirak kiriakem me wi hirak kinaaiwir Provins Judia ken kiun provins Galili.

**Jisas kikaap mitik hak kinap hirak kire yaaik  
 keit wan werweik ke Betesda**

**5** <sup>1</sup>Jisas kikaap nikan ke mitik iuwe epei au, wi ham kerek mit ne Isrel nererik naam menmen epei man. Te Jisas pike ken Jerusalem. <sup>2</sup>Meit Jerusalem menep wepir iuwe ke sipsip, wanwerweik iuwe kiwaaïri. Mit natip him Hibru hir nenewek Betesda. Menep wan werweik kerekek mit newep weisaak hispinak (5) te mit ninapen wepni o hawi te hir nisawin newim. <sup>3</sup>Mit miyapir yapirwe kerek hir ninap hir niwaaïri. Hir mit han nanamir toto, mit han his hit min enum, mit han his hit epei maa. <sup>4</sup>Wi ham mitik ensel ke Mitik luwe God kenke kan wan kerekek te hiram tipar mitanik. Tipar mitanik nepei au, mitik kinin kakikwe kakno kakikre tipar, hirak kakre yaaik. <sup>5</sup>Mitik kiutip kau weisaak nipaa hirak kinap ere 38 tito. <sup>6</sup>Jisas kir mitik ik kipwaaï en, hirak kertei hirak kinap kiwaaï wi yapirwe, te Jisas ketpiwek kar ik: “Ti hanhan ti pike are yaaik a?”

<sup>7</sup>Mitik ik kerek kinap hirak ketpiwek, “Mitik luwe, kerek tipar miririr, hi ap mit nei nekina newisa hekrek tipar au. Hi hirekes eno, mit han hir ninatin nan ninina.”

<sup>8</sup>“Jisas ketpiwek, “Ti ekrit ehirp ehit yeno mit eiyim eno.” <sup>9</sup>“Wasenum hirak mitik kinap ek hirak kire yaaik. Hirak keit yeno mirak keiyim ken.

Wi im hiram wi Sabat. <sup>10</sup><sup>b</sup>Mit iuwe ne Isrel nir mitik ik kemerir yeno mirak te hir nenerek netpiwek, “Petepin hiram wi Sabat. Wi im em ti ap emerir yeno mit emit!” <sup>11</sup>Hirak kewenhi ketpor, “Hirak mitik kerekya hi hire yaaik ketpo, ‘Ekin yeno mit eiyim ekrit eno.’ ”

<sup>12</sup>Hir nitiwekhi, “Keimin hirak ketput ti ekin yeno mit eiyim ekrit eno a?” <sup>13</sup>Mitik kerek Jisas kekepik ap kertei hirak keimin kentar Jisas kinaiwirek ken ek, mit yapirwe nererik neit wit eik e.

<sup>14</sup><sup>c</sup>Maain Jisas kinapinek keit winak iuwe ke God hirak ketpiwek, “Ti epei hire yaaik. Ti ap pike hanhan ehises menmen enum te menmen ham iuwe enum mamnen mamwit.” <sup>15</sup>Hirak ketpiwek epei au, mitik ik ken katip mit iuwe ne Isrel kar ik: “Mitik kerekek kerekya hi yaaik hirak Jisas.”

<sup>x</sup> 4:53 Ap 16:14-15, 31    <sup>y</sup> 4:54 Jo 2:11, 23    <sup>z</sup> 5:8 Mt 9:6    <sup>a</sup> 5:9 Jo 9:14    <sup>b</sup> 5:10 Nia 13:19; Jer 17:21; Lu 13:14    <sup>c</sup> 5:14 Jo 8:11

<sup>16</sup><sup>d</sup>Hirak ketpor Jisas kekepik te mit iuwe ne Isrel hir ninin niriak Jisas enum nentar hirak kikaap mitik enuk kinap iuwe hirak kire yaaik me wi Sabat (kerek mit niriak menmen au. Hir nau weinim.) <sup>17</sup><sup>e</sup>Hir natip Jisas enum nenerek, te hirak ketpor, “Hekrit hekrit Haai kai kiriak menmen, te hi ariakem har ke hirak kiriakem.”

<sup>18</sup><sup>f</sup>Him im kerek Jisas ketpim miriak mit iuwe ne Isrel han enuk iuwe te hir hanhan naninep Jisas kaki. Hir hanhan nankip kentar hirak kikaap mitik ke wi Sabat kerekek au. Hir han enuk nankip nanintar hirak katip God hirekes Haai kirak, te hirak kiriak hirekes iuwe kire God Haai.

### God kehimitan nikan kirak hirak iuwe kiriak menmen mirak

<sup>19</sup><sup>g</sup>Mit iuwe ne Isrel nenerek, te Jisas ketpor, “Hi etpi him yaaim! Hi Nikan ap te hi hirekes ariak menmen mei weinim me han kai au. Hi hiriak menmen mamir ke hi hir Haai kai kiriakem. Haai kai kiriak menmen, hi herteiyem te hi hiriakem. <sup>20</sup><sup>h</sup>Haai hirak hanhan keriuwa hi Nikan kirak, hirak keteikno menmen iuwe hirak kiriakem. Maain hirak kakteikno menmen iuwe minin menmen hi epei hiriakem te yi yapirwe han kakikrit kakriuwere. <sup>21</sup><sup>i</sup>Hiram mar ke Haai kikian mit kerek epei naa ek te hir pike nekrit nau, te hi nikan kirak ehises han kai awis himin yaaik kaku kakikre han ke mit kerek hi hanhan hewisik kakikre han kir. <sup>22</sup><sup>j</sup>Haai kai hirekes ap skelim mit au. Hirak kewisa hi Nikan kirak hi ekrehir kirak hi skelim mit. <sup>23</sup><sup>k</sup>Te mit yapirwe nanwenipi niuk me hi Nikan mamir ke hir newenipi niuk me Haai kai. Mit kerek ap newenipi niuk me hi Nikan, hir ap nanwenipi niuk me Haai kai kerek keriuweta hi han in.

<sup>24</sup><sup>l</sup>“Hi hetpi him yaaim. Neimin nemtau him mai hir nisesim, te hir nanises him me hirak kerek keriuweta hi han in, te hir nanit himin yaaik kaku kakit tipmain tipmain enum eik. Hi ap te skelim mit au. Hir nepei ninaaiwir menmen enum, hir neit himin yaaik nanu werek. <sup>25</sup><sup>m</sup>Hi hetpi him yaaim. Wi kerek nipaa God kehimitanem hiram epei man, te mit nipaa naa hir nanimtau him me hi Nikan ke Mitik Iuwe God. Te neimin nanimzewem, hir nanit himin yaaik nanu werek. <sup>26</sup><sup>n</sup>God Haai hirak kaki au. Hirak Haai ke menmen mamkaap menmen yapirwe mamu mamit. Te hirak keweto hi Nikan kirak menmen te hi ap hahi au. Hi hetenen menmen im te hi akaap mit miyapir te hir nanu nanit tipmain tipmain enum eik. <sup>27</sup><sup>o</sup>Hirak kewisa hi Iuwe hi skelim mit hentar hi Mitik ke wit kirak. <sup>28</sup><sup>p</sup>Yi ap han kekrit ke menmen im epei au emit. Wi mamnen te mit

<sup>d</sup> 5:16 Mt 12:14    <sup>e</sup> 5:17 Jo 9:4    <sup>f</sup> 5:18 Mt 26:4; Jo 7:1, 30, 10:30, 33    <sup>g</sup> 5:19 Jo 5:30, 8:28    <sup>h</sup> 5:20 Jo 3:35    <sup>i</sup> 5:21 Ro 4:17; Ef 2:5; Jo 11:25    <sup>j</sup> 5:22 Jo 3:17; 5:27; 9:39; Ap 10:42  
<sup>k</sup> 5:23 Fl 2:10-11; 1Jo 2:23    <sup>l</sup> 5:24 Jo 3:15-18, 8:51; 1Jo 3:14    <sup>m</sup> 5:25 Mt 8:22; Ef 2:5-6  
<sup>n</sup> 5:26 Jo 1:4    <sup>o</sup> 5:27 Jo 5:22

kerek nipaa naa mit newisi nekre hei nanimtau him me hi Nikan ke Mitik Iuwe. <sup>29</sup>*P*Te hir naninaaiwir hei, hir nanitpaan naninen witik. Neimin kerek nipaa niriak menmen yaaim e, hir nanikrit nanu nanit. Te mit nipaa niriak enum, hir nanikrit nanino si enum.

### Menmen mewepyapir Jisas hirak mitik God keriuwetek kan

<sup>30</sup>*q*“Hi ap hiriak menmen hises han kai au. Menmen hi hemtau God ketpewem te hi hisesim skelim mit ariuwere. Hi skelim mit werek werek hentar hi ap hises han kai. Hi hises han ke God kerek keriuweta te hi han ti ik e. <sup>31</sup>*r*Te hi kerek etpi menmen me hi hirekes yi han kitet hi hemipin. <sup>32</sup>*s*Mitik kiutip kepu kewepayapir him mai. Hi hertei him im hiram matip mit me hi hiram him yaaim. <sup>33</sup>*t*Yi nipaa yesiuwe mit hir nen nir Jon nitiwekhi menmen, te hirak ketpi him im me hi hiram yaaim. <sup>34</sup>*u*Hi ap han kitet yapirwe me mitik hirak kewepyapir niuk mai au. Hi hetpiyem te yi eiyirteiyem eiyises him mai te God kakikepi yi eiyu eitikerek eiyu werek werek. <sup>35</sup>*v*Jon hirak kire si keteikni yayiwe, hirak keteikni menmen me God. Me wi hirak kepu yi hanhan yisesik. <sup>36</sup>*w*Menmen ham minin him nipaa Jon ketpim me hi. Hiram im. Menmen yaaim haai kai ketpo hi hiriakem. Menmen ham nipaa hi hiriakem, hiram meteikin mit miyapir te hir nertei Haai kai God keriuweta te hi han in. <sup>37</sup>*x*Haai kerek keriuweta hi han in, hirak kewepayapir ketpi hi keimin. Te yi ap yemtau him mirak au. Yi ap nipaa yir ninaan mirak au. <sup>38</sup>*y*Him mirak ap mau mekre han ki. Yi ap yemtau him me hirak Mitik Iuwe kerek keriuweta hi han ti ik. <sup>39</sup>*z*Yi han kitet him me God mau tiwei, yi yekinaam te yi han kitet hiram mamkepi yi eiyu eitike God, God kakweti himin yaaik te yi eiyu tipmain tipmain enum eik. Te him im yi yekinaam hiram matip me hi! <sup>40</sup>*a*Te yi yinapen eiyimtau him mai te hi akepi yi eiyit himin yaaik te yi eiyu eiyit tipmain tipmain enum eik. <sup>41</sup>*b*Hi ap hanhan mit nanwenipi niuk mai nantip hi yaaik. Hiram menmen weinim. <sup>42</sup>*c*Te hi hertei yi mit yi yire mekak. Yi ap hanhan God yekre han ki au. <sup>43</sup>*d*Hi han hekrehir ke Haai kai, te yi ap yises him mai au. Mit han ne ti hir naninen netpi hir mit iuwe, yi yemtau him mir yisesim. Te yi ap yemtau him mai au! <sup>44</sup>*e*Yi mit hanhan yaiwenipiyen niuk mi, te yi yinapen Mitik Iuwe kiutip hirak God hirak kakwenipi niuk mi kakitpi yi yaain. Yi han kitet menmen im hiram weinim. Yi ap hanhan hirak kaktip yi yaain, te yayirkeik te yi hanhan eiyises him mai? <sup>45</sup>*f*Yi ap han ekitet hi esiuwi him hatip Haai kai me menmen yi yiriakem. Au, him kerek

<sup>p</sup> 5:29 Dan 12:2; Mt 16:27; Jo 6:40; Ap 24:15    <sup>q</sup> 5:30 Jo 5:19, 6:38    <sup>r</sup> 5:31 Jo 8:13-14  
<sup>s</sup> 5:32 Jo 5:36-37; 1Jo 5:9    <sup>t</sup> 5:34 Jo 1:19-34, 3:27-30    <sup>u</sup> 5:36 Jo 3:2, 10:25, 38; 14:11  
<sup>v</sup> 5:37 Mt 3:17; Jo 5:32, 8:18    <sup>w</sup> 5:38 Jo 6:29    <sup>x</sup> 5:39 Lu 24:27, 44; Ap 13:27; 2Ti 3:15-17;  
1Pi 1:10-11    <sup>y</sup> 5:43 Mt 24:5    <sup>z</sup> 5:44 Jo 12:43    <sup>a</sup> 5:45 Diu 31:26-27

Moses kewisim mau tiwei kerek yi yekinaam han kitet hiram mamkepi te God kaktip yi yaain, hiram mamsiuwi him. <sup>46</sup> <sup>b</sup>Yi yises him me Moses werek werek, te yi eyises him mai yentar hirak kewis him me hi. <sup>47</sup> <sup>c</sup>Te yi ap yises him Moses kewisim mau tiwei, te yi ap eyises menmen hi hetpiyem au!”

**Jisas kewet mit yapirwe nar 5,000 menmen hir naam**

(Mt 14:13-21; Mk 6:30-44; Lu 9:10-17)

**6** <sup>1</sup> Jisas ketpor menmen im epei au, hirak ken kerekir wan iuwe ke Galili (kerek mit nenewek niuk ham Wan ke Taibrias). <sup>2</sup> Mit yapirwe nises Jisas nentar hir nipaa nir menmen iuwe hirak kiriakem kikaap mit ninaap. Mar ik te hir nisesik. <sup>3</sup> Jisas ken kiniu miniu wank ken kau ketike mit disaipel nirak. <sup>4</sup> <sup>d</sup>Wi Pasova man menep. Hiram wi kerek mit ne Isrel nererik naam menmen han tewenin wi nipaa God kenep mit ne Isip, kikaap mit ne Isrel. <sup>5</sup> Jisas kerenaan kir mit miyapir yapirwe nan nirek. Te hirak katip Filip, “Hiau mamit niu o bret mamit nein te hiau mamwet mit miyapir em hir nanim?” <sup>6</sup> (Jisas katip mitik Filip him im em te hirak kakri han kirak kakises mekam. Jisas epei kertei menmen hirekes kakriakem.)

<sup>7</sup> Filip kewenhi ketpiwek kar ik: “Hiau mewir 200 kina mamit niu o bret meriuwerem hiram ap werek te mit in nanim kike kike au.”

<sup>8</sup> Disaipel ke Jisas niuk mirak Endru, hirak nikik ke Saimon Pita hirak katip Jisas kar ik: <sup>9</sup> “Mitik pipiak ik e keit bret bali mar hispinak (5) metike saauk wik. Te hiram ap iuwe me mit yapirwe nar ik.”

<sup>10</sup> Jisas ketpor, “Yi eiwen mit miyapir enu ti. Yenkis yapirwe meit in.” Te mit 5,000 hir yapirwe keriyen nererik nau yenkis keremem nau ti.

<sup>11</sup> Hir nau ti epei au, te Jisas keit bret keiyim kitehi God, te hirak kewenem keketim kewet mit nirak em hir newet mit miyapir em. Epei au, hirak keit saauk kewepim kewetirem kar ke nepei ein hirak kewetir bret bali, te hirak kewet mit menmen mar ke hir hanhanem. <sup>12</sup> Hir epei naam tu iuwe, Jisas katip mit disaipel nirak kar ik: “Eikinen yinam yinam mit ap naam. Hi hinapen hir nanwisim mamu ti. Yi ap eiwis mei kike mamu au.” <sup>13</sup> Hirak katip epei au, hir nekoririm (o nekurerim) ere epei au mesi, te hir nemi mekre tanik mar hiswiyen wik (12) meke bret hispinak (5) nipaa Jisas ketiwem kewet mit em hir naam. <sup>14</sup> <sup>e</sup>Mit miyapir nir menmen yaaim Jisas kiriakem te hir natip, “Hiram him yaaim. Mitik ik hirak profet ik ek kaknen ti.” <sup>15</sup> <sup>f</sup>Jisas kertei hir hanhan nantenenik nanihimitanek hirak mitik iuwe king kir hirak kaku kakinin naanmipror. Te hirak kinaiwiri hirak kerekek pike ken miniu (o neiyip) eik.

<sup>b</sup> 5:46 Diu 18:15; Ap 3:22    <sup>c</sup> 5:47 Lu 16:31    <sup>d</sup> 6:4 Jo 2:13    <sup>e</sup> 6:14 Diu 18:15; Jo 5:46  
<sup>f</sup> 6:15 Jo 18:36; Mt 14:23

**Jisas ken kitet wan keke niu**  
(Mt 14:22-23; Mk 6:45-52)

<sup>16</sup>Me hinkewi disaipel ne Jisas hir nekiuwe nen wan eik.

<sup>17</sup>Hir nehin ninu nekre bot newik nerekir wan nanino pinak ein. Hir nen Kapaneam. Nepei au witaan, te Jisas ap kan kiunor wen au. <sup>18</sup>In ek nime iuwe miniu te wan kewenin iuwe.

<sup>19</sup>Hir neit niu mirak neiyik nari wan ere 5 o 6 kilomita nau nimin, hir nir Jisas kitet wan kitet tipar keke niu ken menep bot. Hir nirek te hir ninaain. <sup>20</sup>Te Jisas ketpor, “Hi kerekek han. Yi ap einaain.” <sup>21</sup>Hirak ketpor te hir han yaaik netiwekhis kiniu ketikeri nekre bot. Te wasenum bot kepno menep wit hir hanhan naninori.

**Hir mit miyapir ninatin Jisas**

<sup>22</sup>Hekrit eik, mit miyapir hir wen nepeit wan pinak eik, hir nertei nepip bot ap keiyak kepu au. Kiutip kerekek kepu, Jisas ap kau ketike disaipel au. Hir disaipel keriyen nekre bot ik ek te hir nen. <sup>23</sup>Te bot ham me Taibirias man menep wit kerek Jisas kewetir bret hir naam newi. <sup>24</sup>Mit yapirwe nir Jisas hirak ap ketike mit disaipel ap nau, te hir nehin nekre bot hak, hir nen Kapaneam ninetniwek.

**Jisas hirak kire bret yaaik kikaap mit hir nanu werek**

<sup>25</sup>Maain mit ninapin Jisas keit wan pinak ein epei au, hir netpiwek, “Mitik Iuwe, hewaai meruri te ti han in a?”

<sup>26</sup><sup>h</sup>Jisas kewenhi ketpor, “Hi hetpi werek. Yi yinyetno yentar yi epei yaak bret ere tu iuwe. Yi ap han kitet menmen yaaim iuwe hi hiriakem au. <sup>27</sup><sup>i</sup>Yi ap hanhan yayit menmen me yayim keremem hiram mamawaank au ekit! Yi hanhan eyit menmen yaaim hiram mire menmen me yi eyim, hiram mamkepi te yi yayit himin yaaik ke kaku kakit tipmain tipmain enum eik. Menmen im hi Mitik ke wit ke Mitik Iuwe awetiyem hentar God Haai kiriak menmen keteikin mit hirak keriuweta hi hiriak menmen mirak.”

<sup>28</sup>Hirak ketpor him im, te hir nitiwekhi natip nar ik: “Haiu emriak mekam te haiu emriak menmen God han yaaik keriuwerem?”

<sup>29</sup><sup>j</sup>Jisas kewenhi ketpor, “Menmen yi yiriakem God han yaaik keriuwerem hiram im. Yi eyises him me hi Mitik kerek God keriuweta hi han ti ik.”

<sup>30</sup><sup>k</sup>Hir newenhi natip, “Ti eriak mekam iuwe te haiu emirem te haiu emises him mit a? <sup>31</sup><sup>l</sup>Maamrer naiu naam menmen niuk miram mana

---

<sup>g</sup> 6:23 Jo 6:11    <sup>h</sup> 6:26 Jo 6:11-12    <sup>i</sup> 6:27 Jo 4:14; 6:48-58    <sup>j</sup> 6:29 1Jo 3:23    <sup>k</sup> 6:30 Mt 16:1; Jo 2:18    <sup>l</sup> 6:31 Eks 16:14-15; Nam 11:7-9; Sam 78:24



neit wit weinik mit ap newi en. Him me God matip Moses kewetir menmen meke wit ke God hir naam.”

<sup>32</sup> Jisas ketpor, “Hi hetpi werek. Moses kewetir menmen au. Haai kai kewetirem. Menmen me nipaa hiram ap bret yaaim mamkaap himin ki au. In ek Haai kai kerekek keweti menmen yaaim me wit kirak, hiram yaaim mire bret mamkaap himin ki kaku werek. <sup>33</sup> Bret God kewetiyek ek, hi Jisas kerek heke wit ke Mitik Iuwe han hi bret ik. Hi aweti himin yaaik kaku kakikri tipmain tipmain enuk eik.” <sup>34</sup> <sup>m</sup>Hir nitiwekhi nar ik: “Mitik Iuwe, ti ewetai bret kit eknen in ere tipmain tipmain enum eik.”

<sup>35</sup> <sup>n</sup>Jisas ketpor, “Hi hirekes hire bret hikaap mit nanu nanit himin yaaik. Hir neimin nanisisa te hir ap ninpi mamin. Neimin hir nanisisa ap te him niu enuk (o mar kakwenkikor him) hanhan nanim tipar mei au. Neimin hir nanisisa ap te him niu enuk (o mar kakwenkikor him) hanhan nanim tipar mei au.

<sup>36</sup> <sup>o</sup>“Hi hetpi yi epei yira te yi ap yises menmen hi etpiyem.

<sup>37</sup> <sup>p</sup>Mit neimin kerek Haai kai God kewetauri, hir naninen nanisisa. Hi ap te aweikin sip ewet neimin kerek naninen nanisisa au. <sup>38</sup> <sup>q</sup>Hi hinaaiwir wit ke God te hi hises han kai au. Hi hises han ke hirak Mitik Iuwe kerek keriuweta hi han ti ik e. <sup>39</sup> <sup>r</sup>Hirak kerek keriuweta hi han ti ik hirak hanhan menmen im. Hirak hanhan hi ap hinaaiwir mitik kiutip ke mit yapirwe hirak epei keriuwetai au. Hi akian mit miyapir yapirwe nanikrit nanu me wi maain God skelim mit. <sup>40</sup> <sup>s</sup>Menmen im Haai kai God hanhanem hiram im: Neimin nira hi Nikan kirak, hir nisisa nanimtau him mai, hir nanit himin yaaik kaku kakit tipmain tipmain enum eik, te hi akian nanu nanit me wi maain God skelim mit.”

<sup>41</sup> Hirak katip epei au, mit ne Isrel natipan nen Jisas nentar hirak katip him im: “Hi bret kerek heke wit ke God hi han in.” <sup>42</sup> <sup>t</sup>Te hir natip, “Mitik ik hirak kerekek nikan ke Josep. Haiu mertei miye haai nirak. Kenmak te hirak katip hirak keke wit ke God kan a?”

<sup>43</sup> Jisas kewenhi ketpor, “Yi ap eitip einahan me yi hiras emit! <sup>44</sup> <sup>u</sup>Mitik kiutip ap te kakisisa ere God Haai kerek keriuweta hi han hirak kakri han kirak. Hi akiak hirak kakit himin yaaik ke kaku kakit me wi maain God skelim mit. <sup>45</sup> <sup>v</sup>Mit profet newis him im mau tiwei hiram matip mar im: ‘Mit yapirwe te God kakitpor menmen kakikepi werek werek.’ Mit neimin niutip niutip kerek epei nemtau him me Haai kai God te hir nanisisa. <sup>46</sup> <sup>w</sup>Mitik kiutip ke mit yapirwe ap te kir God Haai ek au. Hi Mitik kerek God keriuweta hi han ti ik ek, hi kerekek epei hirek. <sup>47</sup> <sup>x</sup>Hi hetpi werek. Hirak keimin kises him mai kakit himin yaaik ke kaku

<sup>m</sup> 6:34 Jo 4:15    <sup>n</sup> 6:35 Jo 4:14, 6:48-58    <sup>o</sup> 6:36 Jo 20:29    <sup>p</sup> 6:37 Jo 17:6-8; Mt 11:28

<sup>q</sup> 6:38 Mt 26:39; Jo 4:34    <sup>r</sup> 6:39 Jo 10:28-29, 17:12    <sup>s</sup> 6:40 Jo 11:24    <sup>t</sup> 6:42 Mt 13:55

<sup>u</sup> 6:44 Jo 6:65    <sup>v</sup> 6:45 Ais 54:13    <sup>w</sup> 6:46 Jo 1:18    <sup>x</sup> 6:47 Jo 3:15-16

kakit tipmain tipmain emum eik. <sup>48</sup>Hi hirekes kerekek hire bret, hi akaap mit nanu nanit tipmain tipmain emum eik. <sup>49</sup>Maamrer ni nipaa naam menmen mana God kewetirem neit wit weinik mit ap newi, te hir ap nepu au. Hir epei naa. <sup>50</sup>Hi Mitik kerek hinaaiwir wit ke God han ti ik ek hi hire bret mikaap mit nanu. Neimin nisisa hir nani au. Hir nanu tipmain tipmain emum eik. <sup>51</sup>Hi hire bret akaap mit nanu nanit tipmain tipmain emum eik. Hi heke wit ke God han. Mit kerek nanim bret im hir nanu nanit tipmain tipmain emum eik. Bret im hiram yink kai kerek hi hewet mit ne ti hir nanim te hi akepi hir nanit himin yaaik.”

<sup>52</sup>Menmen im hirak ketpor menip mit ne Isrel nenehan natipan him me hir hiras, hir natip nar ik: “Mitik ik kakirkeik te hirak kakwetei naan me yink kirak haiu mamik a? Taauye!”

<sup>53</sup>Jisas ketpor, “Hi hetpi werek. Yi ap yayik yink kai ke hi Mitik ke wit ke Mitik Iuwe, o yi ap yayim hemkre mai, te yi ap yayit himin yaaik kakikri. <sup>54</sup>Neimin nanik yink kai o nanim hemkre mai, hir nanit himin yaaik. Te hi akian hir mit kerek nipaa naa, hir pike nanikrit nanu nanre mit me wi maain God skelim mit. <sup>55</sup>Yink kai hirak menmen yaaik kire samiyak kakikepi. Hemkre mai hiram mire tipar yaaam mamkepi. <sup>56</sup>Neimin naak yink kai ketike hemkre mai, hir nau netikewa nises him mai, te hi hau hekre han kir <sup>57</sup>God kerek hirak Haai ke menmen yapirwe mepu, hirak keriuweta hi han, hirak kenipa hi ahu tipmain tipmain emum eik. Neimin nanik yink kai hir nanu nanit nanriuwerek. <sup>58</sup>Hi hirekes hi hire bret keke wit ke God kan. Bret ik hirak ap kire menmen nipaa maamrer ni nipaa naam au. Hir naam ere hir ne mit te hir naa. Neimin nanik bret ik hirak yaaik kakikepi te hir nanu nanit tipmain tipmain emum eik.” <sup>59</sup>Jisas katip mit menmen im keit winak kerek mit nererik nekine him me Moses neitai en neit wit Kapaneam.

**Jisas katip him yaaim mamkaap mit nanu tipmain tipmain emum eik**

<sup>60</sup>Mit yapirwe kerek nipaa nises him mirak nemtau menmen im epei au, hir natip, “Him im hiram emum merekyei han enuk. Neimin nanu nanimtau him mamir im a? Taauye!” <sup>61</sup>Jisas epei kertei kekere han kirak hir mit disaipel nirak natipan menmen im hirak ketpor kar ik: “Him mai merekyi te yi han enuk a? <sup>62</sup>Maain yi eiyr hi Mitik ke wit ke Mitik Iuwe hi pike hiniu eno wit kerek nipaa hi hewik, te yi han enuk yeriuiwa wisenum a! <sup>63</sup>Yi mit hiras ap te eikaap hiras te yi yayu tipmain tipmain emum eik taau. God Himin Yaaik kerekek kakikepi. Him im hi epei hetpim em, hiram mamkepi himin ki te yi yayu tipmain tipmain emum eik. <sup>64</sup>Te mit han ne yi mit ap yisisa au.” (Jisas epei kertei wi kerek

<sup>y</sup> 6:48 Jo 6:35, 58    <sup>z</sup> 6:56 Jo 15:4-5; 1Jo 3:24    <sup>a</sup> 6:62 Jo 3:13; Ap 1:9-11    <sup>b</sup> 6:63 2Ko 3:6  
<sup>c</sup> 6:64 Jo 13:11

hirak kehimitan mit disaipel nirak, keimin ap kakisesik kakwepyapirek kakwet mit enun nepan ek hir neiyik nanino nankip.)<sup>65 d</sup> Jisas wen katip, “Nipaa hi hetpi ap mitik keimin kisisa ere God Haai kakri han kirak hirak kakisisa.”<sup>66</sup> Hirak katip epei au, mit yapirwe nipaa nisesik neweikin sip newetiwek.<sup>67</sup> Hir neweikin sip newetiwek, hirak katip mit disaipel nirak nar hiswiyen wik (12) kitorhi kar ik: “Yi eiweikin sip eitikeri einaiwira a?”

<sup>68</sup> Saimon Pita keweniwekhi ketpiwek kar ik: “Mitik Iuwe, haiu mamno keimin? Ti kerekek hetpei him mamkepei te haiu mamu tipmain tipmain enum eik.<sup>69 e</sup> In ek haiu hiras keriyen merteiyit ti keimin haiu misesit. Ti Mitik kerek God kehimitenit ti akaap haiu mit.”

<sup>70</sup> Jisas ketpor kar ik: “Hi hirekes hehimitan yi mit yar hiswiyen wik (12), te mitik hak kiutip ke yi mit hirak enuk kire Seten.”<sup>71</sup> Hirak katip ke Judas nikan ke Saimon ke wit Iskeriot. Hirak mitik kiutip ke mit hiswiyen wik (12), maain hirak kakwepyapir Jisas kakwet mit enun ek.

#### Jisas kikrek nirak ap han kitet hirak Kraiss

**7** <sup>1 f</sup> Menmen im epei au, Jisas ken kerer wit wit me provins Galili hirak kinapan kakno kakrer wit wit me provins Judia kentar mit iuwe nare nankip.<sup>2 g</sup> Wi epei man menep te mit ne Isrel nanrerik nanim menmen nau nekre weisaak mir, hir newet God menmen mei me ni mir.<sup>3</sup> Jisas kikrek nirak nemipin netpiwek, “Ti enaaiwir wit ik e eno Judia, te mit kerek nises him mit eninen enir menmen yaaim ti eriakem.<sup>4</sup> Mitik kerek hanhan mit nanirteiyek ap te kakriak menmen kaksawinem au. Hirak kakriakem kakrer wit wit te mit yapirwe enirem. Ti ariak menmen im yaaim, ti eno wit Jerusalem eteikin mit iuwe rem.”<sup>5 h</sup> (Kikrek nirak natip menmen im nentar hir ap han kitet hirak Kraiss kerek God kakriuwtek kaknen kakikaap mit au.)

<sup>6 i</sup> Te Jisas ketpor kar ik: “Wi mai ap epei man te hi awepyapir hirekes hi Mitik Iuwe kerek God keriuweta hi han ti ik. Wi yi han kitetim yi yaino, te yi eino wit Jerusalem eitike mit eiym menmen.<sup>7 j</sup> Mit ne ti ik ek hir ap han enuk neriuwi au. Te hir han enuk neriuwa nentar hi hewepyapir menmen enum hir niriakem.<sup>8</sup> Yi eino eitikeri eiym menmen. Hi au, hi ehui in me wi ham hentar hi ap ewepyapir hi Mitik God kehimitena wen au.”<sup>9</sup> Hirak ketpor epei au, hirak wen kepu provins Galili.

#### Jisas ken kau ketike mit kerek nererik naam menmen nekre weisaak

<sup>10</sup> Jisas kikrek nirak nen netike mit han nererik naam menmen epei au, Jisas kepno. Hirak ap ketike mit yapirwe nen au. Hirak kerekek ken kau

<sup>d</sup> 6:65 Jo 6:44    <sup>e</sup> 6:69 Mt 14:33, 16:16; Mk 1:24; Jo 1:49    <sup>f</sup> 7:1 Jo 5:18    <sup>g</sup> 7:2 Lev 23:34

<sup>h</sup> 7:5 Mt 13:55; Ap 1:14    <sup>i</sup> 7:6 Jo 2:4, 7:30    <sup>j</sup> 7:7 Jo 15:18

kire mitik kisawin. <sup>11</sup> <sup>k</sup>Mit iuwe ne Isrel ninatin Jisas neit wit kerek hir nererik naam menmen neitai ein. Hir nitehiyan, “Hirak keit nein?”

<sup>12</sup> Neit ein ek, mit yapirwe newepnak natipan me Jisas. Mit han natip hirak yaaik, mit han au natip hirak enuk kari han ke mit yapirwe hir nises him mirak. <sup>13</sup> <sup>l</sup>Ap mit nei natip nerp yaain menmen me Jisas nentar hir ninapen mit iuwe ninin naanmipre mit ne Isrel hir nanimtewem te hir neneri.

<sup>14</sup> <sup>wi</sup> Wikak epei men kerek mit nererik naam menmen, te Jisas ken winak iuwe ke God keit Jerusalem, hirak katip mit him mirak kerp yaain ketpor menmen. <sup>15</sup> <sup>m</sup>Mit iuwe ne Isrel nehinhin natip, “Mitik ik weinik kertei menmen mau tiwei karkeik? Nipaa hirak ap ken skul te mit iuwe tisa neteikniwek menmen au.”

<sup>16</sup> <sup>n</sup>Jisas kewenhi ketpor, “Menmen hi etpiyem hiram ap mai au. Hiram him me hirak kerek keriuweta te hi han ti ik. <sup>17</sup> <sup>Neimin</sup> Hir nises menmen God hanhan hir nisesim, hir nanirtei him hi hetpiyem hiram me God o him hi hirekes han kitetim etpiyem. <sup>18</sup> <sup>Keimin</sup> Hirak katip mit menmen hirak han kitetim hirak hanhan mit nanwenipi niuk mirak keremem. Keimin hanhan kakwenipi niuk me mitik kerek keriuwetek, hirak kakises menmen yaaim kemipin au. <sup>19</sup> <sup>P</sup>Moses nipaa keweti him mirak mau tiwei te keimin ke yi mit hirak kisesim werek werek? Taauye! Te yi yenmak yi yayiep hi hahi yentar yi yatip hi ap hises him me Moses werek werek au a?”

<sup>20</sup> <sup>q</sup>Mit en hir nitiwekhi nar ik: “Neimin hir hanhan nanitep te ti hahi a? Herwe enuk kersisit te ti han ken sip te ti hatip menmen mar im!”

<sup>21</sup> <sup>r</sup>Jisas ketpor, “Hi hiriak menmen miutip yaaim me wi Sabat te yi han kekrit han enuk yeriua. <sup>22</sup> <sup>s</sup>Nipaa Moses ketpi yi yerekir yink ke nikerek hirakit ti. (Nipaa maaamrer ninin niriak menmen im. Moses au.) Yi yerekir yink ke nikerek hirakit ti me wi Sabat te yi yises him me Moses. <sup>23</sup> <sup>Yi</sup> yiriak menmen im me wi Sabat, te yi yises him me Moses werek werek. Te yi yenmak yi han enuk yeriua yentar hi hikaap mitik kinap hirak kire yaaik me wi Sabat a? <sup>24</sup> <sup>u</sup>Yi ap han ekitet menmen hi etpiyem eyintar yi han kitet hi heremir him yi yisesim. Yi han ekitet menmen werek werek te yi eyirtei menmen hi hetpiyem hiram yaaim.”

### Mit han natip Jisas hirak mitik Kraiss

<sup>25</sup> <sup>v</sup>Mit han nau Jerusalem natip, “Mit iuwe ninin naanmiprai hir hanhan naninep mitik ik kaki. <sup>26</sup> Te yi eyirek. Hirak katip mit menmen

<sup>k</sup> 7:11 Jo 11:56    <sup>l</sup> 7:13 Jo 9:22, 12:42, 19:38, 20:19    <sup>m</sup> 7:15 Mt 13:54; Lu 2:47    <sup>n</sup> 7:16 Jo 12:49, 14:10    <sup>o</sup> 7:18 Jo 5:41, 8:50    <sup>p</sup> 7:19 Ap 7:53; Ro 2:21-24    <sup>q</sup> 7:20 Jo 8:48, 52, 10:20  
<sup>r</sup> 7:21 Jo 5:16    <sup>s</sup> 7:22 Lev 12:3, Jen 17:9-13    <sup>t</sup> 7:23 Jo 5:8-10, 16    <sup>u</sup> 7:24 Lev 19:15; Ais 11:3-4; Jo 8:15    <sup>v</sup> 7:25 Jo 5:18

mirak keit wit yaaik me ninaan mir, te mitik hak ap kesiuwek him au. Mit iuwe han kitet mitik ik hirak Mitik Kraiss kerek God keriuwetek kaknen kakikaap haiu mit o au a? <sup>27</sup> \*Karkeik te hirak Mitik God kehimitanek kaknen kakikepai a? Haiu mertei mitik ik ek wit kirak. Maain wi Mitik Kraiss kerek God kehimitanek kaknen in, haiu mit ap te nanirtei hirak keke nein kan au!”

<sup>28</sup> xJisas keit winak ke God katip him iuwe kar ik: “Yi han kitet yi yertei hi keimin, yi yertei wit hi hewik. Te yi yepitari hi ap han weinim au. Mitik kerek hirak keriuweta hi han ik, hirak kerekek kepu, te yi au yepitariyek. <sup>29</sup> Hi hertei ek werek werek entar hi nipaa hau hetikerek hirak keriuweta hi han ti ik e.”

<sup>30</sup> yHirak katip menmen im epei au, mit iuwe hanhan nantiwek his nanwisik kakikre winak enuk ke gavman. Hir ap netiwek his nentar wi kerek maain hirak kaki hiram ap epei man wen au. <sup>31</sup> zMit yapirwe ne mit kerek nemtau him mirak hir nisesik. Hir natip nar ik: “Maain Mitik Kraiss kerek God kehimitanek hirak kaknen ap te kakinin menmen yaaim iuwe mitik ik kiriakem taauye! Mitik ik hirak Kraiss!”

**Mit iuwe neriuwet mit polis nan nanithis**  
**Jisas nanwisik kakikre winak enuk**

<sup>32</sup> Mit ne Farisi kerek ninin nertei him me Moses hir nisesim, hir nemtau mit natipan nar ik me Jisas, te hir netike mit iuwe pris neriuwet mit naanmipre winak ke God en hir nan nanit his Jisas. <sup>33</sup> aHir epei nan, Jisas katip, “Hi wen hahu hatikewi wi ham, te maain hi pike ano hahu atike hirak kerek nipaa keriuweta hi han ti ik e. <sup>34</sup> bMaain yi yayinyaitno te yi ap yainepya au. Hi ano wit kerek yi ap te yayisisa yainen taau.”

<sup>35</sup> Hirak katip epei au, mit iuwe ne Isrel natipan nar ik: “Hirak kakno nein te haiu ap mamnapinek a? Hirak kakno kakrer wit wit me mit ap ne weiwik me Isrel kerek mit han nai ne Isrel newiyen te hirak kaktip mit ne weiwik me Grik him me God a? <sup>36</sup> Kenmak te hirak katip menmen im: ‘Maain yi yayinyaitno te yi ap yainepya au. Hi ano wit kerek yi ap te yaisisa yainen taau?’ ”

**Jisas hirak kire tipar yaaim mamkaap mit nanu werek**

<sup>37</sup> cMe wi mikaru me mit hir nererik naam menmen, hiram wi iuwe epei man, Jisas kekrit kerp katip keriuwe him iuwe kar ik: “Keimin him niu enuk (o mar kewenkikiwek him) kaknen kakira te kakim tipar

---

<sup>w</sup> 7:27 Jo 7:41, 9:29    <sup>x</sup> 7:28 Mt 11:27; Jo 8:55    <sup>y</sup> 7:30 Jo 7:44, 8:20, 13:1    <sup>z</sup> 7:31 Jo 2:23, 8:30, 10:42, 11:45, 12:11, 42    <sup>a</sup> 7:33 Jo 13:33    <sup>b</sup> 7:34 Jo 8:21, 13:36, 17:24    <sup>c</sup> 7:37 Lev 23:36; Ais 55:1; Jo 4:10, 14

mei.” <sup>38d</sup>Menmen im hiram mar ke him me God metpim. Hiram matip, “Keimin kisisa, te menmen yaa'im mamu mamit maain mire hitik meke han kirak mamnen witeik.” <sup>39e</sup>Jisas katip him im me God Himin Yaaik kerek neimin nisesik, te hir nantiwek kaku kakikre han kir. Me wi im God Himin Yaaik ap kan wen au kentar Jisas ap kaa pike kekrit ken wit ke God keit menmen iuwe wen au.

#### Mit newep hasini pinan pinan nentar him me Jisas

<sup>40f</sup>Mit yapirwe nererik menep menep nemtau Jisas, hir natip him mar im: “Mitik ik ek hirak kire mitik profet hirekes kinin kaknen me wi menep Mitik Kraiss kaknen.” <sup>41g</sup>Mit han natip hirak kerekek Mitik God kehimitanek keriuwetek kaknen ek. Te mit han natip, “Mitik kerek God keriuwetek kaknen ap te mitik kei ke provins Galili taau!” <sup>42h</sup>Tiwei me God matip, “Mitik God keriuwetek kaknen hirak nepenyek ke mitik Devit. Te mite wawinaak kakit Betlehem kerek wit nipaa Devit kewi en.” <sup>43i</sup>Te hir mit yapirwe nererik newep nau nimin pinan en han kitet him ham, pinan natip han kitet him ham me Jisas. <sup>44j</sup>Hirak katip menmen im epei au, mit han hanhan nantiwekhis nanwisik kakikre winak enuk ke gavman. Te hir ap netiwekhis nentar wi kerek maain kaki ap man wen au.

#### Mit iuwe ninin naanmipre mit ne Isrel ap nises Jisas au

<sup>45</sup>Menmen im epei au, mit in naanmipre winak ke God ninaaiwir Jisas pike nen natip mit iuwe pris ninin naanmipror, netike mit ne Farisi. Te hir netpor, “Yenmak te yi ap yetiwekhis yeiyik yan in a?” <sup>46</sup>Te mit in ne winak iuwe ke God netpor, “Mit nei ap nipaa natip nar ke mitik ik ek hirak katip.”

<sup>47</sup>Te mit ne Farisi neneri netpor nar ik: “Hirak kari han ki ketike mit miyapir en a? <sup>48</sup>Yi ap yir mitik kei kerek kinin naanmipri ek o haiu mit ne Farisi mises him mirak au! <sup>49</sup>Mit yapirwe in en ap nertei him lo me Moses nisesim werek nar ke haiu mit au. Te God kakriwaank kakit ninaan mirak me wi maain hirak skelim haiu mit ne ti.” <sup>50</sup>Nikodimas kerek nipaa ke witaan ken kir Jisas hirak mitik kiutip ke hir mit ne Farisi hirak ketpor, <sup>51</sup>“Him lo maiu hiram matip haiu mit iuwe eminin mamintau him mitik hirak ketpim, mamir menmen hirak kiriakem, te maain haiu matip hirak yaaik o enuk. Haiu emimtau him mirak werek, te haiu emirtei menmen hirak kiriakem werek werek.”

<sup>52-53</sup>Te hir nenerek netpiwek, “Ti enuk ke Galili har ke mit en a? Ehir tiwei me God werek werek te ti ertei mitik profet kei ap te kaknen in hirak ke provins Galili auye!”

<sup>d</sup> 7:38 Ais 58:11; Sek 14:8    <sup>e</sup> 7:39 Jo 16:7, 20:22; Ap 2:4    <sup>f</sup> 7:40 Diu 18:15; Jo 6:14; Ap 3:22    <sup>g</sup> 7:41 Jo 4:29, 1:46, 7:52    <sup>h</sup> 7:42 2Sml 7:12; Sam 89:3-4; Mai 5:2; Mt 2:5-6  
<sup>i</sup> 7:43 Jo 9:16    <sup>j</sup> 7:44 Jo 7:30

### Him me mite wari mitik his wewenem

**8** <sup>1</sup>[Hir natip epei au, hir mit yapirwe kerek nererik hir nen wit kir, te Jisas ken miniu (o neiyip) mit nenewek wit Oliv. <sup>2</sup>Teipmen wen hekrit enum eik, Jisas ken winak iuwe ke God. Te mit yapirwe nenerik neweikniwek nau ti te hirak ketpor him. <sup>3</sup>Mit iuwe ninin nertei him lo me Moses natip mit em, hir netike mit ne Farisi neit his mite kerek epei wetike mitik hak hir niriran hir neiyip nan. Hir netpiwe werp nimin ke ninaan me mit. <sup>4</sup>Hir natip Jisas nar ik: “Mitik luwe, mite ip ep epei wari mitik hak his wewenem te mit han niri. <sup>5</sup>Him lo Moses keweteiyem matip mite wiriak menmen enum mar im haiu emwir nan mamip wawi. Te in ek ti atip mekam?”

<sup>6</sup>Hir natip him mar im me nanri han ke Jisas te hir nesiuwek him nantiwek his kakno winak enuk. Te hir ap nanmitiwekpin au. Hirak kertei, te hirak kitehir kenke his tiwak kirak kewis him miwaai ti.

<sup>7</sup>Te hir au nerp nitiwekhi menmen. Jisas kekrit kari hirekes werek te hirak ketpor, “Mitik keimin kiutip ke yi mit kerek ap kises menmen enum kiriakem au, hirak ekinin ekwir nan ekip.” <sup>8</sup>Hirak katip epei au, hirak kitehir kewis him meriuwe histuwak kirak mau ti. <sup>9</sup>Te hir nemtau him Jisas ketpor kar ik, hir nenepep nire ne kiutip kiutip nen witeik. Mit iuwe niutip niutip ninin netpaan, hir mit han weinin nikaru ere hir ninaaiwir Jisas kiutip kepeit nimin ein ketike mite kerepep weperp. <sup>10</sup>Jisas kekrit kerp kari hirekes te hirak ketpiwe, “Hir mit neit nein? Ap kei kiutip kerp in te hirak kaksiwut him me menmen enum ti hiriakem?”

<sup>11</sup>Mite wewenhi watip, “Mitik luwe hir epei nen. Ap kei kiutip kerp in au.”

Jisas ketpiwe, “Hi ap te heswut him me menmen im enum ti hiriakem taau. Ti enaaiwir in eno, te ti ap pike eriak menmen enum au emit!”]

### Jisas kirak kire wepni kir ke ti ik ek

<sup>12</sup>Jisas pike katip mit nisesik kar ik: “Hi hir hire wepni ke ti ik ek. Keimin kisisa kemtau him mai, hirak ap kakises menmen enum mire witaan toto taau. Hirak kakises menmen mai yaaim mir mire wepni te hirak kakit himin yaaik kaku kakit.”

<sup>13</sup>Mit ne Farisi natip Jisas, “In ek ti etpim me ti hirekes. Menmen im ti etpim hiram menmen weinin meteiknai ti keimin au.”

<sup>14</sup>Jisas ketpor kar ik: “Au, menmen hi hirekes eriakem hatip me hi hirekes hiram yaaim werek hentar hi hertei hi eke nein han te hi ano nein. Te yi ap yertei hi heke nein han o hi pike ano nein. <sup>15</sup>Yi skelim hi te yises menmen enum me ti. Yi ap yertei werek menmen me hi hiriakem te yi wen yeswo him. Te hi ap skelim mitik kiutip kerek kar ik au. <sup>16</sup>Te hi kitet mit nanirp ninaan mai me menmen hir niriakem hiram te

yaaim werek mentar hi ap hirekes kiutip skelim hir mit me menmen im. Haai kai God kerek keriuweta hi han in hirak kau ketikewa kekepa hawir wiriak menmen im. <sup>17</sup>Hiram him lo mi matip mitikit wiketeret tatip menmen miutip hirap yaaim werek mentar hirakit tatip him miutip mipiram. <sup>18</sup>Hi hetpi me hi hirekes hi Mitik ke wit ke Mitik luwe. Haai kai kerek keriuweta hi han in hirak ketikewa hawir wewepyapir hi keimin.”

<sup>19</sup>Hir mit en nitiwekhi, “Haai kit keik?”

Jisas ketpor, “Yi ap yertei hi keimin te yi yepitari Haai kai. Yi yerteiya te yi yayirtei Haai kai.” <sup>20</sup>Jisas ketpor him im keit winak iuwe ke God, keit haau kerek mit newis pewek mekre bokis newet God em miwaai en. Te mit nei ap newirek kekere winak enuk nentar wi mirak hirak kaki ap epei man wen au.

### **Yi ap te eitikewa yaino wit kerek hi anori en taau**

<sup>21</sup>Jisas pike ketpor keteipim, “Hi ano ehit en ehit (o ano auwesi ehit). Te yi maain yayinyaitno te yi yayi yeriuwe menmen enum yi yiriakem. Te yi ap eino nein kerek hi ano en taau.”

<sup>22</sup>Te mit iuwe ne Isrel natip, “Hirak katip kar ik, ‘Yi ap yaino wit kerek hi ano taau.’ Him im hirak ketpim mire hirak kaknep hirekes kakit nein te haiu ap mamno mamtikerek?”

<sup>23</sup>Jisas kewenhi ketpor, “Yi mit yi ne ti ik ek keriyen. Te hi au hi ke ti ik au. Hi ke wit kau niu. <sup>24</sup>Mar keremem te hi etpi yi yayi yeriuwe menmen enum mau mekre han ki. Yi ap yerteiya hi Mitik God keriuweta hi han ti ik e. Te yi yaino si yayintar menmen enum yi yiriakem.”

<sup>25</sup>Hir nitiwekhi, “Ti keimin?”

Jisas kewenhi ketpor, “Hi epei hetpi him menmen nipaa ein ek, wi kerek hi hinin hewepiyapir him God ketpewem. <sup>26</sup>Menmen yapirwe yi yiriakem te hi etpiyem skelim yi mit ariuwereh ahir ke mitik masistret hirak kiriakem. Te hi ap ariakem in ek au. In ek hi etip yi mit ne ti him me Mitik luwe kerek hirak keriuweta hi han in hirak yaaik hirak ketpewem te hi epei hemtewem. Hi ariak menmen im keremem. Menmen ham au.”

<sup>27</sup>Hir ap mertei menmen hirak ketporem me Haai kirak God ek au. <sup>28</sup>Te hirak ketpor, “Maain te yi eiriak hi Mitik ke wit ke Mitik luwe yewerikika hahu nu tentarakit, te yi yayirtei hi keimin hi hirekes. Te maain yi eiyirtei hi ap hiriak menmen me hi hirekes au. Hi hetpi menmen miutip kerek epei Haai kai ketpewem. <sup>29</sup>Hirak kerek keriuweta hi han ti ik hirak kepu ketikewa. Hirak ap kinaiwira hi kiutipen hepu. Au, hekrit hi hemtau menmen mirak hisesim te hirak han yaaik keriuwa.” <sup>30</sup>Mit yapirwe nemtau him me menmen Jisas ketpim, te hir nisesik.

### **Jisas katip him me mit nau werek, mit au nau enum**

<sup>31</sup>Jisas katip mit ne Isrel kerek nemtau him mirak nisesik kar ik: “Yi yises him mai hi epei hetpiyem yi yire mit disaipel nai. <sup>32</sup>Yi yayirtei him



yaaim werek, te him yaaim im mamkepi yainepim yaikeipin menmen enum, yar ke mitik epei ketpaan kinaaiwir winak enuk.”

<sup>33</sup>Mit han en natip, “Haiu nepenyerer ne mitik Ebrahim. Haiu ap nipaa mire mit niriak menmen weinim me mitik hak kerek naanmiprai au. Ti henmak te ti atip him im em, ‘Yi yayu yaaim werek yainopin yaikeipin menmen enum yar ke mitik epei ketpaan kinaaiwir winak enuk a?’”

<sup>34</sup>Jisas ketpor, “Hi hetpi werek. Yi mit yapirwe kerek yi yiriak menmen enum yi yar ke mit nekre winak enuk ke menmen enum yi yisesim hirak mewenkeki mari han ki yi ap te einaiwirem au. <sup>35</sup>Mit kerek nepu nekre winak enuk ap te nanises han kir nanriak menmen au. Te mitik kerek kepu witeik hirak kepu kepeit en kises han kirak kiriak menmen. <sup>36</sup>Te hi Nikan ke God hi herekyi yi eire yaain einopin eikeipin menmen enum, te yi eiyu werek werek. <sup>37</sup>Hi hertei yi nepenyerer ne Ebrahim. Te yi yayiyep yayintar yi ap yemtau him mai yisesi. <sup>38</sup>Hi hetpi menmen nipaa Haai kai epei keteiknewem, te yi yiriak menmen kerek nipaa haai ki hirak ketpiyem.”

### **Jisas katip mit haai kir hirak Seten**

<sup>39</sup>Hir newehi netpiwek, “Haai kiau hirak Ebrahim.” Jisas ketpor, “Yi nikerek ne Ebrahim hiras, te yi yairiak menmen yaaim mamir ke hirak kiriakem. <sup>40</sup>Te menmen hi epei hetpiyem hiram him yaaim werek hi hemtewem meke God man. Te yi wen hanhan yaitip yayiyep. Ebrahim hirak kinapen menmen im. <sup>41</sup>Yi yiriak menmen kerek haai ki kiriakem.”

Hir nenerek natip, “Miyerer nau ap niwaai netike mit han te hir ninaiu nar ke ti au. Haiu Haai kiau kiutip God hirekes.”

<sup>42</sup>Jisas ketpor, “God hirak Haai ki hirekes, te yi han tewenina. Hirak keriuweta hi heke wit kirak han te hi hau in ek. Hi ap hises han kai hinaaiwir wit te hi han ti ik auye! Haai kai keriuweta. <sup>43</sup>Yi yenmak te yi ap yertei menmen hi epei hetpiyem a? Yi yepitariyem yentar yi ap yau werek werek yemtau him mai. <sup>44</sup>Yi nikerek ne haai ki Seten, te yi hanhan yayises menmen enum mirak. Nipaa enum eik wi kerek hirak kinin kau ek, hirak enuk kenepep mit naa. Hirak ap pike kire yaaik mei kike au, kentar hirak ap katip him yaaim mamkaap mit au. Hirak enuk kemipin mit kari han kir mekrerek. Hekrit hekrit hirak enuk kemitetpin, hirak haai ke mit hir nemitetpin. <sup>45</sup>Hi hetpi him yaaim ap hemipin au, te yi ap yisisa yentar menmen hi nepei hetpim me Seten. <sup>46</sup>Keimin kiutip ke yi ektip menmen hi epei hiriakem hiram enum? Hi hetpi him yaaim te yi yenmak yi ap han kiteta? <sup>47</sup>Mit kerek hir nikerek ne God hir enimtau him me God. Te yi ap nikerek ne God au yentar yi ap yemtau him mirak.”

### **Ebrahim miye pirak winaak wen au, hi hininek hepu**

<sup>48</sup>Mit iuwe ninin naanmipre mit han ne Isrel hir netpiwek, “Nipaa haiu matip werek. Ti hirekes mitik enuk ke wit Sameria herwe kewit te ti han ken sip.”

<sup>49</sup>Jisas kewenhi ketpor kar ik: “Hi herwe ap mekra au. Hi hewenipi niuk me Haai kai keremem, te yi au yetpo enum ap yewenipi niuk mai au. <sup>50</sup>Hi ap hiriak menmen te mit nantip hi yaaik iuwe au. Maain God kakteikin mit hi yaaik iuwe, hirak han ekitet menmen hi hiriakem. <sup>51</sup>Hi hetpi werek. Neimin nises him mai, hir ap te nani au. Hir nanu nanit tipmain tipmain enum eik.”

<sup>52</sup>Mit iuwe ne Isrel netpiwek, “In ek haiu mertei herwe enum mersis han kit te ti han ken sip. <sup>53</sup>Mitik Ebrahim ketike mit profet kerek newepyapir him me God natip mit em, hir epei naa. Te ti hatip neimin nises him mit te hir nanu nanit tipmain tipmain enum eik. Ti iuwe hinin Ebrahim ketike mit profet a? Ti han kitet ti keimin a? Ti han kitet ti hire God a?”

<sup>54</sup>Jisas katip kar ik: “Hi hirekes hewenipi niuk mai hiram menmen weinim. Hi au Haai kai kerek yi yatip yi yisesik yewenipiyek hirak kewenipi niuk mai. <sup>55</sup>Yi yatip yi yerteiyek, te ti yisesik au. Hi herteiyek hisesik. Hi hatip hi hepitariyek, te hi mitik enuk hemipin har ke yi mit. Au, hi herteiyek, hi hises him mirak. <sup>56</sup>Maam ki Ebrahim hanhan kakir wi kerek hi anaaiwir wit ke Mitik luwe eweikin hire mitik anen hahu ti ik atike yi mit. Hirak epei kirek te hirak han yaaik.”

<sup>57</sup>Mit iuwe ne Isrel netpiwek, “Ti ap epei enuk he mitik wen au, ti epei hir Ebrahim a? Taauye!”

<sup>58</sup>Jisas ketpor, “Hi hetpi werek Ebrahim miye pirak winaak wen au, hi kerekek hepu.”

<sup>59</sup>Hirak katip epei au, mit neit nan nanwirem nankip. Au, Jisas kiune hirekes hirak kinaaiwir winak iuwe ke God ketpaan ken witeik.

### Him me mitik nanamir toto Jisas kekepik kire yaaik

**9** <sup>1</sup>Jisas keke ti kepno, hirak kir mitik hak kerek miye winaak hirak enuk nanamir toto. <sup>2</sup>Mit disaipel nirak nitiwekhi nar ik: “Mitik luwe, neinin niriak enum te miye pirak winaak te hirak nanamir toto? Hirekes o miye haai nirak?”

<sup>3</sup>Jisas ketpor kar ik: “Mitik ketike miye haai ap niriak enum au. Hirak nanamir toto kentar God kiriak menmen yaaim kakriuwerek kakteikin mit em. <sup>4</sup>Haiu emriak menmen me God kerek keriuweta hi han. Haiu emriakem me wi hirak kimat haiu mamriakem. Haiu emriakem emintar maain wi mamnen te mit ap te nanriak menmen mar im au. <sup>5</sup>Hi wen hepu ti ik ek, hi hire si mir meteikin mit yapirwe yayiwe, hi heteiknor menmen me God.”

<sup>6</sup>Hirak katip menmen im epei au, hirak kenikin timank men ti keweiknim mire toni, hirak kewisim mau nanamir ke mitik eik. <sup>7</sup>Hirak kewisim epei au, hirak ketpiwek, “Ti eno ekir ekre wan niuk mirak Siloam.” (Haiu meweikin him im haiu matip ‘Mit neriuwetem men.’) Jisas

ketpıwek epei au, hirak ken kekemyet ninaan te hirak pike kan kir ein ein werek werek.

<sup>8</sup>Hirak epei kan, te mit nau menep nirapitek netike mit han nirek nipaa kau ti ek kitehi mit me pewek, hir natipan nar ik: “Mitik ik nipaa kau ti kitehi mit nanwetıwek pewek. Mitik ik o au a?” Mit han en, hir natip, “Mitik ik ninaan mirak mar ke mitik hak eik kau ti.” <sup>9</sup>Mit han natip, “Mitik ik kerekek nipaa kau ti kitehi mit pewek.” Au, mit han natip, “Hırekes au. Hirak ninaan mirak mire mitik kerek nipaa nanamir toto ek.” Hirak ketpor, “Au, hi mitik hirekes kerek nipaa nanamir toto.”

<sup>10</sup>Hirak ketpor, te hir nitiwekhi, “Ti harkeik te nanamir kit yaaik te ti hir ein ein a?”

<sup>11</sup>Hirak ketpor kar ik, “Mitik ik hir nenewek Jisas kenikin timank mau ti keweiknenim ere mire toni, te hirak kewisim mau nanamir kai te hirak ketpo kar ik: “Ti eno ekemyet ninaan emikre wan niuk mirak Siloam.” Epei au, hi hen hekemyet ninaan mai te nanamir kai kire yaaik hi hir ein ein werek werek.” <sup>12</sup>Hirak katip epei au, hir nitiwekhi, “Hirak keit nein?” Hirak katip, “Hi hepitariyek.”

#### **Mit ne Farisi nitehi mitik me menmen Jisas kırıakem**

<sup>13</sup>Hir mit neithis mitik ik kerek nipaa nanamir enuk toto ek hir nerıyaak ketikeri nen nir mit ne Farisi kerek ninin nises him me Moses. <sup>14</sup>Wi kerek Jisas kewis toni kau mitik nanamir toto te hirak nanamir yaaik kesiupan kir ein ein werek werek, hirak kırıak menmen im me wi Sabat kerek mit ap nırıak menmen au. <sup>15</sup>Hirak ketikeri nen nir mit ne Farisi, hir nitiwekhi pike kakitpor karkeik te hirak in ek kir ein ein. Hirak kewenhi katip, “Mitik hirak kewen toni kau nanamir kai, hi hekekyet te hi hir ein ein.” <sup>16</sup>Mit han ne Farisi natip, “God kerıuwet mitik ik au kentar hirak kırıak menmen me wi Sabat ap kises him me Moses au.” Mit han natip, “Mamırkeik te mitik enuk kakrıak menmen yaaim mamır im?” Hir mit newep nau nimin. Pınan natip Jisas enuk, han pınan natip hirak yaaik.

<sup>17</sup>Mit ne Farisi nitehi mitik neteipim nar ik: “Ti han kitet mekam me mitik kerekyut nanamir? Hirak yaaik?”

Hirak ketpor, “Hırak mitik profet kerekek.”

<sup>18</sup>Mit iuwe ne Isrel nertei mitik ik au, te hir ap han kitet nipaa hirak nanamir enuk toto, te in ek hirak kir ein ein. Hir nemtau him mirak au ere hir nıtehi miye haai nırak. <sup>19</sup>Hir nitorhi nar ik: “Ik ek hirak nıkan kit kerek nipaa yi yınaak ek, hirak nanamir toto? Karkeik te hirak kir ein ein?”

<sup>20</sup>Miye haai nırak netpor, “Haiu mertei ik ek nıkan kawır kerek hawır wınaak hirak nanamir toto, hawır werteyek. <sup>21</sup>Hawır wepitari hirak karkeik te hirak kıpır ein ein. Yi eiyitiwekhi. Hirak epei kire iuwe. Hirak

kirekes kakitpiyem.”<sup>22</sup> Miye haai nirak natip nar ik nentar hir ninaain mit iuwe ne Isrel. Mit iuwe nipaa natip keimin katip Jisas hirak Mitik Krai kerek kaknen kakikaap haiu mit, hir ap nanweniwekhi kaknen winak kerek mit nererik nekine him me Moses neitai au.<sup>23</sup> Miye haai nirak nertei menmen im te hir netpor, “Hirak epei iuwe, te yi eiyyitiwekhi em.”

<sup>24</sup> Mit iuwe pike nari mitik kerek nipaa nanamir toto ek hirak kan te hir netpiwek nar ik: “Ti ewenipi niuk me God, te ti atip werek. Haiu mertei mitik ik ap kises God werek werek o au. Ti ewepyapirek hirak enuk.”

<sup>25</sup> Hirak ketpor kar ik: “Hi hepitari mitik ik hirak yaaik o enuk. Menmen miutip hi hertei. Nipaa hi nanamir toto, te in ek hi hir ein ein werek werek.”

<sup>26</sup> Hir pike nitiwekhi, “Hirak kerekyut mekam? Hirak karkeik te hirak keniput nanamir kit kire yaaik?”

<sup>27</sup> Hirak ketpor kar ik: “Hi epei hetpiyem, te yi ap yisesim werek werek au. Yi yenmak te yi hanhan yayimtwewem yaiteipim a? Yi hanhan yayisesik yi yayir disaipel nirak a?”

<sup>28</sup> Hirak katip epei au, hir han enuk netpiwek enum nar ik: “Ti kerekek hises him mirak. Haiu auye! Haiu mises him me Moses!<sup>29</sup> Haiu mertei God katip Moses him mirak, te mitik ik weinik haiu mepitari keimin keriuwetek kan.”

<sup>30</sup> Mitik keneri ketpor kar ik: “Menmen im yaaim menipa hi heniuwesis. Yi yepitari keimin keriuwetek hirak kan, te hirak kekepa kiriak nanamir kai kire yaaik.<sup>31</sup> Haiu mertei God hirak kemtau him me mit enun hir nitiwekhi menmen au. Hirak kemtau him keremem me mit yaain hir niriak menmen God hanhan hir nisesi.<sup>32</sup> Nipaa God kewis ti ere in haiu ap memtau mitik hak kikaap mit nanamir enum toto, te hir nir ein ein werek werek au.<sup>33</sup> God ap keriuwet mitik ik te hirak ap kakriak menmen werek werek taauye!”

<sup>34</sup> Hir mit nemtaantiwo nenerek nar ik: “Nipaa miye pit winit ti enuk mitik weinik, te ti han kitet ti mitik iuwe hetpai menmen me God a?” Hir netpiwek epei au, hir nepirek ken witeik.

### **Mit ap nises him me Jisas hir nire mitik nanamir toto**

<sup>35</sup> Jisas kemtau hir epei nepirek ken witeik, te hirak kinketniwek. Hirak kinapinek epei au, hirak kitiwekhi kar ik: “Ti kerekek hises him me mitik ke wit ke Mitik luwe o au?”

<sup>36</sup> Mitik ik kitiwekhi kar ik: “Mitik luwe, ti etpo hirak keimin te hi hises him mirak.”

<sup>37</sup> Jisas ketpiwek, “Ti epei hirek hirak kerek in ek hirak ketput menmen.”

<sup>38</sup>Hirak pike katip Jisas kar ik: “Mitik luwe, hi han kitet ti Mitik ke wit ke Mitik luwe.” Te hirak kewen ninip kewenipi niuk mirak.

<sup>39</sup>Te Jisas katip, “Hi han ti ik te hi hewepyapir neimin nises God, neimin hir au. Hi han akaap mit netari him me God te hirak kakrektyor han kitet hir nanamir toto te hir nanisesik nanirteiyek werek werek. Hi han te neimin hir han kitet hir epei nertei him me Moses werek werek, hi heteiknor hir ap nises God werek werek au. Hir nire mit enun nanamir toto.” <sup>40</sup>Mit han ne Farisi nerp netikerek nemtau menmen hirak ketpim, hir netpiwek nar ik: “Ti ap han kitet haiu nanamir toto metike mit yapirwe weinin au a?”

<sup>41</sup>Jisas ketpor, “Yi yepitari hi keimin te God ap han kitet menmen yi yerekyewem hiram enum iuwe au. Kike. Te in ek yi yatip yi yertei menmen me God werek werek, te menmen enum mekre han ki hiram emu emit!”

### Him me Jisas naanmipre sipsip

**10** <sup>1</sup>“Hi hetpi werek werek. Mitik kerek ap kitet ya weipir kakno niwa ke sipsip au, hirak kiniu niwa keke han kerekir ken nimin ein, hirak mitik enuk kekintip menmen. <sup>2</sup>Te mitik kerek kitet ya weipir hirak mitik ke naanmipre sipsip. <sup>3</sup>Mitik kerek kekiwo niwa kau ya weipir kire mitik ik, hirak kewisik ken nimin hirak kakno nimin te sipsip mamimtau him mirak, hirak kekine niuk me sipsip miutip miutip, hirak keriyaam keyim kakno wit eik. <sup>4</sup>Hirak kari sipsip mirak hirak kinin kakno. Sipsip hiram misesik mentar hirak keninewem (o keninorem), hiram memtau tonik mekre nikip te hiram misesik. <sup>5</sup>Te mitik hak taau. Hiram mineinik mirir mentar hiram ap memtau tonik mekre nikip kire mitik kerek naanmiprewem (o naanmiprorem) au.”

<sup>6</sup>Jisas katip mit ne Farisi him im, te hir ap nertei menmen werek werek hirak ketporem me hirekes au.

### Jisas katip hirekes kire mitik naanmipre sipsip

<sup>7</sup>Mit netari menmen hirak ketpim te Jisas pike katip kar ik: “Hi hetpi werek werek hi hirekes hire weipir ke sipsip. Hi hikaap mit hir nire sipsip hir nanises him me God. <sup>8</sup>Mit yapirwe nipaa ninin nan naanmipre mit ne Isrel hir mit enun nire mit nekintip menmen. Mit hir nire sipsip ne God ap nises mit in au. <sup>9</sup>Hi hire ya weipir. Neimin nisisa hir nire sipsip naninen nimin niwa, te hir nanu werek maain nanino witeik naninantin yenkis yaaam nanim. <sup>10</sup>Mitik enuk kekintip menmen kaknen te kakit menmen kaknep sipsip kakiwaank menmen. Hi au hi han te hir nani au. Hir nanu werek werek nanir ke God hanhan hir nanwim.

<sup>11</sup>“Hi hire mitik yaaik naanmipre sipsip hi hahi akaap sipsip nai te hir nanu werek werek. <sup>12</sup>Mitik kerek naanmipre sipsip kakit pewek

mamrerim, hiram ap sipsip mirak. Hirak kir nepere iuwe ke yaank kaknen, hirak kinaain kirir te nepere iuwe ke yaank kemiyei sipsip ken kiyaau kiutip kakip, te hiram ham mirir mewep ein mewep ein. <sup>13</sup>Mitik kar ik kirir kentar hirak ap hanhan sipsip au. Hirak naanmiprewem kakit pewek mamrerim keremem. <sup>14</sup>Hi hire mitik yaaik naanmipre sipsip. Hi hertei werek werek mit neimin hir nire sipsip nai, hir nerteiya nisisa. <sup>15</sup>Hi hetike Haai kai werteiyakit mar im. Hi hertei mit nire sipsip nai, hir nerteiya. Hi hetike sipsip nai hanhan meriuwehan te hi hahi akepi. <sup>16</sup>Mit han nire sipsip nai, hir nepu, te hir ap ne weiwik me mit nai ne Isrel au. Hi tewen haryei nantike mit han in te hir nemtau him mai nanisisa. Maain hir nanre weiwik miutip te hi kiutip naanmampror.

<sup>17</sup>“Haai hirak hanhan keriuwa hentar hi hanhan hahi akaap mit te hi pike akrit. <sup>18</sup>Mitik hak ap te kakiyep te hi hahi au. Hi han kai kerekek. God ketpo menmen im te hi ariakem. Hirak katip werek te hi hahi, maain hirak kakwisa hi pike akrit hahu.”

<sup>19</sup>Mit iuwe ne Isrel en hir newepan nau nimin pinan, han kitet menmen im, pinan au han kitet menmen ham nentar him mirak. <sup>20</sup>Mit yapirwe natip, “Herwe kau kekrekek, te hirak han ken sip hirak ketaritari katip menmen im em. Yi yenmak te yi yerp in yemtau him mirak a?”

<sup>21</sup>Mit han natip him mirak ap him me mitik kerek herwe kau kekrek han kirak au. Herwe ap te kiriak mitik nanamir toto enuk ek te hirak kire yaaik kir ein ein werek werek au.

### Mit iuwe ne Isrel neweikin sip newet Jisas

<sup>22</sup>Jisas katip menmen im meit wit Jerusalem me wi mit nererik han tewenin nipaa mit nepir menmen enum mekre winak ke God, hir pike nikaisiu weipir, te hir pike nanino nimin newenipi niuk me God. Me wi im hiram mire hawi hitan. <sup>23</sup>Jisas ken kitet winak iuwe ke God keit haau mit nenenem ‘Hinp ke mitik iuwe King Solomon.’ <sup>24</sup>Hirak wen kepu en, mit iuwe ne Isrel neweikniwek nitiwekhi, “Wi marmenum te ti heteiknai haiu mamirteiyek. Ti etpai werek werek. Ti Mitik God kehimitanit ti akepai haiu mit o au?”

<sup>25</sup>Jisas ketpor, “Hi epei hetpi te yi ap han kitet him mai werek werek au. Menmen yaaim hi hiriakem heriuwe menmen iuwe me Haai kai hiram mewepayapir hi keimin. <sup>26</sup>Yi ap yises him mai yentar yi ap yire sipsip nai au. Nipaa hi hetpiyem! <sup>27</sup>Sipsip nai hir nanimtau him mai hi herteiri niutip niutip hir nisisa. <sup>28</sup>Te hi ekepi te hir nanu nantikewa tipmain tipmain enum eik, hir nani au. Mitik hirak ap te kakri mit sipsip nai te hir ap nanises him mai naniwaank taau. <sup>29</sup>Haai kai kerek kewetau mit in hirak kinin menmen yapirwe. Mitik hak ap kakri mit nisesik te hir nanweikin sip nanwetiwek naniwaank taau. <sup>30</sup>Hi etike Haai kai hawir wekiyakit wepu niutip.”

<sup>31</sup>Hirak katip menmen in epei au, mit iuwe ne Isrel pike neit nan te hir nankip. <sup>32</sup>Jisas kitorhi, “Hi epei hiriak menmen yapirwe me ninaan mi hises menmen Haai kai kehimitena hi hiriakem. Me mekam miutip te yi eiwir nan yayiyep a?”

<sup>33</sup>Mit iuwe ne Isrel netpiwek, “Haiu mamitep me menmen yaaim ti hiriakem au. Haiu mamitep mamantar ti atip enum, ti hire mitik kerekek, te ti hatip ti hirekes hire God.”

<sup>34</sup>Jisas katip, “Him me God mau tiwei hiram matip mar im: <sup>35</sup>‘Hi atip yi yire God.’ Haiu mertei him me God mau tiwei hiram yaaim ap mamweikin matip him ham taau. God katip mit kerek hirak kewetir him mirak hir nire God. <sup>36</sup>God Haai kehimitena hirak keriuweta te hi han hau ti ik ek te yi yenmak yatip hi hatip enum hentar hi etpi hi Nikan ke God a?”

<sup>37</sup>“Hi ap hiriak menmen Haai kai kehimitena, te yi ap eiyises him mai au emit!

<sup>38</sup>Te hi hiriak menmen me Haai kai. Yi yinapen han ekitet him hi hetpiyem me Haai kai keriuweta hi han ti ik yentar hi mitik kerekek. Te yi han ekitet menmen hi hiriakem te yi yayirtei werek werek han ekitet Haai kai God ketikewa hawir wekiyakit wepu han kiutip.”

<sup>39</sup>Hirak katip menmen im epei au, hir pike nantiwekhis nanwisik kakikre winaik enuk, te hirak kinaiwiri ken.

<sup>40</sup>Hirak kinaiwiri pike ken kerekir mani Jordan ken kiun wit kerek nipaa Jon kikir mit, hirak kewiyen. <sup>41</sup>Mit yapirwe hir nan natip, “Jon ap kiriak menmen yaaim kikaap mit enun hir nire yaain kar ke mitik ik kiriakem. Te menmen hirak ketpei me mitik ik ek hiram yaaim werek.” <sup>42</sup>Mit yapirwe nau en, hir han kitet hirak Mitik Kraiskerek God kehimitanek kaknen kakikaap haiu mit.

### Mitik Lasaras epei kaa

**11** <sup>1</sup>Mitik hak kiutip niuk mirak Lasaras, hirak kau wit Betani. Betani hirak wit kerek Maria wetike heiyiuwe pire Mata newi en. <sup>2</sup>(Nipaa mite Maria ip ep wewen tipar yaaim minin yaaim mire natin kipna em mentar hit me Mitik luwe Jisas. Epei au hire pike wenke paan kire pike weyik wesiuniniwekem. Mite ip e hire yenten kire Lasaras. Hirak kinap.) <sup>3</sup>Hirak Lasaras kinap te Maria wetike Mata hir nesiuwe him men Jisas netpiwek, “Kit yinak Lasaras nepei kinap wisenum. Ti enen ekepek te hirak kakre yaaik.” <sup>4</sup>Jisas kementewem, hirak katip, “Lasaras kinap keremem ap te kaki herwe enuk kakno kakisine kakit au. Menmen im man te mit nanwenipi niuk me God, mit nanwenipi niuk mai hi Nikan ke God.”

<sup>5</sup>Jisas han tewenin Mata wetike kikire pire, netike yenten kir Lasaras. <sup>6</sup>Jisas kementau him me Lasaras kinap, te hirak wen kepu wit kerek hirak

kepwi en ere wi wiketerem. <sup>7</sup>Epei au, hirak katip mit disaipel nirak, “Haisu pike emno provins Judia.”

<sup>8</sup>Te mit disaipel newenek natip, “Mitik luwe, ti hanhan pike eno wit kerek nipaa ein mit nau en nanwir nan nanitap a? Ekit haiu emu in!”

<sup>9</sup>Jisas katip kar ik: “Ap 12 aua me hekrit ere hinkewi a? Te mitik kakno kakitet yayiwe ap te kakrewo menmen kakinkewin kentar hirak wepni kir kan ti ik ek, hirak kir yayiwe hirak kitetik. <sup>10</sup>Te hirak kakno kaki witaan, hirak kakrewo menmen te kakinkewin kentar ap wepni kir keteikniwek menmen werek werek.”

<sup>11</sup>Jisas katip him im em epei au, hirak pike ketpor keteipim kar ik: “In ek Lasaras epei kiwaai keit, te hi pike eno akotitek kakikrit kaku.”

<sup>12</sup>Mit disaipel netpiwek nar ik: “Mitik luwe, hirak kiwaai, te hirak maain pike kakre yaaik. Te haiu emu in a?”

<sup>13</sup>Jisas ketpor me Lasaras hirak epei kaa, te hir han kitet hirak keptor hirak kiwaai kerekek.

<sup>14</sup>Mar keremem te Jisas ketpor werek werek kar ik: “Lasaras epei kaa. <sup>15</sup>Te hi han yaaik hi ap hau hetikerek kerek wi hirak kaa kentar maain hi hekepik yi eiyrtei God keriuweta hi han. In ek haiu emno emirek.”

<sup>16</sup>Mitik Tomas hir nekine niuk mirak ham nenewek Didimas, hirak katip mit disaipel han ne Jisas kar ik: “Tis, haiu emno emtike Mitik luwe te haiu mami mantikerek.”

### **Jisas kan kir Lasaras yentenrer nirak hir newepnak**

<sup>17</sup>Maain Jisas kan, mit netpiwek nar ik: “Wi tekyaaat Lasaras kaa, hir newisik kiwaai kekere han kewen kinik.” <sup>18</sup>Wit Betani ap yanimin ke wit iuwe Jerusalem. Au menep kire 3 kilomita. <sup>19</sup>Te mit miyapir yapirwe ne Isrel epei nan Betani nanir Mata wetike Maria, hir enwenor han kir yaaik nentar yenten kir Lasaras epei kaa. <sup>20</sup>Mata wemtau Jisas kaknen, hire wen te wawiyenyipirek wawit yayiwe eik. Te Maria au wepu winak eik.

<sup>21</sup>Mata wan watip Jisas, “Mitik luwe, nipaa ti epei enen ehu in te yenten kai ap te kaki taau. <sup>22</sup>Te hi hertei God in ek kakwetit menmen kerek ti hitiwekhiyem heriuwerem em.”

<sup>23</sup>Jisas jetpiwe, “Yenten kit tewen kakikrit kaku kakre mitik.”

<sup>24</sup>Mata wewenhi watip, “Hi hertei maain hirak kakikrit me wi kerek God kehimitenem skelim mit.”

<sup>25</sup>Jisas ketpiwe, “Hi Haai ke mit pike nanikrit nanu. Hi Haai ke mit nanit himin yaaik. Neimin nises him mai, hir nani, te maain hi pike akian nanu nanit. <sup>26</sup>Neimin kerek nau nisisa hir keriyen nanit himin yaaik nanu nanit tipmain tipmain enum eik. Ti han kitet him mai hisesim o au?”

<sup>27</sup>Mata wewenhi war ik: “O Mitik luwe, hi hises him mit. Hi hisesit hentar hi hertei ti Nikan ke God, ti Mitik kerek God kehimitenit ti han ti ik e.”



### Jisas kikit kerwe kaa

<sup>28</sup>Mata watip him im epei au, hire pike wen wenine kikir pire Maria. Hir wik hasini hire wetpiwe main main war ik: “Mitik luwe epei kan kitauhi hi hetput ti eno ehirek.” Hire wetpiwe epei au, hire wen wiriak menmen. <sup>29</sup>Maria wemtau him im em, hire wesiukin wasenum wen wawir Jisas. <sup>30</sup>Jisas ap epei kan kiun wit ik wen au. Hirak wen kepeit wit kerek Mata epei wen wirek kewiyen. <sup>31</sup>Mit miyapir ne Isrel neit winak kir enwenin han kire hir nir Maria hire wesiuknen wasenum wen, te hir nisesiye. Hir natip, “Hire waunine herwe hei te hire waukitek.”

<sup>32</sup>Te Maria epei wan wiun wit kerek Jisas kewiyen, hire wirek wenke wiwaa hit mirak wewenipiyek. Hire watip, “Mitik luwe, nipaa ti epei enen in ne, te yenten kai ap te kaki au.”

<sup>33</sup>Jisas kirep wikit, te mit miyapir ne Isrel kerek epei netikerep hanhan ek hir nipkitek, hirak han enuk te hirak han kirak kekrit. <sup>34</sup>Te hirak kitiwehi kar ik: ‘Yi yewisik kiwaa inen?’

Hir natip, “Mitik luwe enen ehirek.”

<sup>35</sup>Jisas han teweninek kikitik. <sup>36</sup>Mit han en ne Isrel natip, “Eiyirek, hirak hanhanek wisenuk.”

<sup>37</sup>Te mit han natip, “Hirak nipaa kiriak mitik kerek nanamir toto hirak kir ein ein ek a? Hirak ap te kakikaap Lasaras kaa au a?”

### Jisas kikiak Lasaras kekrit kepu

<sup>38</sup>Jisas han enuk han kekrit, te hirak ken han kerek mit epei newisik kiwaa inen. Han ik kerekek nipaa hir nekinik kekrenan hir newis nan keiyepet him kirak. <sup>39</sup>Jisas katip, “Yi eiyinke nan ik eknepin.”

Mata yenten kire kerek kaa ek, hire watip, “Mitik luwe, hirak epei kaa ere wi tekyaa it epei men, te hirak epei kinin enuk. Ti ap ekeisiuwek ekit!”

<sup>40</sup>Jisas ketpiwe, “Hi hetput ti ehises him mai te ti tewen hahir menmen iuwe me God mamnen.” <sup>41</sup>Hirak katip epei au, hir nenkre nan ken pin, Jisas kikiamnaan katip, “Haai ti yaaik ti epei emtau menmen hi hituthiyem. <sup>42</sup>Hi hertei me wi yapirwe ti hemtau him mai, te hi hatip him im em hentar mit in en, te hir nanirte i ti heriuweta hi han ti ik ek.”

<sup>43</sup>Hirak kitehi God menmen im epei au, hirak kenine him iuwe kar ik: “Lasaras, ti etpaan enen witeik.” <sup>44</sup>Te mitik kerek kaa ek hirak ketpaan kan witeik. His hit mirak hir newenkekim meriuwe laplap kerek nipaa hir neiyim newisik ek, te laplap ham mewenkiwewek ninaan mirak. Jisas ketpor, “Yi eisiupeniwek laplap einaiwirek ekno.”

**Mit iuwe ne Isrel nimenipinan natipan naninep Jisas kaki**  
(Mt 26:1-5; Mk 14:1-2; Lu 22:1-2)

<sup>45</sup>Mit miyapir yapirwe ne Isrel kerek epei nan nir Maria, hir nir menmen Jisas kiriakem, te hir han kitet hirak Mitik kerek God keriuwetek kan ti ik. <sup>46</sup>Au, mit han pike nen natip mit ne Farisi me menmen Jisas epei kiriakem.

<sup>47</sup>Te mit ne Farisi netike mit iuwe ne pris netike mit ne kaunsil hir nererik natip nar ik: “Haisu emriak mekam? Hirak epei kiriak menmen iuwe mar im! <sup>48</sup>Te haisu mamwisik kakriak menmen mampar im, te mit yapirwe nanisesik. Mit nanisesik, te mit iuwe ne wit Rom nansiuwe ami naninen nanwen winak iuwe ke God hir naniwaankai haisu mit ne Isrel!”

<sup>49</sup>Mitik hak niuk mirak Kaifas, kerek me tito im hirak hetpris kinin pris yapirwe, hirak ketpor, “Yi hiras ap yertei menmen mei kike taau! <sup>50</sup>Yi ap yertei werek hiram yaaim te mitik kiutip ik kaki, haisu mit yapirwe ne weiwik me Isrel au.”

<sup>51</sup>Hirak ap katip im em me han kirak. Au, hirak mitik het pris kerek kinin naanmipre mit en me tito im em, te hirak katip him kire profet kar ik ek: Jisas kaki kakikaap mit ne Isrel keriyen. <sup>52</sup>Hir keriyen au, hirak kaki te kakri mit miyapir nire nikerek yapirwe ne God nau nerer wit wit naninen nanire mit ne weiwik miutip. <sup>53</sup>Me wi in ere maain, mit iuwe ne Isrel nimenipin naninep Jisas. <sup>54</sup>Mar keremem te Jisas ap ken kitet yayiwe yaaik ke mit ne Judia. Hirak kinaiwiri hirak ken yaank weinik mit ap newi en, ken wit hak niuk mirak Efraim. In ek hirak kau ketike mit disaipel nirak.

<sup>55</sup>Wi me mit ne Isrel nererik nanim menmen han tewenin nipaa God kenep mit ne Isip, hiram epei man menep. Wi me mit nererik nanim menmen wen au, hir mit miyapir ninaaiwir wit kir niniu nen wit Jerusalem me nanwet pris menmen te God kaktip hir yaain, nanir ke him me Moses ketpim. <sup>56</sup>Hir yapirwe nipiun wit Jerusalem, hir ninatin Jisas. Hir neit winak iuwe ke God nimin ein, hir nitehiyan natipan, “Yi han kitet mekam? Hawir han kitet hirak ap te kaknen in kakim menmen kaktike mit miyapir in taau.” <sup>57</sup>Mit iuwe pris netike mit ne Farisi epei natip mit neimin nertei Jisas keit nein, te hir eninen nanitpor te mit iuwe nanino nantiwek his nankip.

**Maria wewen tipar minin yaaim mentar hit me Jisas**  
(Mt 26:6-13; Mk 14:3-9)

**12** <sup>1</sup>Maain wi ham Jisas pike kan wit Betani, wit kerek Lasaras kewiyen. Hirak mitik kerek Jisas kikiak te pike kekrit. Me wi im, wi hispinak kiutip (6) wen mepu ere mit nererik nanim menmen me Pasova. Me wi im mit hir han tewenin nipaa God kenep mit ne Isip, te hir

Isrel au. <sup>2</sup>Mit en hir epei nemani menmen me Jisas kakim neit wit kir eik. Mata wikaap mit kerek newetir menmen. Mitik Lasaras kau ketike Jisas tekiyakit taam menmen. <sup>3</sup>Te mite niuk mire Maria, hire yenten pe Lasaras wekin min tipar me nu nad minin mekrerem me mit hir newir pewek iuwe nantiwem, hire wewenem mentar Jisas hit mirak. Epei au, hire wesiunenim meriuwe paan kire. Tipar yaaim minin mekre winak au han iuwe kewen. <sup>4</sup>Mitik disaipel hak kiutip ke Jisas niuk mirak Judas ke Iskeriot, kerek maain kakwepyapir Jisas kakno his me mit iuwe ne Isrel, hirak katip, <sup>5</sup>“Nenmak te mit ap neit tipar yaaim minin im em nesiwerem nanit pewek mererim mar 300 kina te hir enwet mit enun ap netenen menmen enwetirem?” <sup>6</sup>Hirak ap han tewenin mit enun ap netenen menmen au. Hirak enuk kekintip menmen. Hirak naanmipre tikenup kerek Jisas ketike disaipel nirak newis pewek mekretek ek te hirak kekenenim kisawinem. <sup>7</sup>Hirak katip kenerep, te Jisas ketpiwek, “Ewisiye ewirp! Hire wetenen menmen im wiriakem me maain hi hahi hir mit nanwisa akre hei. <sup>8</sup>Mit enun netenen menmen au hir nanu nantikewi hekrit, te hi au. Wi ham hi anaiwiri.”

### **Hir mit iuwe pris natip naninep Lasaras kaki**

<sup>9</sup>Mit yapirwe ne Isrel nemtau Jisas keit wit Betani, te hir nen en nanirek. Hir ap nanir Jisas kiutip kerekek au. Hir nanir Lasaras kerek Jisas kikiak kaa ek pike kekrit kau. <sup>10</sup>Te mit iuwe pris nimenipin naninep Lasaras ketike Jisas. <sup>11</sup>Mit yapirwe neweikin sip newet him me mit iuwe ne Isrel hir nises Jisas, nentar menmen Jisas kiriakem.

### **Jisas ken wit Jerusalem kire mitik iuwe king** (Mt 21:1-11; Mk 11:1-11; Lu 19:28-40)

<sup>12</sup>Maain wi ham hekrit, mit yapirwe kerek epei nan nererik nanim menmen me wi Pasova kerek hir han tewenin God kenep mit ne Isip, hir nemtau Jisas kaknen wit Jerusalem. <sup>13</sup>Te hir neit wapnake neiyim nen newenyipirek neit yayiwe eik. Te hir ninap natip,

“God ti yaaik. Haiu emwenipi niuk me mitik ik kan kakikrehir ke ti Mitik luwe God.

Ti akaap mitik ik naanmamre haiu mit ne Isrel.” <sup>14</sup>Jisas kinapin donki (hirak kire hos), te hirak kewik kar ke him me God mau tiwei metpim mar im:

<sup>15</sup>“Yi mit yau wit Saion, yi ap einapen!

In ek Mitik luwe ki kaknen kakri kau donki wen yaaik kipniu.”

<sup>16</sup>Mit disaipel nirak ap nertei nenmak hir niriak menmen im ere maain Jisas kaa pike kekrit ken wit ke God kakit niuk iuwe. Maain hir han kitet menmen nipaa tiwei me God metpim, hir nertei nenmak hir nerekyiwek im em.

<sup>17</sup>Mit yapirwe kerek nipaa nau netike Jisas me wi kerek hirak kenine Lasaras nipaa hirak kaa te hirak kekrit kekre herwe hei kan. Mit in nir menmen im, te hir nen newepyapir menmen hirak kiriakem. <sup>18</sup>Mar keremem te hir mit yapirwe nen newenyipir Jisas. Hir nemtau Jisas kiriak menmen iuwe mar im. <sup>19</sup>Te hir mit ne Farisi nesiuwehan him natipan nar ik: “Yi eiyiri! Menmen haiu miriakem ap te mamwenek taau! Mit yapirwe ne ti ik nisesik.”

### **Mit han ne Grik hanhan nanir Jisas**

<sup>20</sup>Mit han ne weiwik me Grik nan Jerusalem netike mit han ne Isrel, te hir nererik naam menmen han tewenin wi nipaa God hirak kenep mit ne Isip. <sup>21</sup>Hir nan nir mitik Filip (hirak ke wit Betsaida keit provins Galili), te hir natip, “Mitik iuwe haiu hanhan mamir Jisas mamitpiwek menmen.” <sup>22</sup>Filip ken katip Endru, te hirakit wiketeret ten tatip Jisas.

<sup>23</sup>Jisas ketpiwekit, “Wi apei menep man te hi Mitik ke wit ke Mitik luwe, God kakweto niuk mirak yaaim iuwe hi etiwem. <sup>24</sup>Hi hetpi him werek. Yehes kei kiutip ke rais kinatin kiwaa ti au, te yehes kiutip kerekek karpau. Yi eikir ekikre ti, te kakine nikim yapirwe. Mar im hi hir mit nanwisa akre hei. Maain hi akrit hi akaap mit yapirwe nanises him me God. <sup>25</sup>Neimin hanhan nanises han kir naniwaank hiras. Neimin ap nises han kir nau ti ik ek, hir nises han ke God, te maain han kir kaku werek werek tipmain tipmain enum eik. <sup>26</sup>Mit neimin nanriak menmen mai hi hiriakem, te hir enisisa hir nani nanir ke hi hahi. Wit kerek hi hewiyen te mit niriak menmen mai hir nanwiyen. Te Haai kai kakwis niuk mir iuwe kentari hir nisisa.

### **Hir mit enwenipi niuk me hi Mitik ke wit ke God**

<sup>27</sup>In ek han kai kekrit kehinhin te hi atip mekam? Te hi atip Haai hi anaaiwir menmen im mamnen mamiyep? Au, mar keremem te hi han hau ti ik e. <sup>28</sup>Haai, ti enip niuk me mit emre iuwe!” Jisas katip kar ik te him meke nepni man matip mar ik: “Hi henip niuk mai mire iuwe, te hi pike ariakem mamre iuwe.”

<sup>29</sup>Te mit yapirwe nerp menep nemtau him kerekek, te hir natip, “Nepni mewenin.” Mit han au, natip, “Mitip ensel ke God ketpiwek.” <sup>30</sup>Jisas ketpor, “Him em ap man me menmen mai mamkepa au. Hiram man te mamikepi yi eiyirtei God keriuweta hi han ti ik e. <sup>31</sup>In ek, wi epei man, te God skelim hir mit nau ti ik ek me menmen enum nipaa hir niriakem. In ek hirak kakinin Seten kerek naanmipre menmen enum me ti. <sup>32</sup>Te maain mit nanwenkika hi ahu nu tentarakit, te hi ari han ke mit yapirwe nanisisa.” <sup>33</sup>(Jisas katip him im keteikin mit karkeik te hirak kaki.)

<sup>34</sup>Te mit yapirwe pike newenhi natip nar ik: “Hir haiu misesim nipaa mit newisim mau tiwei hiram matip mitik kerek God kehimitanek

kakikaap mit en te hirak kaku kakit tipmain tipmain enum eik. Ti henmak te ti hatip mitik ke wit ke Mitik luwe mit han hir nanwenkekik hirak kaki? Keimin hirak Mitik ke wit ke Mitik luwe God a?”

<sup>35</sup>Jisas kewenhi ketpor him tok piksa kar ik: “Wepni kakir kike kau nimin ke yi mit. Yi eiyitet yayiwe me wi wepni (o yanm) kir, te yi eiyu werek, te witaan ap mamsawin yayiwe. Maaïn hi anaiwiri ano, yi eiyir mitik kerek ke witaan kakno kepitari yayiwe hirak ken nein. <sup>36</sup>Yi eiyisisa hi hire wepni (o yanm) wi hi hepu in, te maain yi yire mit yi eiyises menmen yaaim.”

### **Mit yapirwe ne Isrel ap nises him me Jisas**

Jisas katip menmen im epei au, hirak ken kisawin hirekes kenpin kekeipnor. <sup>37</sup>Hir mit nipaa nirek kiriak menmen iuwe kikaap mit ninap hir nire yaain, te hir ap han kitet hirak Mesaia, mitik kerek God keriuwetek kan ti au. <sup>38</sup>Hir ap nisesik, te him nipaa mitik profet Aisaia ketpim kewisim mau tiwei mamnen mar im:

“Mitik luwe, neimin nises him maiu? Mit auye!

Mitik luwe keteikin menmen mirak iuwe men neimin?

Mit yapirwe!”

<sup>39</sup>Te mit ap nisesik nentar him nipaa Aisaia pike kewisim mau tiwei mar im:

<sup>40</sup>“God hirak kesor nanamir (o naan) kir te hirak tokik kepu, hirak kenipi te hir han toenuk.

Te hir ap nir menmen werek werek au, hir ap nertei menmen werek werek.

Hir nertei menmen werek werek, te hir nanisesik te hirak kakikepi hir nire yaain, te hir au.”

<sup>41</sup>Mitik profet Aisaia katip menmen im kentar hirak kir Jisas keit niuk mirak iuwe te hirak kewepyapirek.

<sup>42</sup>Me wi im, mit iuwe ne Isrel yapirwe hir nises Jisas. Hir ninapen mit ne Farisi, te hir ap newepyapir hir nises Jisas. Hir natip te mit ne Farisi nanipiri naninepin nankeipin winak kerek mit nererik nekine him me Moses neitai. <sup>43</sup>Hir hanhan iuwe mit nantip hir yaain, te hir hanhan kike God hirak kakitpor hir yaain. Hiram menmen weinim.

### **Maain Jisas skelim mit nanit wit ke God kakriuwe him nipaa hirak katip mit em**

<sup>44</sup>Jisas katip him iuwe kar ik: “Neimin nisisap ap nisisa hi kiutip kerekek au. Hirak kises Mitik luwe kerek keriuweta hi han ti ik e.

<sup>45</sup>Neimin nira, te hiram mamir ke hir nir Mitik luwe kerek keriuweta hi han ti ik e. <sup>46</sup>Hi han ti ik ek, hi hire wepni kir. Mit neimin niutip

niutip kerek nisisa, hir ap nanu enum nanir ke mitik ke witaan kau auye!

<sup>47</sup>Neimin nemtau him mai te ap nisesim, hi ap skelim hir mit au. Hi ap han ti skelim mit nau ti ik ek au. Hi han te hi akepi. <sup>48</sup>Mitik keimin ke yi mit keweikin sip keweto ap kemtau him mai, maain menmen mekam skelim mitik ik a? Me him kerek nipaa hi hetpiyem, hiram skelim mitik ik me wi kerek God skelim mit. <sup>49</sup>Menmen im hiram werek mentar hi ap hises han kai hetpim au. Haai kerek keriuweta hi han ketpo him te hi ewepyapirem. <sup>50</sup>Hi hertei him hirak ketpim mamriak mit nanu werek tipmain tipmain enum eik. Menmen hi hetpiyem hiram menmen Haai kai ketpewem.”

### Jisas kekemyetit hit me mit disaipel nirak

**13** <sup>1</sup>Wi me mit nererik nanim menmen me Pasova kerek hir han tewenin God kenep mit ne Isip teipmen mamnen. Jisas kertei wi mirak epei man te hirak kaki kaknaaiwir ti ik, te hirak pike kakno kakir God Haai. Hekrit hekrit hirak han tewenin mit nirak yaain nau ti ik ek. (Hirak han tewenini ere maain hirak kaki.) Te in ek hirak kakteiknor hirak han tewenini wisenum. <sup>2</sup>Jisas ketike mit disaipel nirak naam menmen. Seten epei kakri han ke Judas, nikan ke Saimon ke wit Iskeriot, te hirak kakwepyapir Jisas kakwet mit enun ek. <sup>3</sup>Jisas kertei Haai kirak God epei kewetiwek menmen iuwe werek, hirak kertei hirak kan keke wit ke God, te hirak pike kakno kakirek. <sup>4</sup>Te Jisas kekrit kekeipin yeno kerek hir naam menmen menterim em, kenemtin laplap saket men, te hirak kakir laplap taul nokik mau mamin mirak. <sup>5</sup>Epei au, hirak kewen tipar mekre tikenup kekemyetit mit disaipel nirak hit hiyap mir. Hirak kesiunenim keriuwe taul kerek kakir kau mamin mirak em, kire mitik enuk weinik kiriak menmen me mit iuwe nirak.

<sup>6</sup>Jisas ken kakir Saimon Pita, te hirak Pita ketpiwek, “Mitik luwe, ti henmak te ti hekemyetit hit mai?”

<sup>7</sup>Jisas kewenhi ketpiwek kar ik: “In ek ti ap hertei menmen in ek hi hiriakem. Te maain ti tewen erteiyem.”

<sup>8</sup>Pita katip Jisas, “Ti ap te ekemyetau hit mai taauye!”

Te Jisas pike ketpiwek, “Hi ap akemyetut hit, te ti ap har ke mitik disaipel kai taau!”

<sup>9</sup>Saimon Pita kewenhi katip kar ik: “Mitik luwe, ti ap ekemyet hit mai keremem au. Ti akemyetit his metike paan.”

<sup>10</sup>Jisas katip, “Keimin kisisa hirak kire mitik kerek epei kikir, hirak yaaik prar prar, te hirak ap pike kakikir hirekes. Au, me hit miutip keremem, hirak ekikirem. Yi yapirwe yi yaain yire mit epei nikir prar prar neit. Kiutip kerekkek au. Hirak kire mitik hapik mewik.” <sup>11</sup>Jisas epei kertei keimin kerek maain kakwepyapirek kakno his me mit enun, te hirak katip mit nirak, “Yi mit han ki kire mit epei nikir prar prar. Te kiutip au han kirak enuk kire mitik ap kikir hapik mewik.”

<sup>12</sup> Jisas epei kekemyetit hit mir epei au, te hirak pike keriuwet saket mirak mire laplap, te hirak pike kau yeno. Hirak kau yeno, hirak kitorhi, “Yi yertei hi henmak te hi epei herekiyem o au? Hi hetpi. <sup>13</sup> Yi yenewa hi Mitik luwe enuk hi ewepiyapir him. Hiram werek te yi yenewa mar im yentar hi hirekes luwe kerekek. <sup>14</sup> Hi Mitik luwe ki hewepiyapir him, te hi hekemyeti hit. Yi yises menmen hi herekiyem, yi eikemyetit hit me ni yinan, yar ke mitik enuk weinik kirak menmen me mitik iuwe kirak. <sup>15</sup> Hi epei ateikniyem te yi eiysesim empar kerek hi epei herekiyem. <sup>16</sup> Hi hetpi werek. Mitik kiriak menmen me mitik hak, hirak ap te kakininek me menmen taau! Mitik kerek keriuwet mitik hak katip mit him mirak, hirak iuwe kininek. <sup>17</sup> In ek yi yertei menmen ti hetpiyem werek yi eiysesim eiriakem. Hiram mamkepi te yi han yaaik eiyu.

<sup>18</sup> “Hi ap hatip me yi yapirwe. Hi hertei neimin kerek hi nipaa hehimiteni en. Te him mau tiwei me God em matip menmen mamnen mamir im:

‘Mitik kere hi hewetiwek menmen hirak kaam, hirak kerekyo enum.’

<sup>19</sup> In ek hi hetpi menmen in. Maain menmen im mamnen mamiyep, te yi eiyrtei hi Mitik ik kerek God keriuweta hi han akaap mit ne ti.

<sup>20</sup> Hi hetpi him werek! Keimin hirak kakithis mit naanmampror kerek hi heriuweti nanino ek, hirak kakir hirak kaktauhish. Keimin kaktauhish naanmiprau, hirak kakir ke hirak kakithis Mitik luwe kerek keriuweta hi han in.”

### **Jisas katip Judas maain kakwepyapirek te mit enun nankip**

*(Mt 26:20-25; Mk 14:17-21; Lu 22:21-23)*

<sup>21</sup> Jisas katip him im epei au, hirak han enuk kekere han kirak, te hirak kewepyapir ketpor him im. “Hi hetpi werek, Mitik kiutip ke yi mit hirak maain kakwepyapir kakime yipir mit enun hir naniyep.”

<sup>22</sup> Te mit disaipel niutip niutip niwaainaan niran. Hir nepitari hirak katip mitik keimin. <sup>23</sup> Mitik disaipel kiutip hi John hirekes kerekek Jisas hanhana, hi hau hirapit Jisas menep. <sup>24</sup> Saimon Pita kitauhi keriuwe his katip, “Ti hitiwekhi hirak katip ke keimin.”

<sup>25</sup> Pita kitauhi epei au, hi mitik disaipel ik ek henke hau hirapit Jisas hitiwekhi, “Mitik luwe, keimin kakriak menmen im?”

<sup>26</sup> Jisas ketpo kar ik: “Hi hatip bret ik ek kerek hi awisik ekre min tipar mekrerek, te hi ewet mitik kere kakriak menmen im em.” Hirak katip epei au, hirak kewet Judas nikan ke Saimon ke wit Iskeriot bret ik hirak kaak. <sup>27</sup> Judas keit bret ik kaak epei au, Seten kan kari han kirak, te Jisas ketpiwek kar ik: “Ti eno waswas eriak menmen ti hanhan eriakem.”

<sup>28</sup> Haiu mit kerek mekiyan maam menmen em ap mertei mekam Jisas ketpiwekem. <sup>29</sup> Haiu mit disaipel mertei Judas ketenen pewek maiu mekre tanik, te haiu mit han kiau han kitet Jisas ketpiwek kakno kakwir

pewek keiyim kakit menmen me haiu mamim, o hirak ketpiwek hirak kakno kakwet mit kerek ap netenen menmen kakwetir pewek mei. <sup>30</sup>Te Judas keit bret wasenum, hirak ketpaan ken witeik. In ek hirak witaan toto.

### Jisas katip mit nirak him ham yaaim hir enisesim

<sup>31</sup>Judas epei ken witeik, Jisas katip, “In ek hi Mitik ke wit ke Mitik luwe ahit niuk iuwe me menmen hi ariakem akaap mit. Te in ek God kakit niuk iuwe kentar menmen hi ariakem. <sup>32</sup>God kakit niuk iuwe, te hirak kakteikin mit hi Mitik ke wit kirak kakteiknor hi niuk mai iuwe. Hirak kakriakem waswas. <sup>33</sup>Nikerek nai hi ap te hahu ti ik ek atikewi wi yapirwe. Maain yi yayin yayitno te hi hetpi him im em. Hi epei heptip mit iuwe ne Isrel em mar im: ‘Yi ap te yaino wit kerek hi anori en.’ <sup>34</sup>Hi etpi him ham yaaim yi eiyisesim. Yi han etweninan eiyir ke han tewenini, te yi han etweninan emit ek keremem. <sup>35</sup>Yi han teweninan, te hir mit nerer wit wit nanri nantip yi disaipel ne hi Jisas.

### Jisas katip Pita kakweikin sip kakwetiwew

*(Mt 26:31-35; Mk 14:27-31; Lu 22:31-34)*

<sup>36</sup>Saimon Pita kitiwekhi kar ik: “Mitik luwe ti eno nein?”

Jisas ketpiwek, “Ti ap ehisisa eno wit kerek hi anori en. Te maain ti ehisisa.”

<sup>37</sup>Pita kitiwekhi, “Mitik luwe ti henmak te hi ap ehisesit in ek a? Hi epei hanhan hahi akepit.”

<sup>38</sup>Jisas kewenhi katip, “Ti werek te ti hanhan hahi akepa a? Hi etput him werek. Suware ap te kaknep enum wen au, te ti ehiune atip wikak ti herteiya au.”

### Jisas hirak kire yayiwe te mit nanisesik hir nanino God Haai

**14** <sup>1</sup>Jisas wen katip kar ik: “Yi ap han enuk te yi han ekitet menmen au emit! Yi yises God, te in ek yi eiyisisa. <sup>2</sup>Winak ke Haai kai haau yapirwe mekrerek. Hi ehinin ano etnini wit kakmeriri. Hi etpiyem mentar menmen im mepu. Au hi ap te etpiyem. <sup>3</sup>Maain hi epei hetnini wit epei au, te hi pike anen atihis yainen, te yi eiyu wit kerek hi hewiyen. <sup>4</sup>Yi yertei eiyises menmen te yi einu wit kerek hi enori en.”

<sup>5</sup>Mitik Tomas katip Jisas, “Mitik luwe, haiu ap mertei nein ti enori en. Emirkeik te haiu emirkeik te haiu emirtei yayiwe kakno keriyen a?”

<sup>6</sup>Jisas ketpiwek, “Hi hire yayiwe, te mit nanir God. Hi Haai ke him yaaim, hi Haai ke menmen mamkaap mit nanit himin yaaik kaku kakit tipmain tipmain enum eik. Neimin nanino Haai kai God ek, te hir nanisisa nanre hir nitet yayiwe. <sup>7</sup>In ek yi epei yerteiya. Te yi yayirtei Haai kai God. Te in ek ere maain yi yerteiyek, yi nepei yirek.”



<sup>8</sup>Mitik Filip katip Jisas, “Mitik luwe, to eteiknai God Haai, te haiu han yaaik emu.”

<sup>9</sup>Jisas ketpiwek, “Nipaa enum eik hi epei hau hetikewi wi yapirwe, te in ek Filip, yi wen au yepitari menmen? Neimin epei nira, te hir epei nir Haai kai. Ti henmak te ti hitauhi, ‘Eteiknai God Haai hirak kire mekak a?’ <sup>10</sup>Filip ti ap hertei Haai kai God ketikewa hawir wekiyakit wau niutip? Menmen hi hetpiyem hirak ap him mai au. Haai kerek kau kekre han kai hirak kerekek kises han kirak kiriak menmen mirak. <sup>11</sup>Yi eiyises him hi etpiyem kerek hi etpi hi hetike Haai kai God hawir wekiyakit wau niutip. Te him im au yi eiyir menmen kerek hi hiriakem hikaap mit ninap his hit enum nire yaain, te yi eiyirtei hi etike Haai kai hawir wekiyakit wau niutip. <sup>12</sup>Hi hetpi him werek. Mit neimin nanisisa, hir nanriak menmen iuwe mamir ke hi hiriakem. Menmen hir nanriakem hiram maminin menmen mai mamintar hi ano ahir Haai kai ehu etikerek esiuwe God Himin Yaaik kaknen kakikaap yi mit. <sup>13</sup>Te hi eweti menmen kerek yi eiyitehi God em meriuwe niuk mai iuwe. Hi ewetiyem, te mit nanwenipi niuk me God Haai nanintar menmen hi arekiyiem. <sup>14</sup>Yi eiyitauhi menmen heriyai heriyai eiriuwe niuk mai iuwe, te hi ariakem ewetiyem.

#### **Jisas katip hirak kaksiuwe Himin Yaaik ke God kaknen**

<sup>15</sup>“Yi hanhana, te yi eiyises him hi hetpiyem. <sup>16</sup>Hi tewen ehitehi Haai kai kakweti keiyak kaknen kakikepi kaku kaktikewi tipmain tipmain enum eik. <sup>17</sup>Hirak God Himin Yaaik kaktip mit him yaaim kakikre han kir. Hirak ap kaku han ke mit ne ti kentar hir ap nirek nerteiyek. Te yi eiyirteiyek eiyintar hirak kaku kaktikewi kaku kakikre han ki. <sup>18</sup>Maain wi hi ano wit ke Haai kai, hi ap enaiwiri te yi yayu weinim eiyir ke nikan miye haai aurek. Au, hi pike anen. <sup>19</sup>Wi epei menep te mit ne ti ik ek ap te pike nanira au. Te yi eiyira. Maain yi yayi yi pike yaiyikrit yayu eiyintar hi hahi hi pike akrit ehu. <sup>20</sup>Maain hi pike ekrit ehu, yi eiyirtei hi etike Haai kai God hawir wekiyakit wau niutip. Yi eiyirtei hi hetikewi haiu mekiyan mau niutip.

<sup>21</sup>Mit neimin nertei him mai nisesim, hir keriyen hanhana. Te Haai kai hanhani kentar hir hanhana. Te hi hanhani heteiknor hekre han kir hi hau hetikeri.”

<sup>22</sup>Mitik Judas hak (ap mitik Judas ke wit Iskeriot au) hirak katip, “Mitik luwe, ahirkeik te ti anen eteiknai hirekes, te mit yapirwe ne ti ik ek au a?”

<sup>23</sup>Jisas ketpiwek, “Mit neimin hanhan nanises him mai, te Haai kai hanhani. Te Haai kai ketikewa hawir wawu wawikre han kir. <sup>24</sup>Mit neimin ap hanhana ap nanises him mai au. Him kerek hi epei etpiyem em ap mekre han kai man au. Hiram menmen me Haai kai kerek

keriuweta te hi han ti ik ek, hiram man. <sup>25</sup>“Hi hepu hetikewi te hi epei hetpi him im em. <sup>26</sup>God Himin Yaaik kakikepi, God Haai kaksuwarek kaknen kakintera kakteikni menmen yapirwe te kakikepi han tewenin him kerek nipaa hi epei hetpiyem.

<sup>27</sup>“Hi are aneiwiri te hi han yaaik kai kaku kakikri. Hi han yaaik kai hi ewetiyem, hiram mamre han yaaik ke mit ne ti ik ek netiwem au. Yi ap han kekrit einaain menmen mamnen au emit! <sup>28</sup>Yi epei yemtau hi hetpi hi epei eneiwiri ano. Te hi pike anen ari. Yi hanhana, te yi han yaaik hi pike ano ahir Haai kai kentar hirak iuwe kinina kakikepi iuwe te yi eiriak menmen yapirwe. <sup>29</sup>Hi epei hinin hetpi menmen im em in ek me wi menmen ap mamnen wen au. Te maain hiram mamnen, yi eiyirtei hi Mitik kerek nipaa God hirak keriuweta hi han ti ik ek. <sup>30</sup>Hi ap hatip hetikwei yapirwe hentar mitik enuk Seten hirak iuwe kinin naanmpre mit miyapir ne ti ik e kaknen kaktauhish. Hirak ap kinina au. <sup>31</sup>Te hi ewisik hirak kaktauhish, te mit yapirwe ne ti ik ek, hir enirtei hi hanhan Haai kai God, hi hiriak menmen yapirwe hirak ketpo hi hiriakem. Eiyikrit, emnaaiwir wit ik haiu emno.”

### Hi hire waai yaaim hikaap mit

**15** <sup>1</sup>Jisas katip, “Hi hire waai yaaim. Haai kai God hirak kire mitik naanmpre waai mekre ni. <sup>2</sup>Mit nisisa hir nire nu heneik mari. Neimin hir ap nisisa werek werek, hir nire nu heneik ap mari, te Haai kai kakremir. Nu heneik mari mine nikim, Haai kai keremir yinam ere hiram yaaim te tito ham hiram mamri mamu menep menep. <sup>3</sup>Yi epei yaain yentar him mai hi hetpiyem hiram mau mekre han ki. <sup>4</sup>Yi eiyisisa, te hi ehuekre han ki. Nu heneik ap mau waai, hiram mamri mamine nikim au. Yi mit ap yisisa, te yi ap yiriak menmen yaaim au.

<sup>5</sup>“Hi hire waai, yi yire heneik mai. Neimin hir nisisa, hi hahu akre han kir, hir nanriak menmen yaaim. Yi ap yisisa, te yi yiriak menmen yaaim au. <sup>6</sup>Neimin ap nisisa, God keriuweti nen nire mit neket heneik enum newirem miwaai ti meweivei meit. Maain hir nanit heneik mar im nanwirem mamno si, si tatim. <sup>7</sup>Yi yisisa, him mai mau mekre han ki merekyi yi yisesim, maain yi eiyitehi God menmen yi hanhanem, te hiram mamnen mamir ke yi yitewekhiyem. <sup>8</sup>Yi yiriak menmen yaaim, te mit nanwenipi niuk me Haai kai, te yi yeteikin mit yi mit disaipel nai yi yisisa. <sup>9</sup>Hi hanhan eriuwi har ke Haai hanhan keriuwa. Yi yewisa hi wen naanempri hanhan heriuwi. <sup>10</sup>Yi yises him mai, te yi yewisa hi wen naanmpri hanhan heriuwi har ke hi hises him me Haai kai, te hirak naanmpirau hanhan keriuwa.

<sup>11</sup>“Hi epei etpi menmen im te menmen menipa hi han yaaik mamu maikre han ki, te yi han yaaik iuwe. <sup>12</sup>Hi hetpi him im yi eiyisesim. Yi hanhan yeriuwehan eiyir ke hi hanhan heriuwi. <sup>13</sup>Mitik hak ap kiriak

menmen han kakinin kakteikin mit hirak hanhan keriuwi wisenum, te hirak kaki te kakikepi. <sup>14</sup>Yi yises menmen hi epei etpiyem, yi yire nai yinan. <sup>15</sup>In ek, hi ap atip yi yire mit niriak menmen mai weinim au, hentar mit nirak nar ik hir netari menmen mitik kir kiriakem. Au, hi atip yi nai yinan yentar hi epei etpi menmen yapirwe Haai kai ketpewem. <sup>16</sup>Yi ap yehimitena yi yisisa au. Hi hehimiteni yi yisisa, yi eiriak menmen yaaim, te menmen im mamu mamit. Yi yiriak menmen im, te Haai kakweti menmen menmeiyam yi yitiwekhiyem kakintar yi yisisa. <sup>17</sup>Te hi etpi him mai im: Yi hanhan mit han.

**Mit ne ti maain nanre mit enun nepan netike mit nises him me Kraiss**

<sup>18</sup>“Mit ne ti hir nineini, te yi han ekitet nipaa hir nineina. <sup>19</sup>Yi mit yi yises menmen me ti im e te mit ne ti hanhan neriuwi nar ke hir hanhan hiras. Au, hi hehimiteni yi yisisa, te yi ap ne ti au, hir mit ne ti nineini. <sup>20</sup>Yi han ekitet menmen hi hetpiyem. Mitik kiriak menmen me mitik iuwe kirak ap kininek au. Nipaa hir mit nerekiyo menmen enum, te hir nanrekyi menmen enum. Nipaa hir mit han nises him mai, te maain hir nanises him mai. <sup>21</sup>Hir nanrekyi menmen im enum nanintar yi yisisa. Hir ap nertei God kerek keriuweta hi han, te hir nisesik au. <sup>22</sup>Hi ap han hetpor menmen, hiriak menmen yaaim te mit nanweikin sip nanwet God hiram menmen enum kike. Au, hi epei etpor menmen hiriak menmen yaaim, te in ek hir neweikin sip newet God te hirak kaktip hir niriak menmen enum iuwe hirak kakiwaanki. <sup>23</sup>Neimin nineina ap nisisa, hir ninaain Haai kai ap nisesik au. <sup>24</sup>Hi ap hiriak menmen menmeiyam kerek nipaa mit niriakem au, te hir neweikin sip newet God, hir niriak menmen enum kike. Te hir epei nir menmen iuwe hi hiriakem, hir neweikin sip newet God hir nineina hetike Haai kai. <sup>25</sup>Menmen im hir niriakem epei man, te him mau tiwei hir nisesim hiram mamnen mamir ke him nipaa mit netpim hiram mamnen. Him im matip mar im: ‘Hir nineina nentar menmen au weinim keremem.’

<sup>26</sup>“Maain, hirak kerek kakikaap mit, hirak kaknen. Hirak God Himin Yaai katip him yaaim, hirak keke wit ke God kaknen. Hirak kaknaaiwir Haai, hi eriuwetek kaknen yi mit, hirak kakwepyapir menmen mai kakitpiyem. <sup>27</sup>Yi yetikerek yi yaitip mit me menmen mai yentar nipaa wi kerek hi hinin ewepyapir him mai, yi yetikewa haiu mariyan.”

**16** <sup>1</sup>Jisas katip, “Hi epei hetpi him im em te yi ap einaaiwir him mai yayises menmen ham enum. <sup>2</sup>Te hir mit nanipiri yi yainepin winak ke God kerek hir nererik nekine him me Moses nekrerem. Maain wi mamnen te mit han kitet hir naniwep te hir nankaap God. <sup>3</sup>Hir nanrekyi menmen enum mar im nentar hir ap nertei hi hetike Haai kai God, hir ap nisisawir au. <sup>4</sup>Hi epei hetpi him im te maain win mamnen me hir nanrekyi menmen mar im, yi han ekitet nipaa hi epei hetpiyem.

### Menmen God Himin Yaaik kakriakem

“Nipaa hi ap hetpi menmen in ek hi are etpiyem hentar hi wen hepu hetikewi. <sup>5</sup>Te in ek hi han hahir Haai kai kerek keriuweta hi han in. Te ap keimin ke yi mit hanhan yitauhi, ‘Ti eno nein.’ <sup>6</sup>Te in ek hi epei hetpi, te yi epei han enuk kekere han ki. <sup>7</sup>Te hi hetpi werék. Hirak yaaik kakikepi te hi ano hahintar hi ap ano, te Himin Yaaik kerek kakikepi ek ap te kaknen kaku kaktikewi taau. Hi ano, te hi eriuwetek kaknen kaku kaktikewi. <sup>8</sup>Te maain hirak kaknen hirak kakteikin kaktip mit ne ti ik ek ap nanirtei hir nises menmen enum, ap nertei mekam yaaim, te God skelim. <sup>9</sup>Hirak kakteikin mit hir niriak enum nentar hir ap nisisa. <sup>10</sup>Hirak kakteiknor mekam yaaim iuwe kakintar hi ano ahir Haai kai hirak Himin yaaik kakikrehir kai. Te yi ap pike eiyira au. <sup>11</sup>Hirak kakteikin mit God skelim mit ne ti nises menmen enum kakintar God epei skelim mitik Seten kerek kinin naanmipre ti.

<sup>12</sup>“Hi him yapirwe mepu te hi ap etpiyem hentar in ek yi ap yayirteiyem werék au. <sup>13</sup>Maain God Himin Yaaik kerek katip him yaaim kaknen, hirak kakteikni menmen yapirwe yaaim. Hirak ap te kaktip menmen me han kirak au. Nipaa hirak kemtewem, te hirak kakitpiyem te maain hiram mamnen. <sup>14</sup>Hirak kakwenipi niuk mai kentar menmen kerek hi hetpim, hirak kaktiwem kakitpiyem kekere han ki. <sup>15</sup>Menmen yapirwe me Haai kai God hiram mai. Mar keremem, te hi hatip God Himin Yaaik kakit him mai te hirak kakitpiyem kakikere han ki.

### In ek yi han enuk eiyu, te maain yi han yaaik

<sup>16</sup>“Maain kike yi ap yayira au. Maain wi ham yi pike eiyira.”

<sup>17</sup>Mit han ne mit disaipel nirak nitehiyan nar ik: “Mekam im hirak ketpaiyem katip, ‘Maain yi ap yayira au, maain wi ham yi pike eiyira.’ Him im metike him ham im e: ‘Hi hentar hi eno ahir Haai.’ Kenmak te hirak ketpim?” <sup>18</sup>Hir natipan nar ik: “Mekam him hirak katip: ‘Me wi kike?’ Haiu mepitari him im!”

<sup>19</sup>Jisas kertei hir hanhan nitiwekhi me menmen in te hirak ketpor, “Yi yitehiyan menmen hi etpim me maain kike yi ap yayira, maain wi ham yi pike eiyira a? <sup>20</sup>Hi etpi werék. Maain yi yayikta wisenum han tatwenina, te mit ne ti hir han yaaik iuwe. Yi han enuk eiyu te maain yi han yaaik iuwe. <sup>21</sup>Mite sip newenep weteiknen weriuwe nikerek hire han enuk wenterim. Maain hire wine nikerek hire ap han kitet menmen im mewo au. Hire han yaaik wentar hire wine nikerek. <sup>22</sup>In ek yi han enuk yentar hi hahi, te maain hi pike ekrit ari, te yi han yaaik eiyu. Mitik keyak ap te kakri menmen im yaaim mau mekre han ki au.

<sup>23</sup>“Maain wi eim mamnen, te yi ap eiyitauhi me menmen. Hi etpi werék, yi eiyitehi Haai me menmen in ek, te hirak kakwetiye meyeriuwe

niuk mai iuwe. <sup>24</sup>Nipaa ere in yi ap yitehi God me menmen yentar yi yeriuwe niuk mai iuwe. Yi yitiwekhi menmen yi yaitiwem, te hirak kakrekyi han yaaik iuwe.

### Jisas epei kinin menmen enum me ti

<sup>25</sup>“Hi epei hetpi him mei mire tok piksa, te maain wi mamnen te hi etpi eriuwe menmen im au. Hi etpi eriuwe him yaaim me God Haai, te yi eiyirteiyem werek werek. <sup>26</sup>Maain wi eim mamnen yi yitehi God yeriuwe niuk mai iuwe. Hi ap hitiwekhi menmen me yi mit au <sup>27</sup>hentar Haai kai God hirekes hanhani kakimtau menmen mi yi yitiwekhiyem. Hirak hanhani kentar yi hanhana, yi yertei hi hinaaiwir Haai hi han ti ik. <sup>28</sup>Nipaa hi hinaaiwir Haai hi han ti ik e. In ek, hi hinaaiwir ti ik pike ano ahir Haai.”

<sup>29</sup>Mit disaipel nirak netpiwek nar ik: “In ek ti atip werek. Ti ap atip him tok piksa au. <sup>30</sup>In ek haiu mertei ti hertei menmen yapirwe, te haiu mituthi menmen ti hetpim hiram yaaim au. Haiu mertei ti hinaaiwir God ti han ti eik mentar menmen im ti etpaiyem.”

<sup>31</sup>Jisas ketpor, “In ek yi han kitet yi yertei hi hinaaiwir God han in. <sup>32</sup>Te wi epei man te mit nanripir yi eirir eino ein ein, te hi kiutipen kerekek ehu. Hi kerekek ehu au. God kau ketikewa. <sup>33</sup>Hi epei etpi menmen im te yi yetikewa emkiyan han kiutip emu, te yi han yaaik eiyu. Mit ne ti nanrekyi menmen enum, te yi han tokik eiyu. Hi epei hinin menmen enum mit ne ti hir nisesim.”

### Jisas kitehi God kakikaap mit nirak nisesik

**17** <sup>1</sup>Jisas katip menmen im epei au, hirak kikiamnaan katip kar ik: “Haai, wi epei man. Ti ewenipi niuk mai, hi Nikan kit heriuwe menmen ti herekyewem, te hi ewenipi niuk mit. <sup>2</sup>Ti epei heweto him mit ti atip hiram yaaim werek, te hi ewet mit miyapir ne ti hewetir himin yaaik te hir nanu werek tipmain tipmain enum eik. <sup>3</sup>Mit nertei ti, ti God kiutip kerekek, ti etikewa hi Jisas Krais, Mitik kerek ti heriuweta hi han, hir enirteiyawir enisisawir. Neriuwe menmen im hir nisesim, hiram mamkepi hir nanu werek tipmain tipmain enum eik. <sup>4</sup>Hi heteikin mit miyapir niuk mit iuwe heit ti ik e. Hi epei hiriak menmen ti ehimitanem hi hiriakem. <sup>5</sup>Haai, ti pike eweto niuk mai iuwe kerek nipaa ti kepu wen au, hi hetenenim hau hetikewit.

<sup>6</sup>“Hi epei hewepyapir hatip mit kerek ti ewetori ne ti ik e, hetpor ti hire mekam. Hir mit nit te ti ewetori hir epei nises him mi. <sup>7</sup>In ek hir nertei menmen yapirwe hi hiriakem, nipaa ti ewetewem hi hiriakem. <sup>8</sup>Hi epei hetpor him nipaa ti etpewem, te hir nisesim. Hir nertei ti heriuweta hi heke wit kit hekuwe han in.

<sup>9</sup>“Hi hituthi ti ekaap mit in. Hi ap hituthi ti ekaap mit nises menmen me ti au. Hi hituthi ti ekaap mit kerek ti ewetori hentar hir mit nit.

<sup>10</sup>Menmen yapirwe hi hetenenim hiram mit. Menmen yapirwe ti hetenenim hiram mai. Mit nanirtei niuk mai iuwe nentar menmen mit nai in niriakem. <sup>11</sup>In ek, hi anen arit. Maain hi ap hahu ti ik, te hir nanu ti ik e. Haai Kai Yaaik, ti naanmampror eriuwe niuk mit iuwe, niuk im kerek nipaa ti ewetewem, te mit in nantikewit nankiyan han kiutip nar ke ti etikewa hawir wekiyakit han kiutip. <sup>12</sup>Wi kerek hi hau hetikeri hi naanempror heriuwe menmen iuwe mit. Hir yapirwe nepu werek te kiutipen au kerek hirak kakiwaank hirekes, te him mit kerek mit hir newisim mau tiwei mamnen mamir ke nipaa mit newisim. <sup>13</sup>In ek hi enen arit. In ek hi hatip him im hi hau ti te hir nemtau him hi hetputem hir nanit han yaaik kai iuwe kaku kakikri. <sup>14</sup>Hi epei hetpor him ti etpewem. Mit miyapir nau ti hir nineini nentar mit in hir ap nises menmen me ti nar ke hi ap hisesim. <sup>15</sup>Hi ap hituthi ti etorhis hir ninaaiwir ti ik ek au. Hi hituthi te ti naanempror, te mitik enuk Seten ap kakiwaanki. <sup>16</sup>Hir ap nises menmen me ti mit nisesim nar ke hi ap hisesim au. <sup>17</sup>Ti ehimiteni hir mit nit neriuwe him yaaim mit hi etporem. Him mit hiram yaaim. <sup>18</sup>Hi heriuweti nen mit miyapir ne ti niriak menmen mai nire nipaa ti heriuweta hi hen mit miyapir ne ti hiriak menmen mit. <sup>19</sup>Hi hehimitan hirekes hi ewetut yink kai hi hahi, te hir mit ti ehimiteni hir nisesit werek werek neriuwe him yaaim mit hi etporem.

<sup>20</sup>“Hi hituthi me mit in keriyen au. Hi hituthi ti akaap mit miyapir nanises him mit nanintar him hir mit in nanitporem te hir nanimtwem. <sup>21</sup>Haai, hi hanhan hir yapirwe nankiyan nanu han kiutip, nar ke ti etikewa hawir wekiyakit wau han kiutip. Hi hanhan hir han kiutip nanisisawir te mit miyapir nau ti nanirtei ti heriuweta hi han in. <sup>22</sup>Hi epei ewetir niuk mai iuwe kerek nipaa ti ewetewem, te hir enu han kiutip nanir ke ti etikewa hawir wekiyakit wau han kiutip. <sup>23</sup>Hi hahu ekre han kir har ke ti hau ekre han kai, te hir nekiyan nanu han kiutip te mit miyapir ne ti nanirtei ti heriuweta hi han ti ik. Ti hanhan heriuweri har ke ti hanhan heriuwa.

<sup>24</sup>“Haai, ti epei heweto mit in hir nai. Hi hanhan hir naninen nanu nantikewa nanu wit kerek maain hi hahu en, te hir nanirtei niuk mai iuwe. Niuk mai iuwe im me wi ti hiriak ti wen au, ti hanhan heriuwa ti ewetewem. <sup>25</sup>Haai Kai Yaaik. Mit ne ti ap nerteiyit nisesit werek werek au. Hi kerekek. Mit in hir nertei ti heriuweta hi han. <sup>26</sup>Hi epei hetpor me ti, hi wen etporem te ti hanhani har ke ti hanhana, hi ehu ekre han kir.”

### Mit nan neithis Jisas neiyik nen

(Mt 26:47-56; Mk 14:43-50; Lu 22:47-53)

**18** <sup>1</sup>Jisas kitehi God menmen epei au, hirak kinaaiwir wit ketike mit disaipel nirak hir nerekir hitik Kidron. Ni miutipen mepu in

te Jisas ketikeri nen nau en. <sup>2</sup>Mitik Judas hirak enuk kewepyapir Jisas kertei ni ik ek kentar nipaa me wi yapirwe Jisas ketike mit disaipel nirak nererik nau en. <sup>3</sup>Judas keit mit ne ami han netike mit kerek naanmipre winak iuwe ke God kerek mit iuwe pris netike mit han ne Farisi hir neriuweti nanino, hir yapirwe netike Judas nen ni im em. Hir netenen yipo hennik, hir nemsiu si nen. <sup>4</sup>Jisas kertei menmen yapirwe mit nanrekiwekem, te hirak kinin ken katip, “Yi yinyatin keimin?”

<sup>5</sup>Hir netpiwek, “Haiu man minmatin Jisas ke wit Nasaret mamtiwekhis.”

Hirak ketpor, “Hi hirekes Jisas.”

<sup>6</sup>Judas mitik enuk kewepyapir Jisas kerp ketikeri. <sup>7</sup>Jisas ketpor, “Hi hirekes Jisas,” te mit en hir pike neriuwet nen nenke niwaaai ti.

Hir nen nenke niwaaai ti, Jisas kitorhi keteipim, “Yi yinyatin keimin?”

Hir netpiwek neteipim, “Haiu man minmatin Jisas ke wit Nasaret mamtiwekhis.”

<sup>8</sup>Jisas pike ketpor, “Hi epei hetpi hi hirekes Jisas. Yi epei yan yetauhis te yi eiwis mit nai in nanino.” <sup>9</sup>Hirak katip menmen im, te him nipaa hirak ketpim mamnen mamir em. Nipaa hirak katip, “Haai, mit kerek ti ewetauri, hi ap hinaaiwir keyyak au.”

<sup>10</sup>Saimon Pita ketenen hine ke his, hirak keketik kekere paus kirak kiwaaieykeremir nikip me mitik niuk mirak Malkas, kerek kiriak menmen me mitik pris iuwe. <sup>11</sup>Jisas katip Pita kar ik: “Ti pike ewis hine ke his kakno paus kirak. Hi are ewis mit nanrekiyo menmen Haai kai kehimitan hir nanrekiyewem naniyep nanrewaank.”

### **Mit nari Jisas nen nir mitik iuwe Anas**

<sup>12</sup>Mit ne ami netike mitik iuwe kir, hir netike mit kerek naanmipre winak iuwe ke God, hir neithis Jisas nesenkek his mirak, <sup>13</sup>hir neiyik ninin nen nir mitik Anas. Hirak kenine Kaiafas yenik kirak. Kaiafas me tito im hirak kire mitik iuwe kinin pris han yapirwe. <sup>14</sup>Hirak Kaiafas kerekek nipaa katip mit ne Isrel hiram yaaim te mitik kiutip kaki kakikrehir ke haiu mit yapirwe.

### **Pita kepakin Jisas katip hi epitariyek**

<sup>15</sup><sup>k</sup>Hir neit Jisas neiyik nen ein, Saimon Pita ketike hi disaipel hak wises Jisas. Mitik pris iuwe kinin pris han yapirwe hirak kertei mitik disaipel hak, te hirak ken kerp ke nimin ke niwa keweikin winak. <sup>16</sup>Pita au hirak kerp menep ya wepir ke niwa keit witeik. Hi mitik disaipel kerek mitik iuwe pris kerteiyek, hi pike hen witeik hatip mite werp naanmipre ya wepir te hire weithis Pita weiyik wen nimin. <sup>17</sup>Mite kerek

<sup>k</sup> 18:15 Jo 20:3, 21:20; Mt 26:58

naanmipre weipir eik watip Pita, “Ti ik e mitik hises him me Jisas o au?” Pita ketpiwe, “Hi au.” <sup>18</sup>Nime menep mit niriak menmen me mitik iuwe pris, hir netike mit kerek naanmipre winak iuwe ke God te hir niman si nerp neweikniwem nekinin yink kir. Pita ken kerp ketikeri kekinin yink kirak.

**Mitik iuwe hetpris kitehi Jisas menmen**  
(*Mt 26:59-66; Mk 14:55-64; Lu 22:66-71*)

<sup>19</sup>Mitik nipaa hirak hetpris kitehi Jisas ke mit hir nisesik, kitiwekhi me him hirak katip mit em. <sup>20</sup><sup>1</sup>Jisas ketpiwek kar ik: “Hekrit hekrit hi hepu wit mit nererik, hi hatip mit miyapir menmen. Hi heit winak kerek mit nererik nekine him me Moses o hepu winak tempel ke God wit kerek mit ne Isrel nererik, hi hewepyapir him mai. Hi ap hisawin hatip menmen meiyam au. <sup>21</sup>Te henmak te ti hitauhi menmen? Ti hitehi mit kerek nemtau him mai. Ti hitorhi hi atip mekam. Hir nertei him mai.”

<sup>22</sup><sup>m</sup>Jisas katip menmen im epei au, mitik ke polis kerp menep kiwaai his kakip kesiniwek kar ik: “Ti ap atip mitik pris iuwe enum mar im au emit.”

<sup>23</sup>Jisas ketpiwek kar ik: “Hi atip enum ti atip mit in hiram mekam, o au en, hi atip werek ti henmak te ti eiyp a?”

<sup>24</sup>Hir nitehi Jisas epei au, hir nipaa nesenkikiwek his neriuwe waai hiram wen mepu, mit neriuwetek keriuwerem ken kir mitik hak hirak pris iuwe niuk mirak Kaiafas.

**Pita pike kepakin Jisas katip hi hepitariyek**  
(*Mt 26:71-75; Mk 14:69-72; Lu 22:58-62*)

<sup>25</sup>Pita wen keperp si kekinin yink kirak, te mit han netpiwek nar ik: “Ti etike mit han yises him me Jisas o au?”

Pita kepakinek ketpor kar ik, “Hi au.”

<sup>26</sup><sup>n</sup>Mitik kiutip kiriak menmen me mitik pris iuwe, hirak ke weiwik me mitik kerek Pita keremir nikip mirak, hirak kitiwekhi kar ik: “Nipaa hi herp ni eim, hi hirit ti herp hetikerek yeit ein o au?” <sup>27</sup><sup>o</sup>Pita au kiune keteipim katip kar ik: “Ti hira au.” Hirak katip epei au, suware katip.

**Mit nesiuwe Jisas ken kir mitik ke gavman Pailat**  
(*Mt 27:1-2, 11-14; Mk 15:1-5; Lu 23:1-5*)

<sup>28</sup>Hir mit neithis Jisas ninaaiwir winak ke Kaiafas, hir nesiuwerek ken winak ke mitik iuwe gavman. Hirak wanewik. Mit iuwe ne Isrel hir ninapen nanino winak ke gavman nentar hir nanino nanikre winak ke mitik ap ke

<sup>1</sup> 18:20 Mt 26:55; Jo 7:26    <sup>m</sup> 18:22 Ap 23:2; Jo 19:3    <sup>n</sup> 18:26 Jo 18:1, 10    <sup>o</sup> 18:27 Jo 13:38



weiwik me Isrel, him me Moses matip hir enun ne ninaan me God nar ke mitik hapik mewik. Te hir ap nanim menmen me wi Pasova kerek mit nererik han tewenin God kenep mit ne Isip. <sup>29</sup>Hir ninapan nanino nimin, te mitik gavman Pailat ken witeik kitorhi kar ik: “Yi yesiuwe him mitik ik yentar mekam a?”

<sup>30</sup>Hir netpiwek nar ik: “Mitik ik ap kiriak menmen enum au, haiu ap te meriyaak man in au.”

<sup>31</sup>Pailat ketpor kar ik: “Yi hiras yetiwekhis yesiuwerek kakno kaunsil ni te yi yesiuwek him yises menmen mi nipaa maamrer netpim yi yiriakem me mitik kiriak enum.”

Hir netpiwek nar ik: “Mit iuwe ne Rom ap newisai haiu mamnep mit hir nani.” <sup>32</sup>“(Menmen im epei man te hiram mises him kerek nipaa Jisas katip kakirkeik te hirak kaki.)

<sup>33</sup>Pailat katip epei au, hirak pike ken nimin winak. Hirak kenine mit nanit Jisas neiyik naninen menep. Epei au, hirak kitiwekhi kar ik: “Ti Mitik Iuwe King hinin naanmampre mit ne Isrel o au?”

<sup>34</sup>Jisas kitiwekhi kar ik: “Ti hirekes han kitetim o ti hemtau mit han netputem?”

<sup>35</sup>Pailat ketpiwek kar ik: “Ti han kitet hi mitik ke weiwik me Isrel a? Hi au. Mit ne weiwik me Isrel netike mit iuwe pris nir netuthis neriuwetit ti han in. Ti hiriak mekam?”

<sup>36</sup>Jisas ketpiwek, “Hi ap ehinin naanempre mit ne ti in ek au. Hi naanempre mit in, te mit kerek nisisa hir nankepa nantikeri naninepan, te hir ap nantauhis. Au, hi ehui in ehinin naanmpre mit au.”

<sup>37</sup>Hirak katip epei au, Pailat kitiwekhi kar ik: “Ti mitik iuwe ehinin mit a?” Jisas ketpiwek, “Ti atip hi Mitik Iuwe. Miye pai wina hi herp ti te hi hiriak menmen im miutip. Hi hatip mit him yaaim. Neimin nises him yaaim hir nanimtau him mai.”

<sup>38</sup>Pailat kitiwekhi, “Him yaaim hiram mekam?”

**Pailat katip kewis mit nanwenkek Jisas kau nu tentakakit**  
(Mt 27:15-31; Mk 15:6-20; Lu 23:13-25)

Hirakit tatip epei au, Pailat pike ken witeik katip mit ne Isrel kar ik: “Hi ap hertei menmen enum hirak kiriakem, te hi akip kaki au. <sup>39</sup>Me tito miutip tito miutip hi hises menmen nipaa yi yiriakem. Me wi Pasova hi esiupan mitik enuk kiutip kau kekre winak enuk kaknen yi mit. Yi hanhan hi esiupan Mitik Iuwe ke Isrel ik e o au?”

<sup>40</sup>Hir ninap netpiwek nar ik: “Hirak au. Haiu hanhan ti esiupan Barabas.” (Mitik Barabas hirak mitik enuk kenep mit naa hirak kekintip menmen.)

¶ 18:31 Jo 19:6-7; Ap 18:15    ¶ 18:32 Mt 20:19; Jo 3:14, 12:33    ¶ 18:35 Jo 1:11

\* 18:37 1Ti 6:13; Jo 3:32-33, 8:47

**19** <sup>1</sup>Hir mit en ninap natip menmen epei au, mitik Pailat keit Jisas ken nimin katip mit narak ne ami hir nanwaai nipin nankip. <sup>2</sup>“Hir nakip epei au, hir neit waai nekepen nimaak kire teperiye nekiun kau paan kirak. Epei au, hir neit laplap mire yiwir neriuwetiwekem nar ke mit iuwe ne gavman neriuwetem, te hir nan nititiweknaan natip, <sup>3</sup>““Hau hanhan mitik iuwe king kinin naanmipre mit ne Isrel kaku tipmain tipmain enum eik.” Epei au, hir niwaai his nakip.

<sup>4</sup>“Epei au, hirak Pailat pike ken witeik katip mit en kar ik: “Yi eiyimtau. Hi etiwekhis eiyik enen witeik te yi yertei hi epitari menmen miutip hirak kiriakem te hirak kaki kakinterim.” <sup>5</sup>Hirak katip epei au, Jisas ketpaan kan witeik keriuwe waai nekepen kau paan kirak laplap mire yiwir mau yink kirak. Jisas kan witeik, Pailat katip, “Yi eiyirek. Hirak mitik ik e.”

<sup>6</sup>“Mit iuwe pris netike mit kerek naanmipre winak iuwe ke God nirek, hir ninap natip nar ik: “Yi eiwenkekik eku nu tentarakit. Yi eiwenkekik eku nu tentarakit.” Hir ninap natip, te Pailat ketpor, “Yi yaitiwekhis eiwenkekik eku nu tentarakit. Hi epitari menmen enum hirak kiriakem, te hirak kaki kakinterim.”

<sup>7</sup>“Mit iuwe ne Isrel natip nar ik: “Him lo mekre tiwei hau misesim hiram matip hirak eki ekintar hirak katip hirak Nikan ke God.”

<sup>8</sup>Pailat hirak kemtau him im, te hirak kinaain wisenum kentar Jisas katip hirak Nikan ke God. <sup>9</sup>Hirak kari Jisas keyiyik kan winak iuwe eik kentar hirak han kitet Jisas hirak Nikan ke God. Te hirak kitiwekhi kar ik: “Ti ekine wit kit keik.” Jisas au, kekintip keit. <sup>10</sup>Pailat ketpiwek, “Ti henmak te ti etpo au? Ti epitari hi iuwe te hi esiupenit o hi ewenkekit ehu nu tentarakit a?”

<sup>11</sup><sup>z</sup>Jisas ketpiwek, “Ti iuwe hinina hentar God kewisit ti hiriakem. Mitik kerek keriuweta hi han hau his mit hirak kiriak menmen enum wisenum. Ti au hiriak enum kike.”

<sup>12</sup>“Pailat kemtau him im hirak han kitet karkeik te hirak kaksipuan Jisas. Au, mit ne Isrel netpiwek nar ik: “Ti esiupanek ti ap ekaap mitik iuwe Sisa keit Rom. Keimin katip hirak mitik iuwe kinin mit, hirak mitik enuk kepan ke Sisa.”

<sup>13</sup>Pailat kemtau him im, hirak keithis Jisas keyiyik ken witeik kau yeno ke mitik iuwe masistret keit wit niuk mirak “Ya nan” (Mit ne Isrel nekine wit ik “Gabata”) <sup>14</sup>Wi im hiram wi mit ne Isrel nemani menmen me wi Pasova kerek hir hantewenin nipaa God kenep mit ne Isip te hir mit ne Isrel au. Wepni kau nimin iuwe, te Pailat ketpor kar ik: “Yi eiyir mitik iuwe king ki ik e.”

<sup>1</sup> 19:2 Lu 23:11    <sup>2</sup> 19:3 Jo 18:22    <sup>3</sup> 19:4 Jo 18:38    <sup>4</sup> 19:6 Jo 18:31    <sup>5</sup> 19:7 Lev 24:16; Jo 5:18, 18:31    <sup>6</sup> 19:9 Mt 26:62-63, 27:12; Lu 23:9    <sup>7</sup> 19:11 Jo 10:18; Ap 2:23; Ro 13:1  
<sup>a</sup> 19:12 Lu 23:2; Ap 17:7

<sup>15</sup>Hir pike ninap netpiwek, “Akip! Akip! Ti ewenkekik eku nu tentarakit.”

Pailat kitorhi, “Mekam? Yi hanhan hi ewenkek mitik iuwe king ki eku nu tentarakit a?”

Mit iuwe pris pike netpiwek nar ik: “Sisa kerekek hirak mitik iuwe kaiu. Mit han au.” <sup>16</sup>Hir natip menmen im epei au, Pailat kewet mit nirak ek te hir netiwekhis neriyaak nen newenkekik kaku nu tentarakit.

**Mit hir newenkek Jisas kentar nu tentarakit**

*(Mt 27:32-44; Mk 15:21-32; Lu 23:26-43)*

<sup>17</sup>Mit ne ami nirak hir netiwekhis, hirak kekerir nu kirak hirak keiyik ken wit niuk mirak “Wit Herwe Paan” kerek mit ne Isrel nenewek “Wit Golgota.” <sup>18</sup>Hir newenkekik keit ein. Hir newenkek mitikit wiketeret tentar nu tentarakit tetikerek. Kiutip kau ken his yaaim kiutip kau ken his henkik, Jisas kekrek nimin. <sup>19</sup>Pailat kewis him mau menmen katip mit nirak hir newisik kentar nu tentarakit. Him mirak matip mar im: “IK JISAS KE NASARET, MFTIK IUWE KE ISREL.” <sup>20</sup>Mit yapirwe ne Isrel nekine menmen im nentar wit kerek Jisas mit newenkekik kau nu tentarakit hirak menep wit iuwe Jerusalem. Him hir newisim mekre him me mit ne Isrel, him me mit Grik metike him me mit ne Rom. <sup>21</sup>Mit iuwe pris ne Isrel nen natip pailat nar ik: “Ti ap ewis mitik iuwe king ke Isrel au. Ti ewis mitik ik katip hirekes mitik iuwe king ke Isrel.”

<sup>22</sup>Pailat pike ketpor kar ik: “Menmen hi nepei ewisim emirem emu!”

<sup>23</sup>Mitikit te ami tewenkekik epei au, hirakit tekyaaait teit Jisas klos mirak tenkerem tewetakitem. Hir neit laplap saket nokim mirak kerek mire miutip hir mewim au. <sup>24</sup><sup>b</sup>Te mitikit te ami tatip tar ik: “Haiu ap mamwepim au. Haiu emretit satu eiyik emwirem te haiu emirem emirtei keimin kaktiwem, ti o hi.” Hirakit tiriak menmen im, te him me God mau tiwei nipaa mit profet newisim hirak mamnen. Him im matip mar ik:

“Hir mit nenke klos mai newetan. Hir neretit Satu me laplap nokim mai.” Te mitikit te ami tiriak menmen im.

<sup>25</sup><sup>c</sup>Jisas miye pirak werp wetikewa hi Jon kerek Jisas hanhan keriuwa. <sup>26</sup><sup>d</sup>Te hirak katip miye pirak, “Mite, nikan kit kerp in kereptit.” <sup>27</sup>Nepei au, hirak katip hi mitik disaipel kirak har ik: “Ip e hire miye pit.” Me wi ik Jisas ketpim ere maain, hire wen wau wetikewa wau weit winak kai.

**Jisas kaa**

*(Mt 27:45-56; Mk 15:33-41; Lu 23:44-49)*

<sup>28</sup><sup>e</sup>Jisas katip epei au, hirak kertei hirak kiriak menmen yapirwe epei au kerek nipaa mit profet newisim mau tiwei. Menmen miutip keremem

<sup>b</sup> 19:24 Sam 22:18   <sup>c</sup> 19:25 Mt 27:55-56   <sup>d</sup> 19:26 Jo 13:23   <sup>e</sup> 19:28 Sam 22:15

mau tiwei. Hirak hanhan hiram mamnen mamir nipaa mit newisim, te hirak katip, “Hi him niu enuk (o mar kewenkika him) ehim tipar mei.”<sup>29</sup> Min kiutip kepu tipar si enum mekrerek. Mit en neit mosong nikiam newenem mekre tipar nesenkekim mentar nu heneik ke nu hisop (hiram mire mapik) hir neriuwetem men him mirak.<sup>30</sup> Jisas kaam tipar si enum. Epei au, hirak katip kar ik: “Menmen God katip hi hiriakem hiram epei au.” Hirak katip epei au, hirak kitehir kaa keriuwet himin kirak ken.

### Mitik ke ami kan kewir yipo keneper hirepit me Jisas

<sup>31</sup> Mit iuwe ne Isrel nen nitehi Pailat hirak kaksiuwe mit nirak nanwen hit nian ne mit nau nu tentarakit hir nani waswas nentar ik ek wi kerek mit nemani menmen me wi Sabat. Hir ninapen mit en wen nanu nanit nanintar nu tentarakit ne wi Sabat nentar Sabat im hiram wi Pasova mekrit, hiram wi yaaim holi iuwe.<sup>32</sup> Hir nitehi Pailat epei au, hirak keriuwet mit hir nen newen hit me mitik ke his yaaim, mitik ke his henkik kerek hir newenkekikit tau nu tentarakit tetike Jisas.<sup>33</sup> Hir nan nir Jisas hirak epei kaa, te hir ap newen hit mirak.<sup>34</sup> Mitik kiutip ke mit ne ami hirak kewir yipo kirak kakip keneper hirepit me Jisas te tipar metike hemkre mewen.<sup>35</sup> <sup>h</sup>(Hi mitik kerek hi hir menmen im hi hewisim mau tiwei te yi eyirtei Jisas hirak Nikan ke God. Menmen hi hewisim hiram yaaim. Hi ap hemipin au. Hi atip werek.)<sup>36</sup> <sup>i</sup>Menmen epei man mire him me God mau tiwei nipaa mit profet newisim hiram matip. Him im matip mar im:

“Mit ap nanwen hemik mei mirak miutip au.”<sup>37</sup> <sup>j</sup>Him ham mau tiwei matip mar im:

“Mit nanir mitik kerek nipaa hirnewir yipo nankip neneper hirepit.”

### Mitikit tewis Jisas herwe yink mirak mekre han kewen kinik

(Mt 27:57-61; Mk 15:42-47; Lu 23:50-56)

<sup>38</sup> <sup>k</sup>Mit niriak menmen im epei au, mitik Josep ke wit Arimatia kitehi Pailat hirak kakinke Jisas herwe yink kirak keit nu tentarakit. Josep hirak kises him me Jisas, te hirak kepakinem kentar hirak kinaain mit iuwe ne Isrel. Pailat kewenhi, te hirak ken keit yink kirak keiyik ken.<sup>39</sup> <sup>l</sup>Mitik Nikodimas kerek nipaa ken kir Jisas ke witaan ken ketike Josep, hirak keit 50 kilo me tipar me nu wik minin yaaim.<sup>40</sup> Hirakit teit Jisas herwe yink kirak, hir nesenkekik mekre laplap yaaim metike nu tipar. Mar im mit ne Isrel nemani herwe yink ke mit, hir newisik kekere han.<sup>41</sup> Wit kerek mit newenkek Jisas kau nu tentarakit, ni mepu menep han kewen kinik kepu kerek herwe ap mei miwaai mekrerek ap nipaa ein au.

<sup>f</sup> 19:29 Sam 69:21   <sup>g</sup> 19:31 Diu 21:22-23   <sup>h</sup> 19:35 Jo 21:24   <sup>i</sup> 19:36 Eks 12:46; Nam 9:12; Sam 34:20   <sup>j</sup> 19:37 Sek 12:10; Rev 1:7   <sup>k</sup> 19:38 Jo 7:13, 12:42   <sup>l</sup> 19:39 Jo 3:1-2

42 Te hirakit tewis Jisas herwe yink kirak kekrerek tentar wi im hiram wi kerek mit nemani menmen me wi Sabat. Wi ham mepeit te hirakit tintatin wit hak tewisik kekrerek au.

**Jisas pike kekrit kepu**  
(Mt 28:1-8; Mk 16:1-8; Lu 24:1-12)

**20** <sup>1</sup>Wi Sande hekrit enum hirkiwo, Maria pe Magdala hire wan han kerek mitikit tewis Jisas kekrerek. Hire wan wirek, hire wir nan kerek nipaa keiyepet him ke han eik, mit nenkerek kenpin kekeipin hei eik. <sup>2</sup>Hire wirek epei au, hire wirir wen wir Saimon Pita ketike hi mitik disaipel hak kerek Jisas hanhana. Hire wetpawir war ik: “Hir mit epei neit yink ke Mitik Kaiu Iuwe kekere han eik, hir neiyik nen newisik kiwaai nein te hawir miyapir ap winapinek au.”

<sup>3</sup>Hire watip epei au, Pita ketikewa hawir winaiwiri wen han eik e. <sup>4</sup>Hawir wesiuknen te hi mitik hak eik hinin Pita hen hir han eik. <sup>5</sup>Hi hitehir herenaan hir laplap miwaai te hi ap hen nimin en au. <sup>6</sup>Saimon Pita kikaru kan kewenayipir. Hirak ken kekere han eik kir laplap yaaim miwaai en. <sup>7</sup>Hirak kir laplap nipaa hirakit mitikit wik tewisim teiyim teweikin paan ke Jisas keriuwerem. Hiram ap miwaai metike laplap ham au. Hiram miutipen miwaai ham, hirak Jisas keweiknenim miwaai meit. <sup>8</sup>Pita ken nimin en epei au, hi mitik disaipel hak kerek hi hinin han hiun han kewen kinik eik, hi hisesik hir menmen te hi hertei Jisas pike kekrit. <sup>9</sup>Nipaa ere wi im em, mit wen nepitari him me God mekre tiwei hiram matip mar im: “Hirak pike kakikrit kaku kakit.” <sup>10</sup>Hawir wirek epei au, hawir pike wen nawir en.

**Jisas hirak kewepyapir Maria pe Magdala hirekes**  
(Mk 16:9-11)

<sup>11</sup>Maria wan werp han werp witeik witehir wiwaainaan wikitek. Hire wikitek, hire witehir werenaan. <sup>12</sup>Te hire wir mitikit ensel wik teriuwet laplap me hike tau yeno kerek nipaa Jisas herwe yink kirak kiwaairi, kiutip kau yeno paan, kiutip kau yeno me hit. <sup>13</sup>Hirakit titiwehi tar ik: “Mite, ti henmak te ti hikit?”

Hire wetpiwekit, “Mit epei neit herwe yink ke Mitik Iuwe kai neiyik nen wit hak, te hi hepitari hir newisik keit nein.” <sup>14</sup>Hire watip epei au, hire weweikin wir Jisas kerp menep te hire wepitari hirak Jisas.

<sup>15</sup>Jisas kitiwehi kar ik: “Mite ti henmak te ti hikit? Ti hinhatin keimin?”

Hire han kitet hirak mitik kerek naanmipre ni, te hire wetpiwek, “Mitik, ti heit yink kirak hewisik kiwaai wit hak ti etpau te hi ano etiwek.”

---

<sup>m</sup> 20:2 Jo 13:23   <sup>n</sup> 20:7 Jo 11:44   <sup>o</sup> 20:9 Ap 2:24-32; 1Ko 15:4   <sup>p</sup> 20:14 Lu 24:16; Jo 21:4

<sup>16</sup>Jisas ketpiwe, “Maria.”

Hire weweikin wiamnaan wirek, te hire wenke him me Isrel wetpiwek war ik: “Rabonai.” Hiram matip tisa.

<sup>17</sup><sup>q</sup>Jisas ketpiwe kar ik: “Ti ap etenina au emit. Hi ap han hir Haai kai wen au. Ti eno atip nai yinan mit disaipel har ik: ‘Hi ano ahirek kerek hirak Haai kai, Haai ki, God kai, God ki.’”

<sup>18</sup>Hirak katip epei au, Maria pe Magdala pike wen watip mit disaipel me menmen hire watip, “Hi epei hir Mitik Iuwe.” Te hire wetpor him kerek hirak nepei ketpiwerem.

### **Jisas kewepyapir haiu mit disaipel nirak hirekes**

(Mt 28:16-20; Mk 16:14-18; Lu 24:36-49)

<sup>19</sup>Witaan me wi Sande, haiu mit disaipel haiu mererik meiyepet weipir, te mit ap nirai mentar haiu minaan mit iuwe ne Isrel nantaihis naniwep. Haiu wen mepeit en, Jisas kan kokninai kerp nimin ketpai, “Yi han yaaik eiyu.” <sup>20</sup>Hirak ketpai epei au, hirak keteiknai his mirak nipaa mit nekenpet nil mekre his mirak, keteiknai hirepit kerek mitik ke ami kakip keneper keriuwe yipo. Haiu mit disaipel mirem, haiu han yaaik iuwe mentar haiu mertei Mitik kiau Iuwe pike kekrit. <sup>21</sup>“Jisas pike ketpai, “Yi han yaaik eiyu. Hi heriuweti yi yepno yiriak menmen mai yar ke Haai kai keriuweta hi han ti ik e.” <sup>22</sup>Hirak ketpai epei au, hirak ketenwiwai ketpai kar ik: “Yi eiyit God Himin Yaaik. <sup>23</sup>“Yi yesiuwe menmen enum mau mekre han ke mit ap han kitetim, hiram mamno, o au en, hiram mamu han kir mamu mamit.”

### **Jisas kewepyapir Tomas hirekes**

<sup>24</sup>“Wi kerek Jisas kan kewepyapir haiu mit disaipel nirak hirekes, mitik kiutip Tomas kepu ketikewai au. Niuk mirak ham Didimas.

<sup>25</sup>Maain, haiu mit disaipel haiu mirek haiu metpiwek mar ik: “Haiu epei mir Mitik Iuwe Jisas.” Au, Tomas ketpai, “Hi ap hir pap mekre his o heriuwet his mai mamno mitet pap me hirepit mirak, hi ap han kitet hirak kepu au.”

<sup>26</sup>“Maain wi hispinak wikak (8) epei au, haiu mererik meit nimin hir neiyepet weipir, Tomas kau ketikewai. Haiu meiyepet weipir te Jisas hirak kan kokninai kerp nimin ke haiu mit miyapir ketpai kar ik: “Yi han yaaik eiyu.” <sup>27</sup>Epei au, hirak katip Tomas kar ik: “Ti ewis histuwak kit eknen in ehir his mai. Epei au ti eriuwet his mamnen mitet hirepit mai. Ti ap eweikin sip eweto au. Ti eisisa!”

<sup>28</sup>Tomas ketpiwek kar ik: “Ti Mitik Iuwe kai, ti God kai!”

<sup>q</sup> 20:17 Ro 8:29; Hi 2:11-12    <sup>r</sup> 20:19 Jo 19:38    <sup>s</sup> 20:20 Jo 19:34, 16:22; 1Jo 1:1

<sup>t</sup> 20:21 Jo 17:18    <sup>u</sup> 20:23 Mt 18:18    <sup>v</sup> 20:24 Jo 11:16, 14:5, 21:2    <sup>w</sup> 20:26 Jo 20:19-20

29<sup>x</sup>Jisas ketpīwek, “Ti han kitet hi pike hekrit hentar ti hira a? Neimin ap nira te hir han kitet hi pike hekrit, hir nininit.”

**Jon katip kenmak hirak kewis tiwei ik.**

30<sup>y</sup>Jisas kiriak menmen yapirwe yaaim ham kikaap mit han. Haiu mit disaipel epei mirem te hi ap hewisim mekre tiwei ik. 31<sup>z</sup>Menmen hi hewisim im hi hewisim, te yi mit kerek yekine tiwei ik, yi yertei Jisas hirak mitik Kraiss kerek God keriuwetek kan ti ik kikaap haiu mit ne ti. Hirak nikan ke God yi eiyisesik yi yayit himin yaaik eiyu eitikerek eiyintar hirak Mitik Iuwe ik kerek nipaa God ketpaiyem.

**Jisas kewepyapir haiu mit disaipel mar hispinak wik hirekes**

**21** 1<sup>a</sup>Maain wi ham Jisas kewepyapir haiu mit disaipel nirak hirekes keit wan Taibirias. Hirak kiriakem kar ik. 2<sup>b</sup>Saimon Pita, Tomas (kerek niuk mirak ham Didimas), Nataniel ke wit Kena ke provins Galili, hawir nikerek hirakit wik te mitik Sebedi, haiu metike disaipel wik hakit te Jisas. Haiu mererik mau meit. 3<sup>c</sup>Haiu mererik mau meit, Saimon ketpai kar ik: “Hi are ano hahu bot ewir hepin ehit saauk mei.” Hirak katip, te haiu metpīwek, “Haiu mamno mamtikewit.” Haiu men mau bot men mewir hepin witaan ere wanewik, te haiu meit saauk mei miutip au.

4<sup>d</sup>Wepni kewep kan, Jisas kerp tenhaan menep tipar, te haiu mit disaipel ap mertei hirak Jisas au. Haiu han kitet hirak mitik hak. 5<sup>e</sup>Hirak ketpai kar ik: “Yi pipep, yi yeit menmen o au?” Haiu matip, “Ap saauk mei au.” 6<sup>f</sup>Hirak katip kar ik: “Yi eiwir hepin mi emno his yaaim mekre tipar te yi eiyit saauk mei.” Hirak katip epei au, haiu mewir hepin mekre tipar, te haiu ap pike meriyaam meriuwe saauk yapirwe miwaai mekrerem.

7<sup>g</sup>Hi mitik disaipel kerek Jisas hanhana hi hatip Pita, “Mitik Iuwe Jisas eik e.” Pita kemtewek, te hirak keriuwet saket iuwe miwapin yink kirak. (Hirak keriuwet saket kentar hirak kenke klos mirak te kakit saauk.) Hirak keriuwetem epei au, hirak kehın kamin tipar kari wan ken kiun Jisas. 8<sup>h</sup>Haiu mit disaipel han nau bot man tenhaan mari hepin saauk mekrerem mau niu. Haiu meit yanimin au. Haiu menep tenhaan mire 90 mita keriyen.

9<sup>i</sup>Haiu man merp tenhaan, haiu mir si miwaai meit ein, saauk mekre si metike bret mei. 10<sup>j</sup>Haiu epei man merp ein, te Jisas ketpai, “Yi eiyit saauk mei mekre hepin yi epei yetiwem eiyim einen.” 11<sup>k</sup>Hirak katip, te Saimon Pita ken kerp kekere bot kari hepin keyim kan tenhaan. Saauk iuwe mar 153 miwaai mekre hepin, te hiram mewep saauk mirir au.

<sup>x</sup> 20:29 1Pi 1:8 <sup>y</sup> 20:30 Jo 21:25 <sup>z</sup> 20:31 Jo 3:15; Ro 1:17; 1Jo 5:13 <sup>a</sup> 21:1 Jo 6:1

<sup>b</sup> 21:2 Jo 1:45-51, 20:24 <sup>c</sup> 21:4 Jo 20:14 <sup>d</sup> 21:5 Lu 24:41 <sup>e</sup> 21:6 Lu 5:4-7 <sup>f</sup> 21:7 Jo 13:23; Mt 14:29 <sup>g</sup> 21:11 Lu 5:6

<sup>12</sup>Epei au, Jisas ketpai kar ik: “Yi einen eiyim.” Keiyak ke haiu mit en ap kitiwekhi hirak keimin kentar haiu yapirwe mertei hirak Mitik Iuwe Jisas. <sup>13</sup><sup>h</sup>Haiu merp, te Jisas kan keit bret keiyim kan kewetaiyem.

<sup>14</sup><sup>i</sup>In ek haiu mit haiu mir Jisas meteipim wikak me wi nipaa Jisas kaa pike kekrit kepu ere in.

### Jisas kitehi Pita menmen

<sup>15</sup><sup>j</sup>Haiu mit maam menmen epei au, Jisas katip Saimon Pita, “Saimon ti nikan ke Jon, ti hinin mit in hanhana hi o au?” Pita ketpiwek kar ik: “O Mitik Iuwe, ti hertei hi hanhan ti.” Jisas ketpiwek, “Te ti naanmampre mit nanisisa ti har ke mitik naanmipre sipsip mai.”

<sup>16</sup><sup>k</sup>Jisas kitiwekhi keteipim, “Saimon ti nikan ke Jon, ti hanhana hi o au?” Pita ketpiwek keteipim, “O Mitik Iuwe, ti hertei hi hanhan ti.” Jisas ketpiwek, “Ti naanmamre mit nanisisa ti har ke mitik naanmipre sipsip mai.”

<sup>17</sup><sup>l</sup>Jisas pike kitiwekhi keteipim, “Pita, nikan ke Jon, ti hanhan hi o au?” Pita yink enuk kentar Jisas pike kitiwekhiyem wikak, te hirak pike ketpiwek kar ik: “Mitik Iuwe ti hertei menmen yapirwe. Ti hertei hi hanhan ti.” Jisas ketpiwek keteipim kar ik: “Ti naanmamre mit nanisisa ti har ke mitik naanmipre sipsip mai.

<sup>18</sup><sup>m</sup>“Hi hetput werek. Nipaa ti pipiak ti heit tanik kit ti hises han kit hen in hen ein. Maain ti he mitik, ti eriuwet his mit, mitik hak kaksenkekim kakriuwe waai keyik kakiryit ti eno wit kerek ti hinapen enori.” <sup>19</sup>(Jisas katip menmen im kewepyapir karkeik te maain Pita kaki kakwenipi niuk me God.) Epei au, Jisas ketpiwek kar ik. “Ti ehisisa.”

### Jisas katip ke hi mitik disaipel kerek hirak hanhana iuwe

<sup>20</sup><sup>n</sup>Pita keweikin kerenaan kira hi mitik disaipel kiutip herp sip kirak kerek Jisas hanhana. Hi mitik disaipel kerek nipaa hepu yeno hetike Jisas wirapitakit hi hitiwekhi har ik: ‘Mitik Iuwe, keimin kewepityapir ti eno mit enun?’ <sup>21</sup>Pita kira hirak kitehi Jisas kar ik: “Mitik Iuwe, mekam mamnen mitik ik?”

<sup>22</sup><sup>o</sup>Jisas ketpiwek, “Hi hanhan hirak kaku ere hi pike anen, hiram menmen mit au. Ti ehisisa.”

<sup>23</sup>Te him epei mekrit te mit nises him me Kraais natip hi mitik disaipel ik ek hahi au. Te Jisas ap katip hi ap hahi au. Hirak katip, “Hi hanhan mitik ik kaku ere hi pike anen, hiram menmen mit au.”

<sup>h</sup> 21:13 Jo 6:11    <sup>i</sup> 21:14 Jo 20:19, 26    <sup>j</sup> 21:15 Jo 1:42; Mt 26:33    <sup>k</sup> 21:16 Ap 20:28; 1Pi 5:2    <sup>l</sup> 21:17 Jo 13:38, 16:30    <sup>m</sup> 21:18 2Pi 1:14; Mt 16:24-25; Mk 1:17; Jo 13:36  
<sup>n</sup> 21:20 Jo 13:23-25    <sup>o</sup> 21:22 Mt 16:28



<sup>24</sup>P<sup>p</sup>Hi kerekek hi disaipel hi atip me menmen im, hi ewisim mau tiwei. Yi yertei menmen hi hetpim, hiram him yaaim, hi ap emipin au. <sup>25</sup><sup>q</sup>Jisas kiriak menmen yapirwe ham. Mit hir nanwisim mamu tiwei ham, hi han kitet ti im haiu mit mewim ap ketenen tiwei yapirwe mar im taau.

**Mepir keremem.**